

هذا ما رأيت في

دبي

يوميات
مفترب



طارق حسن عبدالعال

مقدمة

في حياة كلا منا مواقف واحداث لا يمكن أن ينساها لما لها من بالغ التأثير علي مجرى حياته، ومن اهم المواقف في حياتي تجربة سفري إلي دولة الامارات العربية المتحدة ، وخصوصا دبي فقد كان السفر والعمل بها احد احلامي ولكن ما لبس أن تحول هذا الحلم إلي كابوس لما قابلته من أعباء ومشاكل وتمنيت لو أنني ما قدمت إليها وظللت أعمل بمصر الحبيبة ، وبمرور الوقت والتاقلم مع متغيرات الحياة ،اصبحت الإمارات من احب البلاد إلي قلبي .

وها أنا أضع بين ايديكم مقتطفات من هذه التجربة لعلها قد تساعد في توعية الشباب الراغبين او المقدمين علي العمل بالخارج بما قد يصادفهم من مواقف او مشاكل وكيفية التعامل معها لتجنب الوقوع في أخطاء وقع فيها الكثيرون وذلك من خلال سرد الاحداث التي مررت بها واحداث مر بها أناس عايشتهم و اصدقاء جلبتهم للعمل معي وذلك في قالب لا يخلو من الفكاهة حتى لا يمل القارىء .
فالله اسأل ان ينال هذا العمل إعجابكم ..

والله ولي التوفيق

طارق حسن عبدالعال

www.facebook.com/tarekfalcon

(ملحوظة : هذه النسخة قد تختلف عن النسخة المطبوعة والمراجعة اللغوية غير مكتملة ، لذا وجب التنويه)

البداية : البحث عن فرصة سفر

كأي شاب ، كنت احلم بالسفر للخارج ليس فقط للعمل وجني الاموال 😊 وانما لإكتساب الخبرات والتعامل مع جنسيات و ثقافات مختلفة .

بدأت حياتي العملية في مصر بإحدى شركات البرمجة بالجيزة وتحديدأ في شارع الهرم بجوار كازينو الليل . وكانت الشركة توفر لنا سكناً في نفس المبني ،فكنا نعمل نهارا ونقف في الشرفة ليلاً 😊 .

كنت لا أعرف احدا بالخارج كي يساعدني في الحصول علي الوظيفة التي أريدها فما كان أمامي إلا خيارا واحدا وهو البحث على الإنترنت ،فرمما يحالفني الحظ واجد غايقي.

كنت امضي اكثر من ساعتين يوميا بعد إنتهاء العمل اتصفح فيها الإنترنت بحثا عن وظيفة مبرمج في دول الخليج وتحديا دولة الإمارات العربية المتحدة .

أرسلت سيرتي الذاتية الاف المرات ولكن دون جدوى ، فلم يكن احد يعبرني اي اهتمام بالرد علي إيميلاتي ولكن كان أمني في الله كبير فلم يعرف اليأس او الملل لي باباً ، حتى بدأت بوادر الامل تظهر . ذات صباح وجدت ردا من احدى الشركات علي البريد الالكتروني ، ثم بدأت المراسلات والاتصالات بيننا .

مضي اكثر من ستة اشهر في المراسلات والاتصالات وفي النهاية لم يحدث توافق بيننا علي العرض وعقد العمل، كنت حزين لضيع الفرصة مني ولكني كنت علي يقين علي أنني سأحصل علي فرصة افضل منها .

وبالفعل لم يمضي اكثر من اسبوعين حتى جاءني إتصال من صاحب إحدى الشركات في دبي ، حدثني بالإنجليزية خمس دقائق يسألني عن نفسي وعن خبراتي ثم أخبرني بعد ذلك بالعربية انه مصري يمتلك شركة لصناعة البرمجيات في دبي ويريدني ان اعمل معه فرحبت بذلك علي الفور ، فأخبرني أنه سيرسل لي بعض المهام (Assignment) علي إنجازها خلال يومين وذلك ليختبر قدراتي العملية ثم سيخبرني بعدها شفويا تليفونيا او اونلين عن طريق المسنجر. ومع رخامة وصعوبة ما طلبة في ال (Assignment) إلا أنني أنجزتها في يوم واحد بفضل الله . بعدها ارسل لي عرض العمل ، فسألته عن الاختبار الشفوي فقال لست بحاجة إليه فقد تأكدت من خبراتك .

بعد ذلك تحدثنا عن تفاصيل عمل الشركة وكنت بطريقي في الكلام أجعله يشعر بأنني المنقذ وأني الوحيد الذي يستطيع الاعتماد عليه والحقيقة بمجرد دخولي دبي حدثت بها أزمة إقتصادية 😊.

تناقشنا في تفاصيل العقد و تم التوافق والحمد لله، ثم طلب مني أن ارسل له صورة شخصية وصورة لجواز السفر حتى يستخرج لي الفيزا . وبالفعل ارسلت له ما طلب فقد استخرجت جواز سفري منذ فترة تحسبا لأي عرض قد يأتيني .

تم هذا كله في شهر تقريبا ، فقد كان اول اتصال بيننا يوم ٢٤ مايو ٢٠٠٨ وتم إستخراج الفيزا يوم ٢٥ يونيو ٢٠٠٨ ، وقمت بالحجز للسفر في اليوم التالي.

في المطار

إنطلقت إلى المطار يوم ٢٧ يونيو ٢٠٠٨ وقمت بتوديع أبي وامي (بارك الله لي فيهم) علي بوابات الدخول وكانت لحظة لا توصف ، فهي المرة الاولي التي اترك فيها بلدي ذاهبا إلى الجھول . وبعد العديد من القبلات والاحضان الحارة ، هممت بالدخول تاركا ابي وامي والحزن يعتصرهم .

وإذا سمح لي القارئ الكريم ، فسأتحدث باللغة المصرية العامية حتى أسرع في الكتابة وأختصر في الوقت ، فقد اضطررت إلى ترك أبي وامي في المطار منذ قليل فلا بأس أن اترك اللغة العربية شبيهه الفصحى إلى شعار آخر ، او من نظرة أخرى فلم ولن اترك لغتي المصرية أينما ذهبت ومهما حدث ، فارجوا ان يتسع صدرك إلى هذا .

وأنا داخل لقيت واحد بيقولي انت رايح دبي قلت ايوة قالي طب خد البنيت دي معاك عشان مسفرتش لوحدها قبل كدا قلت ماشي قال يعني انا اللي سفرت قبل كدا 😊 ، يلا يا بنتي رزقي ورزقك علي ربنا .

دخلت انا والبنيت وخلصنا الاجراءات ورحنا نستنا الطائرة . وطبعا مكنش معايا التليفون ، فقلتله ممكن بس اكلم اهلي دقيقة عشان اطمنهم ويمشوا ، اهو نستفاد منها بحاجة ، قالت شوور اتفضل ، بس اكتب ٠٠٢ قبل الرقم عشان دا خط دولي ، قلت إية الاحراج دا ، بردوو هتصل .

واحنا قاعدين بدأنا نتكلم وهي ما صدقت إني أسألها سؤال . كان عندها حوالي ١٦ او ١٧ سنة مصرية عيشة في دبي وكانت نازلة زيارة لجدتها و فضلت تكلمني عن الفرق بين مصر ودبي بطريقة استفزتني لما كنت هضربها ، بس قلت مينفعش دي أمانة 😊 .

فضلت تحكي ، الزبالة بتترمي في الشارع ، مفيش عداد في التاكسي والسواق بيتحكم فيك ، الشباب والمعاكسات وقلة الادب ، وتروح تاكل في مطعم تلاقي الفاتورة طالع فيها ضريبة ، وانا ادا فع لالا مصر دي امي ، متقوليش كدا ، لالا لالا ، ولكن لا حياة لمن تنادي .

واول ما وصلت دبي قلت فعلا عندك حق والله بس بردوو فضلت مصر امي بس في الرضاعة 😊 .

المهم البنت أوصتني اني اقعد جنب الشباك لو عرفت يعني، عشان اشوف المدينة اللي في البحر بس للأسف مكاني مكنش جنب الشباك وركبت الطائرة واخيرا ركبته لاول مرة .

طبعا مكنتش قلقان ولا حاسس بالخوف زي ما بيحصل لناس كثير من اول مرة سبحان الله مش عارف لية ، بس كان احساس جميل وانت راكب الطائرة لاول مرة (دي استعارة مكنية تفيد التحنيس للي مركبهاش قبل كدا 😊) .

لما نزلت هناك المفروض إني معايا صورة من الفيذا بتعتي وهاخذ الاصل من المطار من مكتب الإيداعات ، زي ما مدير الشركة مفهمني . رحت لمكتب الإيداعات

لقيت اصل الفيزا ضايع وفضلوا ساعه يبحثوا عنها ولكن دون جدوي ، في
الآخر ختمولي الصورة قلت بدايتها كدا...ربنا يستر .

البت اللي كانت معايا استنتني شوية عشان نخرج سوا ، لكن بسبب التأخير
سبتني وخرجتي ، بعني من اول لحظة .

المهم طلعت من باب الخروح ، فية حاجة مهمة ، انا معرفش شكلك المدير اللي
مستيني ومعرفش مستيني فين ولا معايا تليفون، طب هلاقية ازاي ، غير إني
اتأخرت ساعة وممكن يكون مشي يا أنهار ابيض ، إحنا فينا من كدا .

خرجت من المطار ومش عارف اروح فينطب الراجل دة مش يقولي لما تطلع
من المطار هيحصل كذا وكذا مثلالقيت ناس ماسكة ورق مكتوب فية أسماء
لأشخاص ، قلت أكيد إسمي هيقى مكتوب علي أي ورقة من دول ، لقيت عليهم
واحد واحد ، أسمي مكتوب ..لأ ، إلي بعدة ، إسمي مكتوب ...لأ . طب وبعدين
أعمل اية . الجو حر نار كانت درجة الحرارة من ٣٩ ل ٤٢ وكانت الناس بتجيب
مطر مش عرق وطبعا انا بقي لابس البدلة ويمكن كنت الوحيد اللي لابس بدلة ،
كل الناس لابسة مش لابس وانا هعيط من الحر . منك لله يلي في بالي ، منك لله
يا جمال يا مروان .

المهم لقيت قدامي بنت من اللي شفتم كثير في الطيارة وعند أخذ الحقائق و كان
معها موبيل، قلت بس هي دي الحل، رحلتها وقلت لو سمحتي ممكن الموبيل لحظة
قالت اتفضل قول الرقم ، مش عارف خافت إني اخذ الموبيل واجري ، المهم
قلتلها الرقم واتصلت و قالت إتفضل ...

الوووو.....ايوة يا بن ال..... ايوة يا بشمهندس.. حضرتك فين ، قال أنا
عند نقطة الالتقاء **meeting Point** لابس تي شرت اخضر ، طيب انا جيلك .
شكرت البنت وقلت هي فين نقطة الالتقاء قالت هناك ، رح لقيتة واقف لابس
نضارة شمس وواقف في التكييف .

البشمهندس عامر ...ايوة ازيك الحمد لله سلم عليا وخديني بالحضن والبوس
،مصريين بقي . طبعا كنت مبسوط انة مصري ، أكيد هيفهمني وأفهمه ولكن
خاب ظني بعد ذلك، يا ريتوا ما كان مصري .

اليوم الاول في الإمارات

في الطريق من المطار للسكن ، بدأ يسألني عن خبراتي والحجرات اللي اشتغلت فيها وبعدين كلمني عن الشركة واننا شركة صغيرة بس لينا شغل كثير وبنكبر وعندنا عملاء كثير وشغلنا في مجال كذا وكذا ، وقبل كذا انا جيت ناس من مصر وقعدوا شهرين بس مكنوش كويسين فمشيتهم . كانت مشكلتهم في السكن وكانوا بياخدوا في الطريق ٣ ساعات رايح وساعتين جاي ، فكانوا ببيعوا تعابينين وهالكينين واوقات نايمين ، وكانوا بيقعدوا حوالي ٩ في الاوضة . وشوية حجرات قاهالي افتتاحية، عشان كذا فكرنا نوفر سكن للناس اللي هتيجي لان السكن اهم حاجة ، لو الشخص مرتاح في السكن ومش بعيد عن الشغل اكيد هيبقي شغال ويبيدي كويس .

بالنسبة للإثنين المصريين اللي اشتغلوا شهرين فحكايتهم ببساطة انهم خلصوا المنحة ITI وبعدين دوروا علي فرص شغل خارج مصر وطبعا الانترفيو علي النت بتبقي بنسبة كبيرة اسئلة في الاساسيات فقط Logic & concepts و بتوع المنحة الحجرات دي بتبقي عندهم كويسة بس طبعا من غير خبرة . مشكلة كبيرة ، فلما راحوا هناك مكنش فية شغل ظاهر ليهم ، طبعا اللي بيروح بيروح زيارة لان بعد الزيارة صاحب الشركة بيحدد هالاشخص دا هيكمل ولا لا .

الزيارة كانت الاول شهرين فهما خدوا الشهرين وبعدين قالمهم انتوا انزلوا مصر خدوا خبرة وبعدين فكروا في السفر . انا كمان كنت رايح زيارة لمدة شهرين ، سمعت الكلام دا قلبي إتقبض ، قلت في سري هو بيخوفني ولا إية ويقصد إية من الكلام دة .

المهم رحنا علي الشقة وهو مكنش يعرف مكانها بالتحديد فاتصل علي شريكته وكانت أردنية ، إسمها دينا . قابلتنا ورحنا علي الشقة، شقة كانت جميلة وفاضية. كانت في منطقة إسمها النهدة ، موجودة في أحر الشارقة واول دبي. وكنت انا اول واحد يسكنها لانه لسة متأجرها جديد والبناية اصلا جديدة وهو لسة هيجيب ناس غيري علي حسب قولة.

المهم قالي انك بكرة هتيجي علي الشغل وإداني العنوان في ورقة وقالي هتاخذ تاكسي وتديلة العنوان وهو هيوصلك. وخلي بالك اصعب حاجة هنا المواصلات، ممكن تفضل وقت طويل متلقيش تاكسي ، فمتزهقش بسرعة ، قلت ربنا يسهل . أعطاني الف درهم حق التذكرة ، طبعا انا كنت متفق معاه ان تذكرة الطائرة عليه وقالي هتخذها يوم ما توصل. وبالفعل أعطهالي في نفس اليوم إلي وصلت فيه . حطيت حجاتي واخذت دش ورحت عشان اكلم اهلي علي الانترنت اطمنهم عليا . ببص علي ساعة الانترنت لقيتها ب ٥ درهم . يا يهوى. يا يهوى. يا يهوى، دا الدرهم بجنية ونص يعني ساعة الأنترنت ب ٧ جنية ونص ، من اولها كدا ، دا خراب بيوت . قلت ادخل نص ساعه عشان اطمن أهلي وأخرج بسرعة . لقيتوا بيحاسبي علي النص ساعة ب ٣ رهم .. قلت بدايتها فل ، ربنا معانا .

طلعت علي الشقة اكلت ، الحاجة الوالدة كانت متوصية بيا شوية في موضوع الاكل ،ربنا يباركلي فيها يا رب . وبعدين نزلت تحت اتمشي شوية واشوف الدنيا فيها اية. لقيت واحد قاعد في مدخل العمارة سلمت عليه طلعت عربي سألته عن الوضع وقتلته إني لسة جاي جديد، طلعت مصري ..مئة مية ..فضل يحكي لي شوية عن المصاريف والدنيا هنا نار وخلي بالك من المية اللي فوق اوعي تشرب منها،

مفة الشرب هنا معدنية وبس...قلت نعم ؟ قالي اه المفة اللي فوق تجيب فشل
كلوي في اسبوع واحدقلت يا ستار يارب ، ربنا يستر .
قلتلة هسيبك دلوقتي واروح السوبر ماركت اشترى شوية حجات ، قالي أتفضل .
رحت علي السوبر ماركت ويا رتني ما رحنت

في السوبر ماركت

دخلت السوبر ماركت قلت اشوف الاسعار عاملة اية ، كل شوية واحد يقولي الاسعار غالية ، الاسعار غالية .وكمان اشترى شوية فاكهة وشوية خضروات ، الواحد في مصر كان متعود موز ، تفاح ، خيار ، خس ، الفيتامينات والحديد والحجات التيك اوي 😊 .

اول ما دخلت لقيت في وشي الموز قلت حلو قوي ، مسكت موزاية وقلت بكام الموز ، هاو ماتش، قالي ٠,٧٥ درهم قلت اية دا بجد الكيلو ب ٠,٧٥ درهم قالي لا الصابع ، البناناية ب ٠,٧٥ درهم، رميتها من ايدي وقلت اعوذ بالله ، طيب التفاح بكام ، قالي الواحدة بدرهم، إرمى..طيب الخيار حبيبي بكام ، قالي الكيلو ب ٦ درهم قلت نعم احنا فينا من كدا، حتى الخيار ..دا أنا انضحك عليا بقي وشكلي هشحت علي آخر الشهر.قلت اكمل اسئلة واشوف هشتري اية في الاخر ، طيب كيلو الطماطم بكام ، قالي ب ٥ درهم ، طب الخس بكام ، قالي الواحدة ب ٤ درهم ..يا يهوي ..يا يهوى...دا احلي خساية فيك يا مصر ب ٥٠ قرش ودي متجيش نصها كمان....وبنقول الاسعار غالية في مصر ! يا حبيبي يا مصر يا مصر ، يا حبيبي يا مصر يا مصر .

قلت في نفسي الحجات دي كلها قشور ممكن نستغني عنها ، خيلنا في الاساسيات ، الرز بقي ، كيلو الرز بكام قالي ب ٨ درهم ..كان هيغمن عليا علي طول ، انا عمال اضرب السعر بالمصري في كل حاجة كيلو الرز ب ١٢ جنية ، الخساية ب ٦ جنية ، كيلو الخيار ب ٩ جنية ، التفاحة ب ١,٥٠ حنية ، الموزاية بجولي جنية لية .كدا، دا حرام والله ، ربنا ميرضاش بالظلم ، شكلي هشوف ايام ميعلم بيها إلا ربنا

. الحاجة الوحيدة اللي لقيتها رخيصة هي الكانز ، ودا اللي كنت مستغربلو، علبة

الكانز ب ١ درهم بس .

ومكدبش عليكوا ، مشتترتش اي حاجة من الحجات إللي فوق دي كلها ، زي ما

قلت دي كلها قشور ☺ ، اللهم الا قزازة ماء و فرشاة و معجون وكانوا غاليين

والله بس هعمل اية، مضطر يا جماعة.

حمدت ربنا إني سمعت كلام أمي وجبت معايا ألاكل إلي كانت مجهز هولي ، أكل
يكفيني اسبوع علي الاقل ، رز ولحمة وفراخ وجبنة وشوية طماطم وخيار وخبز ،
ربنا يجازيك عني خير يا أمي .

قلت لما اخلص الأكل اللي انا جايبة دا بيقى ربنا يسهل ، وانا في الطريق دماغي
عمالة تحسب في فرق الاسعار والمتوقع إني أصرفه في الشهر ، طبعا كل الخطط
والتوقعات إلي كانت محطوة في مصر تبخرت تماما . وبدأت أغني وانا ماشي
...يا ريتني ، و غلطة ، إنسي .

يا ريتني ... مجيت وفضلت في بلدي .

غلطة ... إني مسعمتش كلام الناس .

إنسى ... إنك توفر حاجة .

دا احنا لسة بنتكلم علي اول حاجة .. الاكل ، امال الحجات الثانية هيبقي فيها
إية ، يارب سلم سلم.

في التاكسي

تاني يوم كان السبت ، اول يوم ليا في الشغل، نزلت بدري عشان اروح الشغل ، المدير كان محذريني من المواصلات قايلي بالحرف " اصعب حاجة في الإمارات هي المواصلات ، صعب جدا انك تلاقي تاكسي الصبح " . نزلت بدري ، اول ما طلعت علي الشارع مفيش ٣ دقائق إلا والتاكسي وقفلي قلت تمام ما العملية سهلة والشوارع فاضية أهية...أمال الراجل دا بيضحك عليا ولا اية؟.

ركبت التاكسي ...رايح فين ...اديتة العنوان في الورقة...قالي اوك ...بدأ العداد ب ٢,٥ درهم ...قلتلة اية ياعم دا .. احنا لسة ع الصبح ..لية ٢,٥ احنا لسة مشيناقال دي بداية العداد ...قلت يا اولاد الحرمية ...ربنا علي الظالم..طبعا هو مش فاهم عربي فبتكلم براحتي ..حتى في السوبر ماركت ..كلهم هنود او باكستان.

طول الطريق عيني منزلتش عن العداد ، ١٠ درهم يعني ١٥ جنية ، ١٥ درهم ، ٢٠ درهم ، ولسة موصلناش وكل يوم كدا . يا انهار يا انهار ، يا بياض يا بياض . طبعا مفيش مواصلات عامة يعني اخرك تاكسيات المهم وصلت والعداد علي ٢٥ درهم وقالي إن احنا عدينا علي حاجة اسمها سالك بتخصم ٥ درهم يعني عايز ٣٠ درهم (طبعا دا كان بيستغفلي عشان عرف إني لسة جديد واصلا مكنش فية سالك في الطريق .. سالك دي بوابة إلكترونية بتخصم ٤ درهم للي يعدي منها ، دي عشان تخفف الضغط علي الطرق الرئيسية) . المهم اديتلة ال ٣٠ درهم وقلبي بيتقطع ، ٤٥ جنية يا جدعان وفيه زيهم وانت راجع وكل يوم كدا، عشان كدا

صاحب الشغل قالي المواصلات عليك، يابن الذين، هقول إية .. حسبي الله ونعم الوكيل ، حسبي الله ونعم الوكيل .

افتكرت البنت بتاعة المطار إللي بتقولي التاكسي في مصر بيتحكم فيك ومفيش عداد ، ياختي خلية يتحكم براحتوا ، دا أخروا بياخد ٢٠ او ٣٠ جنية ويلف بيك مصر كلها ، إنما دا في ٢٠ دقيقة خد ٤٥ جنية وبالقانون والعداد ومحدث يقدر يقول لأ 😊 . إذا كان تاكسي مصر بيتحكم في الاجرة قبل ما يتحرك فتاكسي الإمارات بيتحكم في الاعصاب والضغط والسكر والبنكرياس والشرايين اول ما يتحرك 😊 .

وصلت الشركة الحمد لله ، ووصلت بدري ، ولما جية المدير سألني .. ها إية الاخبار ، قلت الحمد لله .. كلة تمام ، ولقيت تاكسي علي طول ، مفيش زحمة ولا حاجة ، بقوها كدا باسلوب المنتصر كأني بقوله انت كداب مفيش زحمة بتخوفني لية يا وحش .

لقيتوا بيضحك ضحكة شريرة وقالي عشان إنهاردة السبت ومعظم الشركات أجازة إنهاردة فمفيش زحمة في المواصلات و لقيت تاكسي بسهولة ، قلت في سري ربنا يطمنك .

وبالفعل تاني يوم عرفت يعني إية صعب تلاقي تاكسي ، كان اصعب يوم ليا في دبي الأحد ٢٩/٠٦/٢٠٠٨ .

عرب صعبت عليهم وانا واقف في الشمس وفي نص الطريق مش لاقى تاكسي ،
سألوني رايح فين ، قلت دبي وسبحان الله كانوا رايمين نفس المبني إللي فية الشركة
بتاعتي ، غبي انا بقي مطلبش منة رقم الموبيل او اي وسيلة إتصال ، لأ.. شكرتهم
ومشيت . بعد كدا عرفت إن فية حاجة اسمها كار ليفت او بالعربي إنك تتفق مع
شخص عنده سيارة يوصلك الشغل ويرجعك مقابل مبلغ من المال شهريا ، عادتا
الشخص دا بيكون شغال قريب من شغلك وساكن قريب من سكنك . طبعا انا
مكنتش اعرف الحاجات دي كلها ، كنت لسة جديد وبالصراحة إتكسفت إني
اطلب منهم رقم موبيل او حاجة ، كانت فرصة من ذهب ، لكن الحمد لله علي
كل شيء.

مرة تانية واحد هندي راكب عربية لاند كروزر ، حاجة جامدة كدا ، راح وقفلي
وسألني اي مساعدة .. رايح فين ، قلت دبي وقلتلته علي العنوان ، قالي انا مش
رايح هناك بس ممكن اخذك لاول دبي بحيث تلاقي تاكسي بسهولة ، قلتله اوك
شكرا وركبت معاه ومنستش طبعا اخذ رقم الموبيل وفضلنا علي إتصال كام يوم
كدا ، بس مجتث فرصة إني اقبلة تاني .

مرة تالته ورابعة كان فية عربيات بتقفلي (ومحدش يفهمني غلط) ويسألني رايح فين
ويقول هووصلك بمبلغ ٣٠ او ٤٠ درهم علي حسب كل واحد ، وكنت بوافق
طبعا ، اهو ينقذني من وقفة الشارع و الجو النار
بدون مبالغة والله ، خلال ال ٣ أسابيع الاولي دي دفعت في المواصلات أكثر من
تلت مرتبي.هقول اية منك لله يلي في بالي ، منك لله يا جمال يا مروان .

المواصلات كانت اكبر مشكلة بالنسبالي، بسبب المعاناة اليومية ، كرهت فيها دبي ، وإللي عايز يشتغل في دبي ، وإللي بيفكر يشتغلي في دبي ، وإللي بيساعد واحد انة يفكر يشتغل في دبي ، وإللي بيقول لواحد انة يساعد واحد انة يفكر انة يشتغلي في دبي .

دي عينة من زحمة المواصلات من نفس المنطقة إللي كنت بركب منها يوميا، علي اليوتيوب <http://www.youtube.com/watch?v=seW0YP2Bcal>

في الشركة

في اول يوم ليا في الشركة إتعرفت علي الموظفين : -

سجريد Segrid، السكرتيرة ،فلبينية بقالها في الشركة شهرين .

واردة او فاردة Varda ☺ مبرجة هندية بقالها في الشركة شهر .

أرون Arun مبرمج هندي ، أقدم موظف في الشركة ...بقالة في الشركة ٣ سنين وجابله فرصة حلوة في مكان تاني وكلم المدير إنه عاوز يمشي والمدير قاله لما يبجي حد كويس أعتمد عليه هخليك تمشي (المفروض إني هكون الشخص دا).

عامر، المدير، مصري كان مبرمج وكان شغال في حكومة دبي وحاليا مستشار تكنولوجيا معلومات في وزارة ال... بعمان وفتح الشركة دي بيتابعها من عمان و من دبي في ايام جازة الاسبوعية . بيسافر عمان جمعه ويرجع دبي الاربعاء اخر النهار . المسافة بين عمان ودبي بالطيارة ٣٥ دقيقة وبالعبية ٤ او ٥ ساعات ، يعني موضوع سهل .

دينا، اردنية مبرجة ومساعدة المدير وشريكة بنسبة ٢٠ % في الشركة. شريكه بشغلها ومجهودها لان المدير بيقدر الموظفين حسب شغلهم (علي حد قولة)، غير متزوجة، نشيطة جدا ، جميلة ، بس اكبر مني ومحدث يفهم غلط انا بشجع المنتج المصري ☺.

دخلت مع المدير في إجتماع وبدأ يعرفني علي نظام الشركة و طريقة الشغل وعملاء الشركة وسوق العمل وإنه عاوز يكبر الشركة ويجيب موظفين كتير ويفتح

أكثر من فرع وخصوصا في مصر بس متردد عشان مفيش ناس يعتمد عليها. وقالي لو إنت اثبت نفسك معايا ممكن انزلك مصر ونفتح فرع هناك وتبقي انت مدير فرع مصر ، انا هعلمك كل حاجة بنفسي وهتستفاد مني كتير. فياريت تحاول تتعلم كل حاجة اقولهالك ، انت شايف دينا بمجهودها وشغلها بقت شريكة ليا بـ ١٠% وبعد كدا زودتها لـ ٢٠% . فلو إنت إجتهد وأثبتت نفسك أكيد هيبقي ليك مستقبل كويس معايا .

وقالي انا جيت ناس كتير قبل كدا ، كان أكثر حاجة بتتعهم السكن ، كانوا ساكنين حوالي ٩ في الغرفة وبـ ١٢٠٠ درهم في الشهر وكانوا بياخدوا ٣ ساعات عشان يوصلوا الشغل فتخيل العذاب اللي كانوا فيه ودا كان بيأثر علي أداءهم وشغلهم . عشان كدا إتاجرت الشقة إللي انت قاعد فيها وفرشتها عشان انت والشباب إللي لسه هيبجوا يكونوا مرتاحين فتعرفوا تشتغلوا كويس (أسلوب معايرة يفيد كسر العين مع إن دا جزء من الإتفاق -معايلنا-) .

وبعدين قالي إنه معظم الوقت هيكون في عمان وهيتابع معايا الشغل من علي النت ولو فية اي استفسار او حاجة هتصل بيك فلأزم يكون عندك مهارات إتصالات عالية communication skills .

كلام جميل ، كلام معقول ، مقدرش اقول حاجة عنه، لكن خيال طارق المنون لسة هنشوف كتير منه 😊. شركة صغيرة الواحد ممكن يكبر فيها وبشوية مجهود يبقي شريك، او يبقي مدير فرع في مصر ويحب شوية مبرمجين ويتأمر عليهم ... انت يابني تعالي اعمل البتاعه دى... انتي يابنتي تعالي اعملي الحاجة دي

....انت ياد معملتش الحاجة دي لية...وجهك ياد...طاخ طاخ طاخ...معلش
يا معلم...قصدي معلش يا بشمهندس والله نسيت .

نسيت ??? نسيت تاكل...نسيت تعكفن علي ابوك...نسيت تستحمي في
الفسين ؟ ☺ .

احلام يقظة بتمر قدام عنيا بعد الاجتماع .انا جية في بالي حدوتة صغيرة...حلوة
قوي .

كان فبة واحد فقير لقي ١٠٠ جنية...راح اشترى بيها طقم اطباق زجاج شيك
جدا عشان يتاجر فيه وحطة جنية كدا وقعد يتخيل ..اه لو بعث الطقم دا ب
٢٠٠ جنية...وبعدين اشترى طقمين وابعهم ب ٤٠٠ جنية وبال ٤٠٠ اجيب ٤
اطقم وابعهم ب ٨٠٠ واجيب وابع واجيب لحد ما اعمل ثروة وبعدين
اشترى فيلا واجوز ويبقي عندي خدم وحشم واخلف ولد ويكبر ويدخل المدرسة
وأسالة بتعمل الواجب ولا لأ...ولو في يوم قالي معملتوش الواجب لازم اضربة
واعلمة الادب...خد ياد معملتش الواجب لية واديلة بالشلوت كدهوووووووة
وراح ضارب طقم الاطباق برجلة راح مكسره وضاعت كل احلامه ☺ . حد
فهم حاجة .

عدي اول يوم في الشغل عادي...وبعد الاجتماع ، المدير عمل حفلة صغيرة
بمناسبة قدومي عضوا جديدا في الشركة وطلب لينا بيتزا عشان يبقي عيش وبيتزا

لكن دا كلة مكنش في دماغى ولا حفلة ولا بيتزا ولا داىو ولا بيبسى، كان فيه حاجة تانية هي إللي شاغاه دماغى ، عقد العمل .

مع كل قطعة بيتزا كنت بسأل نفسي يا تري همضي العقد إنهاردة ولا لأ .

مع كل شوية كاتشب تنزل علي قطعة بيتزا كنت بسأل نفسي يا تري همضي العقد إنهاردة ولا لأ .

مع كل واحدة شاليمو بحطها في علبة كانز جديدة كنت بسأل نفسي يا تري همضي العقد إنهاردة ولا لأ 😊.

كنت منتظر إنه يكلمني عن العقد ، مهو مينفعش انا إللي اسأله عن العقد. يقول عليا إيه ، من اول يوم بيسأل عن العقد .

واا عقد ااااا

لسة مفوقتش من تأثير اول ٣ مشاكل قبلوني (أسعار المواد الغذائية - أسعار التاكسات - زحمة المواصلات مع الحر) ، إلا و ظهرتلي المشكلة الرابعة " العقد" .

سفري للإمارات كان عبارة عن زيارة مدتها شهرين، خلال الشهرين و حسب الإتفاق مع صاحب الشغل، هيخلص عقد العمل و الفيزا والإقامة بتاعتي. لكن لو الشهرين دول خلصوا ولسة الإقامة مطلعتش يبقى لازم أغادر وإلا هبقي مخالف وهدفع غرامة ١٠٠ درهم علي كل يوم ليا في البلد بعد الشهرين. موت وخراب ديار مش كدا؟.

يعني بعد ما سبت شغلي في مصر وععيش الدور وجايلك يا دبي (عندليب الدقي ٢) ، بقيت إيد في المية وإيد في النار ، تحت رحمة صاحب الشغل، ممكن بعد الشهرين ما يخلصوا او حتى قبل ما يخلصوا، يقولي سوري مش هينفع نكمل سوا ، او لازم نسيب بعض 😊 ، بالبلدي روح علي بيتك يا شاطر . فية فرق شاسع بين روح علي بيتك يا شاطر من القاهرة وبين روح علي بيتك يا شاطر من الإمارات . من القاهرة بسيطة ، مترو ب ١ جنية لعبود + ميكروباص ب ٨ جنية وابقى في بيتنا وتاني يوم ادور علي شغل . لكن روح علي بيتك يا شاطر من الإمارات يعني فشل رسمي ، رسمي إية... دا فشل دولي .

بتفكيري البسيط كنت متخيل إن صاحب الشغل اول ما هيقبلني في المطار هيروح ممصيني علي العقد خوفا إني امضي لحد تاني ، قال يعني الواد مطلوب 😊

فعلا فية ناس كثير بتبقي فاكرة إن السفر راحة... وإن المسافر هيقعد علي مكتب حاطط رجل علي رجل زي الباشا وهياخد مرتب قد كدا ويعبي الشنطة إللي مسافر بيها فلوس .

وكما قالت الشاعرة إللي ولا واحدة صدقتها "متفكروش يا بنات إن الجواز راحة ، ومتزعلوش يا بنات لو قلنا بصراحة ، إن الجواز عمره ، عمره ما كان راحة".
فأنا من واقع تجربتي إللي معداش عليها كام يوم بقول للشباب وعارف إن ولا واحد هيصدقني "متفكروش يا شباب إن السفر راحة ، ومتزعلوش يا شباب لو قلنا بصراحة ، إن السفر عمره ، عمره ما كان راحة" 😊.

عموما بلاش نتشائم واخلونا نشوف الايام الجاية هيكون فيها إية ، أكيد هتبقي أحسن إن شاء الله وأكيد المشاكل هتبدأ تتحل ، دعونا نستبشر خيرا ، دعونا نعمل في مصمت 😊.

وتتوالي الإختبارات

بدأت أتأقلم مع الشغل و الشركة و بدأت اخذ شغل بسيط في الاول عشان اكون ملم بالبرنامج إللي هشتغل عليه . كان برنامج إدارة العقارات من حركات بيع وشراء وإيجار وسداد اقساط وعقود وشيكات وحجات تانية كثير .

انا مكنتش اعرف اي حاجة عن العقارات وانا في مصر غير إعلان مدينتي واحجز شقتك وخدها بعد ٣٠ سنة ولو مت هنديها للورثة 😊 ، يعني مجال جديد بالنسبالي فكان لازم اتعلم مفاهيمة واساسياته بالإضافة للشغل إللي كان بينطلب مني اعمله .

عدي اول اسبوع علي خير والمدير سافر عمان الجمعة ورجع يوم الاربعاء بالليل وكانت الامور مستتبة والحياه فلة والحمد لله لا يشوبها إلا هاجس العقد إللي لسة متمضاش .

يوم الخميس كان عنده أكثر من إجتماع واليوم خلص من غير ما نقعد مع بعض ولا نناقش اي شىء وقالي هنتقابل الجمعة الساعة ١٠ صباحا عشان نتكلم علي رواقه واشوف شغلك واديك شغل للاسبوع الجاي . طبعاً واحد هيسأل هو يوم الجمعة مش اجازة ؟

المفروض إن الجمعة والسبت اجازة لكن عشان الظروف إللي انت جاي فيها وضغط الشغل وعشان لازم تكون ملم بالبرنامج في اقل وقت لإن آرون المسئول عن البرنامج عاوز يمشي و مقدم استقالته وإنت إللي هتمسك مكانة وهتكون مسئول عن كل حاجة ، فكان لازم تشتغل السبت .

دي كانت الاجابة النموذجية إلي كنت بسمعها لما اجيب سيرة إن السبت المفروض يكون اجازة. أما بالنسبة للجمعة فلإن المدير بييجي من عمان يوم الاربعاء بالليل وعادتا يوم الخميس بيكون عنده اجتماعات كثير مع عملاء للشركة فمبيلحش يشوف شغل الاسبوع إلي خلص ويديني شغل الاسبوع الجديد فعشان نلحق نعمل دا كلة بنروح الجمعة من الصبح لحد العصر وهو بيروح بعدها علي المطار علي طول . طبعاً دا كان إختار ليا إني هعترض علي الشغل في الإجازات ولا هسكت وأكل عيش ، وطبعاً أنا مش جاي من مصر اعمل مشاكل وأعترض وخصوصاً إني مبقتش ذو قيمة وخبرة بالنسبالة عشان اقدر اتكلم وأتناقش وأعترض .

يوم الجمعة وصلت الشركة علي ١٠ الصبح ، طبعاً الطريق فاضي والمواصلات مفيش احسن من كذا .

جدة المدير وقعدنا مع بعض وقالي هديك المرادي تاسك كبيرة شوية (اي حاجة في الشغل بنسبها تاسك Task) ، فية واحد بدأها وانت هتكملها ولازم تخلص قبل ما اجي عشان فية عميل جديد مش شرط إنها تكون في البرنامج عشان يشتريه. التاسك عبارة عن نظام العمولات العقارية ، يعني لو شركة العقارات عندها شقة وعازية تباعها وجية سمسار جاب مشتري بياخد عمولة من الشركة ولو الموظف هو إلي جاب المشتري وأقنعة إنه يشتري الشقة هياخد عمولة ولو الموظف والسمسار اشتروا في المشتري هما الاتنين حياخدوا عمولة ولو شركة العقارات مش المالك للشقة يبقى هي هتاخذ عمولة من مالك الشقة وتدي عمولة للموظف والسمسار يعني الشركة هتبقى سمسار وإلي جاب المشتري هيبقي سمسار تاني . وبعدين قالي

انا عارفك مش هتفهم حاجة دلوقتي ، هبعثلك ملف يشرحلك التاسك اول ما اوصل عمان ولو ليك اي أسئلة ابقي ابعتهاالي وانا هرد عليها .

بيني وبينكم انا تهمت وبلمت و مفهمتش حاجة اصلا ومردتش عليية ، بس رديت في سري ، اية العبط دة ، موظف اية وسمسار اية وعمولة اية هو انا لسة عرفت حاجة عن البرنامج عشان تديني شغل متوقف عليية بيع البرنامج لعميل جديد ، دا انت كدا بتحطني في وش المدفع ،منك لله يا جمال يا مروان .

خلص اليوم والمدير سافر علي عمان وبعثلي شرح التاسك ، ملف وورد مكون من صفحة واحدة مفهمتش منها اي حاجة حاجة . اية شغل السريعة دا ، الواحد في مصر كان متعود لما ياخذ تاسك جديدة يقعد مع المدير ويفصصوا التاسك وتحليل كامل علي الورق من طقطق لسلام عليكو وبعد كدا نبدأ في الشغل . وانت بعثلي شرح تاسك بالصعوبة دي في صفحة واحدة .

قرأت التاسك مرة واتنين وتلاتة وبدأت اشتغل علي إللي فهمته و اطلسم فيها كدا ولما يبقي يبجي اخر الاسبوع من عمان يقعد معايا ويشوف انا عملت اية .

دا الاسبوع الثاني ليا في الإمارات ، عدا حوالي ١٠ ايام والمفروض إني أكون مضيت العقد بقي عشان نلحق نخلص إجراءات الإقامة، سألت دينا اية هو موضوع العقد هيطول ولا اية انا بقالي ١٠ ايام هنا قائلتي المدير مستني لما يشوف شغلك !!

قتلتها يعني بعد ما اسيب شغلي في مصر واجي هنا يقول لما اشوف شغلة امال كان بعثلي تاسك في مصر لية وحسستها إني مضايق ومش مطمئن من الطريقة دي

. قالت انا هكلمة وارد عليك ، وبعد كذا كلمتني و قالت لما يبجي المدير اخر
الاسبوع هيحدد معاك كل حاجة .

طبعا هيحدد علي أساس التاسك إللي انا شغال فيها دلوقتي ، يعني لو فشلت
فيها ، يبقى أنسي ، ولو خلصتها ، يا عالم هيحصل إية .

إِنَّ غَدًا لَنَاطِرُهُ قَرِيبٌ

تاسك تفوت ولا حد يموت

المدير جيه يوم الاربعاء الصبح علي غير عادته لان كان واره شوية مواعيد و قالي هخلص الاجتماعات واقعد معاك . حاول تخلص نظام العمولات وتعمله تيست كويس Test و توريهولي عشان العميل الجديد هيشوفه بكرة الصبح.

فضلت اعمل تيست علي العمولات كلها والحمد لله كانت شغالة زي الفل وفي سري عمال اقول يارب استر ، عدي اليومين دول علي خير ، دا اول اختبار حقيقي ، يارب استر .

المدير جية علي الساعه ٥ مساءا وبدأت اشرحله الشغل وعملت كذا وكذا وخلصت كذا وكذا . قالي اوك سييلي الجهاز شوية كدا . وبدأ هو يعمل تيتست وهوووووووب البرنامج ضرب إرور Error وهووووب ولا حاجة شغالة ، انا لساني اتعقد عن الكلام ووجهي احمر وبدأت اشك في نفسي ، الحججات كانت شغالة كويس والله ، هو البرنامج بيخاف منة ولا اية .

طبعا الحججات دي بتحصل معنا كلنا ، يعني مثلا جهاز الكمبيوتر بتاعك يعطل ولما تروح بية لمركز كمبيوتر ، تلاقية شغال زي الحلاوة ، او مثلا يبقي عندك مغص شديد واول ما تروح للدكتور تلاقى نفسك زي الحصان . حد حصل معاه كدا ؟

المديرعمل حاجة انا مكنتش عامل حسابها خالص ، ضربت الشغل كلة .. اقوله والله كانت شغالة كويس يضحك بمكر ويقول ورييني ، اجي اورية مش راضي يتوري ☹ .

طبعاً هنا الاختلاف في الخبرة كـمبزنس وكإدارة وكفهم لسوق العقارات وإحتياجات العميل يختلف عن شخص لسة جاي ، عنده رهبة من كل شيء ، بيئة مختلفة ، مجال جديد ، دا غير ان التاسك نفسها غير واضحة بالشكل الجيد ، كل دا كان سبب للي حصل دا .

قلت للمدير انا مفهمتش التاسك بالشكل دا و محدش قاعد معايا يوضحلي الحاجات دي قالي مسألتنيش لية ، منا موجود علي النت طول الوقت . إنت مقرأتش الدوكيومنت Document اللي بعتهولك كويس ، إنت الكومينكيشن سكيلز ضعيفة Communication Skills... إنت قلتلي من وإنت في مصر إنك تقدر تسد وإني اقدر اعتمد عليك وقلت إن عندك كومينكيشن سكيلز عالية .. إنت ... إنت ... وادهملي مطبوظين لما بقيت حاسس إني ولا حاجة .

طارق إللي كان سنيور في مصر و إللي المدير كان بيشكر في شغله طول الوقت بقي طارق إللي ضحك علي المدير وقاله إنه كويس لحد ماجابه الإمارات . شكلي كان وحش قوي ويجد اليوم دا كان من اسوأ الايام اللي شفتها في الإمارات .

المدير قالي خلاص انا هعمل الشغل بنفسي ، قتلته لأ انا فهمت كويس وهكمل الشغل ، مهو لو كنت سبتة يكملها معناها إن بكرة الصبح علي بيتك يا بونس. يومها فضلت شغال لحد الساعة ٢ الصبح عشان اعدل البرنامج عشان هيعرض البرنامج علي العميل الساعة ١٠ الصبح . خلصنا جزء كبير منة وقالي

خلاص كفاية كدا ، انت روح نام شكلك تعبت وتعالى براحتك الصبح وابقى
كامل الشغل .

وصلت البيت ٢ ونص وعملت حسابي اصحى علي ١١ واروح علي ١٢ كدا .

تاني يوم الساعة ١٠ الصبح لقيت السكرتيرة بتتصل بيا

-Tarek ,where are you?

- on the bed , why ?

-hehe ,Sir Amr asking about you ,he asked me to call you to come

-ok ,i'll take shower and come

-ok ,dont late .babye

اووووووووووف اية القرف دة ، واية الرجل ال ... دة ، هوة مش قالي نام وتعالى
براحتك ، يا تري حصل اية تاني .

صحيت وخذت شاور ولبست ونزلت خدت التاكسي ويا دوبك ٢٥ دقيقة وكنت
هناك ،

اول حاجة قاهالي اول ما شفني ، انا مش عارف جالك نوم ازاي والشغل مش
خلصان ، كلمة أثرت فيا جدا ، بتهياي لو مكنش مصري عمرة ما كان هيقول كدا
، قال وانا كنت مبسوط إن مديري مصري . مردتش ولا بكلمة ، من عادتي
اسكت اسكت اسكت ، اعبي اعبي اعبي وبعد كدا افرغ سمي بس علي الهادي
جدا ودا إللي هيحصل بس بعدiiiiiiiiiiiiiiiiiiiiين .

طبعاً هو برده مش هيقولي كدا إلا لو كان حصل معاه حاجه ، اللي حصل انه لما راح للعميل جهازه مشغلش فاتصل علي المكتب عشان يدخل من جهازي ريموت اكسس (Remote access) بس ملقنيش في المكتب فكان منظره مش كويس قدام العميل فجيه طلعمهم عليا .

قالي قدامك لحد الساعة ٤ تخلص التاسك عشان العميل هيبجي الساعة ٥ يشوفها لو مش هتقدر تخلصها قولي عشان اتصل بالعميل ميحيش وسببهاالي وانا هبدأها من الاول وهخلصها في يوم واحد .

إية الفزلكة دي ، قلت ماشي وبدأت اشتغل وانا ماسك اعصابي بالعافية وبين اللحظة والثانية كنت عاوز اقله خلاص انا هنزل مصر .

كرهت دي والشركة والمدير واليوم اللي فكرت فيه اجي دي . دا غير الوحدة ، قاعد لوحدي في السكن ومش لاقى حد اكلم معاه وافضفضلة ، الواحد لما بيكلم مع حد بيرتاح شوية وانا صحايي كلهم ف مصر فحسيت كأني في سجن .

علي الساعة ٥ جية اتنين من شركة العميل الجديد وشافوا الشغل والحمد لله عجبهم وطلبوا بعض التعديلات. خدت ليها كام يوم كمان ..والحمد لله خلصت . يعني التاسك خدت ليها حوالي ١٠ ايام مع إن الملف اللي كان بعتهولي عشان افهمها منه واللي قالي بسببه معندكش كومينيكيشن سكيلز كان مكتوب في ورقة واحدة . حسيت ان المدير عايز الواحد يألف ويقرا اللي في دماغه ،

إبسطها يا باسط

بعد إنتهاء اول تاسك كبيرة أ خدتها وما صاحبها من تخبط ومشاكل ترتب عليها اهتزاز ثقة المدير في قدرتي علي الإمساك بزمام الامور بالسرعة الكافية .

قبل كذا كلمته عن واحد صاحبي ، مبرمج كويس وكان بدأ يدرس الموقف فعلا وسألني عليه أكثر من مرة و كنت اقله علي ضمانتي لكن بعد الموقف دا ، ممكن اقول علي جثتي لكن مظنش إني اقدر اقول علي ضمانتي 😊 .

قبل نهاية التاسك بأيام بسيطة ، دينا أخذت الاجازة السنوية بتاعتها و سافرت تتفسح في تايلاند ، يعني الحطة الحلوة في المكتب طارت ، فضلت انا وآرون الهندي وسجريد الفلبينية ووردة الهندية . عشان محدش يفهم غلط ، انا لما كنت اعوز اكلم عن العقد او اي حاجة مش عجباي ، كنت بكلم دينا لأني عارف انها بتنقل كل كلمة تتقال في المكتب للمدير بصفتها المساعدة بتاعته والمسئولة عن المكتب ودي كانت من الاسباب إللي خلته يتق فيها ثقة عمياء. فلما مشيت هكلم مين علي العقد ، آرون ؟

اي حد قرأ الموضوع من الاول لحد السطور دي هيحس إن الحياة صعبة والمواقف اصعب وممكن الكثير يكرة الشغل والسفر برة مصر ، لكن الموضوع مش كذا ، بالعكس .. الشغل والسفر له مميزات كتير مهما يكون فية مواقف صعبة .

انا بعرض الاحداث بالتسلسل زي ما حصلت بالتفصيل بغرض ان الشباب قبل ما يسافر يكون فاهم كويس إية اللي ممكن يحصله او يمر بيه فميتصدمش ويكون مهياً نفسياً .

وعشان محدش يصاب بالإحباط ، هنتكلم عن المشاكل إللي قبلتني من اول ما
سافرت وإزاي إتملت والحمد لله .

بالصدفة إكتشفت إن صديق ليا من أيام الكلية والمدينة الجماعية ، دكتور تحاليل ،
موجود في الإمارات ، اتصلت بيه واتفقنا إن يبجي يقضي معايا الخميس والجمعة
، يوم الخمس فضلت احكيه عن إللي شفته والظروف والمشاكل والاسعار
و.....و.....و.....

قالي انا عندي ليك حل لمشكلة الاسعار ، قلت إلحقني بيه ابوس إيدك ، قالي
معاك فلوس ،قلت ايوة قال خلاص بكرة هنروح مشوار وهظبطك ، بس هتتفد
إللي هقولك عليه بالحرف الواحد ،قلت ماشي وربنا يستر . وطبعا عشان انا
بشتغل الجمعة ، سبتة في البيت ورحت الشغل ورجعته علي العصر كدا .

وبعد المغرب نزلت انا وهو وخذنا تاكسي ورحنا علي مكان في الشارقة إسمه
مدينة الأغذية بجوار أنصار مول ، كان قريب من سكني لإني ساكن في النهدة .
لقيت الاسعار النص بالنسبة للسوبر ماركت . ما صدقتش نقسي ومخلتس حاجة
إلا لما جبت منها ، انا أختار وصاحبي يحط في الأكياس ، منجا ، تفاح ، موز ،
برتقال ، خيار ، بطيخ ، عنب ، خس ، بصل ، طماطم ، ليمون ، ، خربتها
وقعدت علي تلهها .

رحت علي الكاشيير عشان احاسب ، فضلت باصص للجهاز اللبي بيحصب
الاسعار ، ١٠ ، ٢٠ ، ، ١٠٠ ، ... ، ١٥٠ ، ، قلبي ، ، ٢٥٠ ،
..... ، إلحقني يا وليد ، ٣٠٠ ، ... ، ... ، منك لله يا وليد ، ... ، ٤٥٠ درهم .

كدا يا وليد ،تعمل فيا المقلب دا ، وليد صاحبي قعد يضحك وقالي ياعم هي
شكة دبوس اول الشهر ، وحجاتك تبقي ثلاثك وخلاص ، ولا كل يومين رايح
السوبر ماركت ولا حاجة . قلت طب يلا شوفلنا تاكسي ، قال تاكسي اية لسة
مجبناش الرز والزيت ، يلا علي أنصار مول ، قلت يا انهار ابيض روح يا شيخ منك
لله .

رحنا علي أنصار مول ، جنبمدينة الاغذية علي طول ، حطبنا الحجات إللي
اشتريناها في الخزانة برة ودخلنا اشترينا باقي المستلزمات ، لانشون ، جبنة فيتا،
جبنة قديمة ، فول معلبات ، لبن ، برجر ،فراخ مجمدة ، لحمة مفرومة مثلجة ، رز
، خبز ، زيت ، سفن اب ، عصير بودرة ، يلا ما هي خربانة خربانة .
وكلاكيت تاني مرة علي الكاشير ، وإدفع ياعم طارق ، وصوتي يلي منتيش غرمانه

خدنا الحجات في الترولي إللي اشتريناها من مدينة الأغذية وإللي اشتريناها من
أنصار مول ووقفنا تاكسي وفضلنا نخط الحجات في الشنطة لما اتملت ، حطينا
الباقى في الكرسي إللي ورا .وسواق التاكسي عمال يبصلنا وكأنه عاوز يضربنا .
وصلنا الشقة ، في الدور ال ١٤ ولما طلعتنا الحجات من الاصانصير ، الحجات
ملت الطرقة قدام الشقة وقبل ما نفتح الباب لقيت باب الشقة اللي قصادنا
بيتفتح وبيطلع منه بنت فلبينية كانت خارجة ، اول ما شفات الحجات قالت ،

واااا ، اوووو ماي جااااا Wow ,Oh My God

هي شافت ما لا يقل عن ٢٥ كيس متاين الطرقة أهبلت و قالت

She: Hi

Me: Hi

She: How many persons in your fla ? 2 only ?

Me: No, Only me ,he is my Friend visiting me .

She: Ouh, and all these items for you Only.

Me: Yes

She: Oh my god

Me: I don't like to make shopping too much,so I make it one time every motnth and I have big fridge, thats why

She: Ahaa, Ok, that's nice,

Me: Ya

She: See you

Me: See you

سي يو يا بنت ال يام عين

وقرأت قل اعوذ برب الفلق وقل اعوذ برب الناس ، العملية مش ناقصة حسد ،
وحسد إية مش مصري ، دا فليبي .

وليد صاحبي دحل معايا الحجات وقالى انا همشى بقى عشان إتاخرت ، قتلته
ماشي ياريس ومتشكرين علي افكارك إللى تخرب البيت . قعدت يومها ساعتين او
ساعتين ونص اظبط الحجات في الثلاجة ، بس تظبط بمزاج ، بفلوسي يا ،
علي رأي محمد صبحي . وكلة بالمستندات ومعايا السي دي ، علي رأي المستشار
،

وبكدا اكون إرتحت من اول مشكلة بتاعة الاسعار ، بقيت اشترى الحجات مرة
واحدة في اول الشهر وخلص وزى ما بيقولوا ضربة واحدة في الراس وخلص .

طبعا أنا متأكد وأكاد أجزم إن نص الناس إفتكرت إني بخيل، خصوصا لما دخلت السوبر ماركت اول ما جيت الإمارات ومطلعتش منه الا بقرازة مية ، دا إن مكنش كلكم إفتكر كدا فعلا ، مكنش العشم بردوا .

عشان كدا لم أنسي ان ألتقط بعض الصور الفوتوغرافية لهذا المشهد التاريخي الذي لم يحدث من قبل . فقد كلفني هذا المشهد من المال الكثير ومن جهدي ووقتي الثمين ما لا يمكن تعويضه (قال يعني) .

جية دور الصور والسي دي إالي عند المستشار ، أكيد كلكم عاوزين تشوفوها ، بس الاول قولوا ورايا

{قُلْ أَعُوذُ بِرَبِّ الْفَلَقِ * مِنْ شَرِّ مَا خَلَقَ * وَمِنْ شَرِّ غَاسِقٍ إِذَا وَقَبَ * وَمِنْ شَرِّ النَّفَّاثَاتِ فِي الْعُقَدِ * وَمِنْ شَرِّ حَاسِدٍ إِذَا حَسَدَ} .



دي يا اسطه

المواصلات ، وما ادراك ما المواصلات ، وزحمة المواصلات ، تقف ساعة او ساعة ونص عشان تلاقي تاكسي ، ولما تلاقي التاكسي ويقفلك وتقوله دي !! يا عالم هيرضي يوديك ولا لأ .

السواق في الشارقة مكنش بيعحب يروح دي الصبح ، لان الموضوع بييجي عليه بخسارة ، الطريق بياخد علي الاقل ساعة ويسوق كأنه سايق سلحفاة من الزحمة مع إن الطريق بياخد ٢٠ دقيقة بالكثير لو مفيش زحمة .

طبعا العداد كدا كدا بيعد سواء ماشي بسرعة او ماشي ببطء ، لكن طريقة الحساب بتختلف ، يعني لو المسافة ٤٠ كيلو ، المفروض ياخذها في ٢٠ دقيقة وتكلفتها ٣٥ درهم لو مفيش زحمة . لكن لو فية زحمة ممكن يجدها في ساعة وتكلفتها هتكون ٥٠ او ٥٥ درهم . دا غير إنة هيرجع فاضي من دي . فلو اشتغل داخل إمارة الشارقة نفسها افضله ، مفيش زحمة و ممكن يعمل في الساعة دي اكثر من مشوار فيكسب أكثر .

واحد يقولي طب هو السواق هيخسرية لو الطريق خد ساعة او اكثر ، معظم السواقين بيكون مراتبتهم حسب نسبة الدخل . وغالبا بتكون ٣٠ % لو دخل في الشهر ١٠ الف درهم او اكثر ، لو اقل من ١٠ الاف درهم بيكون مرتبه ٢٥ % ، فلابزم السواق يبذل مجهود جبار عشان يعدي ال ١٠ الاف درهم في الشهر .

واحد تاني هيسأل ويقول ، طب لية ميحملش زبون وهو راجع من دبي ، اقولة لان قوانين الامارات بتمنع إن التاكسي ياخذ زبون من إمارة غير الإمارة بتاعته وهو راجع ، يعني لو التاكسي من الشارقة ورايح دبي ، لازم يرجع من دبي فاضي ، ميحملش الا من الشارقة وبس . لو التاكسي من دبي ورايح الشارقة ، لازم يرجع من الشارقة فاضي وإلا ياخذ مخالفة ٥٠٠ درهم .

تخيل نفسك واقف ساعة في عز الحر و مش لاقى تاكسي وكل شوية يعدي عليك تاكس فاضي رايح المكان إللي انت عاوز تروحه (دبي) بس ميقدرش ياخذك عشان هو تاكسي دبي وانت واقف في الشارقة فلازم تركب تاكسي الشارقة .

مشكلة المواصلات مرت معايا بمراحل :-

- المرحلة الاولى كانت الوقوف وانتظار التاكسيات
- المرحلة الثانية كانت الركوب مع بعض الاشخاص إللي بيكونوا راجحين دبي ويصعب عليهم وقفتي في الشمس ومشاورتي للتاكسيات ، فيسالوني رايح فين ، وإللي بيكون طريقة زي طريقي بيخديني معاة او يخديني لاول دبي ومنها اركب تاكسي لمكان شغلي .
- المرحلة الثالثة ، كانت عربية بتقف تسألني رايح فين ، اقول رايح المكان الفلاني ، يقولي هوديك بس اخذ مبلغ معين ، تقريبا بيكون نفس اجرة التاكسي ، او زيادة ١٠ درهم ، علي حسب . العربية بتكون ملاكي مش أجرة ، بس صحبها بيعمل سبوبة علي الصبح يعني . اتعرفت علي

أكثر من واحد وكنت بتصل بيهم لو حد فاضي او قريب من المكان إللي
انا فيه بيجيلي ويوديني .

طبعا دا كلة وانا رايع الشغل ، إنما وانا راجع ، فكنت بتأخر في الشغل
زي مانتوا عارفين فمكنتش بتأخر كثير عشان الاقي تاكسي ، وفي بعض
الاحيان بكنت بتصل علي شركة دبي تاكسي ، واديهما العنوان وهي
تبعثلي تاكسي ، شغل جي بي اس وحجات حلوة كدا . كانت بداية
العداد بتكون اغلي ٤ درهم لو طلبت التاكسي من الشركة .

- المرحلة الرابعة ، أتفقت مع واحد من اللي عرفتهم يوديني الشغل ويجيني
بعد الشغل كل يوم وياخد ف الشهر ٩٠٠ درهم كل اسوع ٢٥٠ درهم
ودي إسمها كار ليفت (Care Lift) . ناس كثير كانت بتقولي دا مبلغ
كبير علي الكار ليفت ، لكن بالنسبالي كانت ارحم بكثير ، لاني لقيتة
بعد ٣ اسابيع من العذاب مع التاكسيات ، ومش هتصدقوا لو قلتلكم
صرفت في ال ٣ اسابيع دول أكثر من ١٧٠٠ درهم . وبالتالي ال ٩٠٠
درهم في الشهر رحمة علي الاقل مش هنتظر كل يوم ساعة عشان الاقي
تاكسي .

الراجل دا كان باكستاني وكان عايش قصة حب ، عمرة ما وداني او
جاني الا لما يكون بيتكلم في التليفون ، طول الطريق حاطط السماعة
ونازل رغي وطبعا انا مش فاهم حاجة ، بيتكلم أوردوا ، زي الافلام
الهندي كدا ، لكن كنت بفهم حاجة واحدة ، صوت القبله كان بيخرق
وادني ويصحيني من النوم ، كان لما يحس إني نايم بيستغل الظروف ويبيع

قبلاات حارة في التليفون ، يابن الذين ، مز ياعم براحتك ، مين قدك ،
ناس تمز وناس تكع .

لكن تأتي الرياح بما لا تشتهي السفن ، بدأت مواعيد الراجل تبوظ ، يوم
يتأخر ويخليني استنائة اكثر من نص ساعة ، اتصل بية يقولي ٥ دقائق
وجايلك ، وخمسة في خمسة في خمسة الاقيني منتظر يبجي نص ساعة .
والامر زاذ لدرجة ان فية ايام مبيجيش ، ارن عليه ميردش مرة واتنين ،
اعرف إنه مش جاي ، اروح مدور علي تاكسي ، والاقية جاي يخديني
ويعتذر ، كان عندي ظروف مش عارف اية ، وظروف مش عارف اية .
قتلتة اي يوم هتغيبه هخصمة منك وبالفعل ، اخر الاسبوع رحنت خاصم
منة الايام إلي نفضلي فيها . إضايق جدا وراح عامل فيا مقلب طلع من
عيني .

بعد ما دفعت لروميو السواق فلوس الاسبوع ناقصة الايام إلي غابها ، التزم معايا
الاسبوع إلي بعدة ، قلت في نفسي ايوه كدا ، العقاب يبجيب فايده ولما خلص
الإسبوع و جيت ادفعله فلوس الاسبوع ، قالي معلش انا هشتري عربية جديدة
ومحتاج فلوس فلو ممكن اخذ فلوس الاسبوع الجاي دلوقتي ، قلت مفيش مشكلة
ودفعتله فلوس الاسبوع مقدم .

طبعا انا مدتش خوانة ، وبالفعل تاني يوم جية وصلني عادي ، لكن تالت يوم
فضلت مستنية مجاش ، ارن عليه مبيردش ، قلت هو رجع تاني للحركات دي ،

يعني لازم اخصم منة ثاني ، مبيحرمش.ولا هو عشان خد فلوس الاسبوع مقدم
يبقي خلاص ، طب يصبر عليا الاسبوع الجاي . ورحت اشوفلي تاكسي يوصلني
للسغل ، هعمل إية .

اتصلت بيه بالليل عشان يبجي يخذني من دبي مردش خالص ، الله ، إية اللي
حصل ، الواد مات ولا إية ، اتصل من تليفوني ، من تليفون المكتب ، تليفونه يرن
ومحدهش يرد ، قلت خلاص كدا مش هيبجي ، توكلنا علي الله ورحت متصل علي
خدمة التاكسي عشان بيعتولي واحد ، هي خرابانة خرابانة .

ثاني يوم الصبح ، الواد مجاش ، اية دا بقي ، دا استهبال ، اتصل علي الموبيل ،
مغلق ، هي حصلت ، دا كد فيها إنة ، وعشان متفضلوش تتصلوا معايا كتير كل
يوم ، هقولكم الحقيقة المرة ، الواد اخذ الناقة وشرخ ، خد فلوس الاسبوع مقدم
وهرب وفضلت كذا يوم اتصل بية مبيردش .

كدا يا روميو ، تسرقني و تسبني ، هونت عليك ، دا انا غلبان ، ورجعت ربما
لعدتها القديمة... تاكسيات ثاني وإنتظار ثاني ، فينك يا روميو ، طب ارجع
ومعنتش هخصم منك ، طب ارجع ومش عاوز فلوس الاسبوع إللي أخذتها . يلا
الحمد لله وعسي أن تكرهوا شيئا وهو خيرا لكم .

في الفترة دي وبعد ما روميو هرب ، حصلي شوية مواقف هذكر منها موقفين علي
سبيل المثال لا الحصر .

الموقف الاول ، كان الصبح ، وكنت رايح لعميل في عجمان ، واي تاكسي لو
قتلته عجمان مبيقش لأ ، لان الطريق كويس مش زحمة زي دبي ، لمحت تاكسي

فاضي ماشي في صف زحمة شوية عشان يعمل يوترن او دوران ويرجع ، المسافة حوالي ٣٠ متر ، بس فيها حوالي ٢٠ دقيقة عشان يعمل الدوران دا فقلت بدل ما اروح اركب التاكسي والعداد يعد عليا ال ٢٠ دقيقة دول ، ما استناه الناحية الثانية ، ومفيش حد واقف غيري ، فضلت مستني ، مستني ، مستني ، مستني لحد ما جية الناحية الثانية ولقيتة بيركن قبل ما يوصلني ، روحته وقلتة عجمان ؟ قالي لا سوري الشيفت خلص ، الحين يسير نوم ، قلت نعم ؟ تنام ما تقوم يا بعيد بقي انا مستني بقالي ٢٠ دقيقة في الجو النار دا وبعدين تقولي الشيفت خلص . شيفت إية إللي انت جاي تقول عليه.

الموقف الثاني ، كان في دبي ، طبعاً زي ما فية زحمة مواصلات في الشارقة الصباح ، فية زحمة مواصلات في دبي بالليل ، الناس اللي بتعمل زحمة في الشارقة الصباح ، شكلهم هما اللي بيعملوا زحمة في دبي بالليل . فاكرين التاسك بتاعة العمولات ، والعمل اللي طلبها ، كان عندي إجتماع هناك عشان اشرح ليهم البرنامج وانزله علي الاجهزة كنسخة تجريبية اسبوع .

العمل دا في دبي في شارع اسمه شارع البنوك ، عشان فية بنوك كثير ، خلصت من عند العمل علي ٦ ونص المغرب ، طلعت من عنده ادور علي تاكسي ، ولا الهوا ، ملمحتش ولا تاكسي ، لقيت ناس ماشية ، قلت يمكن فية محطة قدام ، مشيت وراهم .

كان يوم خميس وكنت صايم ، المغرب اذن ، دخلت سوبر ماركت قلت اجيب بتاعة ببسي اشربها لما اروح ، كلها نص ساعة واكون في البيت .

خرجت من السوبرماركت ومشيت شوية وبعدين وقفت استني تاكسي وجيت افتح الكانز ، الفتاحة بتاعتها اتكسرت ، يادي النيللة ولا عارف اشرب منها ولا قادر ارجع للسوبر ماركت تاني ، الواحد صايم وهفتان ، بقيت اشرب كأني بشرب من شاليمو من غير شاليمو . كان شكلي عامل زي الشحاتين صراحة ههههه .

لما مجاش تاكسي في الحطة إلي انا واقف فيها ، مشيت شوية ، وفضلت علي كدا ، اقف شوية وامشي شوية ، تاكسي يبجي وانا واقف ياخذ بنت تكون واقفة ، قدام شوية وتكون جاية بعدي بفترة ويمشي ، اروح اقف في المكان اللي هي كانت واقفة فيه ، تبجي واحدة تانية تقف بعدي وبعد شوية يبجي تاكسي وياخذها ويمشي ، اية يا ولاد ال ... هنلعب قط وفار بقي ؟.

امشي كمان شوية الاقي إشارة وواقف فيها تاكسي اجري علية ، تكون الإشارة فتحت والتاكسي يمشي ، مينفعش يقف والاشارة مفتوحة ، يا إشارة يا بنت ال . يارب تاكسي ، يارب تاكسي ، فضلتي علي النظام دا ، من ٦ ونص مساء لحد ٩ ونص مساء ، ولك ان تتخيل صعوبة الموقف من اصوات التلاكسات و الاضواء والمشي والوقوف والمناظر اللي ماشية علي الارض ☺ ، جالي يومها صداع فظيع من كل الحججات دى .

علي الساعة ٩:٣٠ مساء ، وقف تاكسي بعد مني بشوية رحتي طالع جري وراكب قدام ، وراح اتنين بنات من جنوب افريقيا راكبين ورا ، وحت واحدة رابعة هندية تتخانق معاهم وتقول أنا إلي وقفتي التاكسي ، وهما يقولوا إحنا اركبنا الاول

والسواق يقول مليش دعوة ، أنا اقف و إللي يركب الاول ، وبعدين امشي ، دا
كلمة بالانجليزي ، وانا ولا كلمة ، فاصل شحن .

البننت الهندية تقول لهم انتوا مش محترمين ، أنا اللي موقففة التاكسي
الافريقية ، دي مواصلات عاملة واحنا واقفين من زمان والتاكسي مش وقف
قدامك .

الهندية : بس انا اللي شورتله عشان كدا وقف

الافريقية : واجنا اللي ركبنا ومش نازلين

انا : خخخخخخخخخخخخ ولا كآني هنا

راحت البننت الهندية قافلة الباب بقوة وهممتم بكلام غير مفهوم ، بس شكلة
كدا كانت بتدعي إن التاكسي يولع بينا او يعمل حادثة 😊 .

وبدأ التاكسي يتحرك ، والبنات بتوع جنبو افريقيا فضلوا يضحكوا ، ويشتموا في
الهندية ، Studpied Indian girl .

السواق بعد ما تحرك سأل رايحين فين ، ردت عليه واحدة منهم راحين المكان
الفلاقي، وانا متكلمتمش خالص والسواق فاكرني معاهم بس انا مش معاهم 😊 ،
وبعد شوية اكتشفوا إن فية كائن غريب راكب قدام ، واحدة منهم راحت مقربة
مني وسألتنى

She : My friend ,where are you going ?

Me : Anywhere

She : Oh ,you do not have place to sleep ? !!

Me : No No ,I have but I can not find a taxi ,so after you reach your place I will start .

فاكرين فيلم عادل إمام لما اجوز واحدة امريكية عشان الجنسية في فيلم بخيت وعديلة ، هي كانت شبها كأنهم إخوت ، بس دول اتنين مش واحدة ، وهي بتقولي معندكش مكان تنام فيه ، حسيت إني هضيع يا وديبييع ، بس الحمد لله كان معنا السواق .

بعد ما نزلوا ، وحاسبوا التاكسي ، السواق صفر العداد ، وبدأت انا رحلتي وانطلق بينا علي البيت والحمد لله وصلت ، واستليقت علي السرير وكأني طالع من مغامرة عقلة الاصبع او كابوس .

تاني يوم الجمعة بحكي للمدير إللي حصل ، قعد يضحك وقالي مفيش حاجة هنا بالساهل ، قلت فعلا ، الغربة مش سهلة ، كفاية البهدلة إللي فيها .

كرهت العمل دا مع إني هروحله تاني يوم الاتنين عشان اشوف لو محتاجين اي شيء ، بس هعمل إية ، الشغل شغل ولازم اروح ، المهم رحت يوم الاتنين وقعدت مع الشخص المسئول هناك عن البرنامج ، واحنا بندردش قتللة علي إللي حصلي المرة إللي فاتت وعلي مشكلة المواصلات ، قالي انا كمان كان بيحصلي كدا لاني كنت ساكن في الشارقة بس لقيت كار ليفت Car Lift كويس كان بيوديني ويجييني ، لحد ما طلعت رخصة ودلوقتي معايا سيارة ، قتلله طيب ما تديني رقم الكارليفت دا ، راح مديني رقم واحد وقال دا بيروح المنطقة إللي انت ساكن فيها ، قتللة خلاص هكلمه واشوف وخلصت عندهم علي الضهر ورجعت علي الشركة .

اول ما وصلت الشركة رحمت متصل علي الكار ليفت ، لقيته بيتكلم عربي مكسر ، قتلته انا ساكن في الشارقة ، في النهدة ، وشكلي في الجرهود في دبي وعاوزك توصلني كل يوم ، قالي ما في مشكلة ، قتلته كام بياخد ، قالي نفر واحد ٥٠٠ درهم ، قلت يا فرج الله ، فينك من بدري ، احبك انا ، قتلته اوك موافق ، قالي امتي يبجي اليوم ولا بكرة ، قتلته يا سلام هتعرف تيجي تحديني اليوم ، قالي ما في مشكلة ، كام رقم تليفون إنت ، إديته الرقم ، قالي هرن عليك الساعة ٦ وخمسة ، إنت ينزل تحت بناية قتلته اوك .

رن عليا الساعة ٦ وخمسة ، نزلت جري ، بس انا مش عارف شكله ، والعربيات كتير ، والبنات كتير ، اجانب ، ولبناني ، ومغربي ، طب هبص علي مين ، علي السواق ولا علي ال ، محدش يفهمني غلط ، قصدي علي السواق ولا علي العربيات .

اتصلت بية ، وين إنت قال انا جدام جدام ، انت وين ، قتلته وانا قدام قدام ، لقيت واحد بيشاورلي ، طارق جلي جلي ، قتلته حاضر حاضر . جلي جلي ، يعني بسرعة بس بالهندي .

انا كنت عمال ابص علي العربيات الملاكي ، مفكر إن دا واحد زي روميو كدا ، طلع باص بياخد حوالي ٢٠ شخص من الشارقة لديي كل يوم ، الموضوع طلع كبير ، شركة كاملة ليها باصات وبتشتغل في موضوع الكار ليفت دا ، تتفق مع ١٥ او ٢٠ شخص يكونوا في نفس المكان وتوديهم وتجههم .

قلت مفيش احسن من كدا ، دا بقي ولا هينفض يوم ، ولا هياخذ الفلوس ويهرب . الحمد لله كنت مبسوط لدرجة إني مش مصدق ان هرتاح من مشكلة التاكسيات خلاص وخصوصا بعد موضوع انت معندكش مكان تنام فية دا 😊 . فعلا وعسي أن تكرهوا شيئا وهو خيرا لكم ، لو روميو دا مكش هرب ، مكنتش اتعرفت علي بهرام .

سواق الباص كان اسمه بهرام ، باكستاني بس بيعرف عربي مكسر ، بيتصل علي كل واحد قبل ٢٠ دقيقة من المكان إللي هياخده منة . فية أكثر من مكان زي نقطة تجمع كدا ، والناس بتقف فيهم يستنوه لكن في دبي بيوصل كل واحد لمكان شغله . كان بيتحرك من المنطقة بتاعتي الساعة ٧:٢٠ صباحا ، وكان بيرن عليا الساعه ٧:٠٠ ، المفروض إني اكون لابس وجاهز ومستنية ير ، اروح نازل لأني بتمشي حوالي ١٠ دقائق لحد نقطة التجمع . فكنت اصحي حوالي ٦:٢٥ دقيقة ، يا دوبك عشان أخذ شااور وألبس و افطر تكون جت ٧:٠٠ بالضبط .

ضربت معاه صحوية وكنت بجيبيله شيكولاتة وكراملة من إللي كنت وخدمهم معايا من مصر ، وكان دايمًا يقولي ، شكرا صديق ، انت نفرا وايد زين ، يعني شخص كويس جدا ، أكيد يعني مش بديله كراملة ملوكي 😊 .

الصحوية دي كانت مظبطاني ، لأني اوقات كنت بتاخر فكان بيتصل بيا اقولة ٥ دقيقة ويستتاني ومكش بيعمل كدا مع حد ، فكنت بحس في عيون اللي معايا ف الاتوبس غل وحقد كدا وكأنهم عايزين يضربوني .

مرة رن عليا وكنت لسة نايم ، وفي لحظة صحيت وخذت شاور ولبست ونزلت
ويومها استناني يبجي ٢٠ دقيقة ودا عمرها ما تحصل مع حد ، حسيت وانا بركب
الباص ، مجموعة كبيرة من ال (اوووووف) بتتحذف علي قفايا .

في يوم كنت بدردش معاة وسالي كثير عن مصر وأنة بيحبها قتلته تعالي اجوزك
من مصر قال لالالالا

بهرام : كثير مشكلة واجد

انا : لية مشكلة واجد ؟

بهرام : حرمة كثير فلوس يريد عشان نكاح

انا : كيف كثير ، ما في فلوس حرمة ياخذ

بهرام : كيف ، وايد ياخذ ، شو ذهب كثير ، شو شقة كبير ، شو ااثا كثير ،

مين فلوس شباب يجيب ، واجد مشكلة ، واجد ، انت فية زوجة ؟

انا : لا ما فية زوجة ، فشل واجد ههههه

بهرام : الله كريم صديق ، بكرة يحصل واحد زين .

انا ممسكتش نفسي من الضحك ، معظم الباكستانيين مبيتكلموش عربي ، الا
قليل بيقوا متعلمينه في دي فتلاقي العربي بتاعهم مكسر و حلو كدا ، تحس بمنعه
وانت بتكلمهم .

وطبعا الغرض من الكلام دا ، رسالة شديدة اللهجة للبنات ، "حرمة كثير فلوس يريد " ، خفوا علي الشباب شوية ، ارحموا من في الارض يرحمكم من في السماء . ☺

وبكدا يبقى تاني مشكلة إتخلت والحمد لله ، الموصلات ، تكلفة معقولة ، موصلات ثابتة ومنتظمة ، دا غير اني مبقتش أتأخر في الشغل ، لان فية موصلات هنتحرك الساعة ٦:٠٠ ولو هتأخر ، الشركة هتدفعلي حق التاكسي .
معلومات إضافية :-

- تعتبر مشكلة الموصلات في دبي إتخلت بنسبة كبيرة مع إفتتاح مترو دبي ، يوم ٢٠٠٩،٠٩،٠٩ الساعة ٠٩:٠٩:٠٩ مساء ، توقيت لا ينسي في تاريخ دبي ، معظم الناس بقت تستخدم المترو ، وبالتالي التاكسيات بقت متاحة أكثر .

- هيئة تنظيم الموصلات اصدرت قرار بزيادة تعريفه فتح العداد من الشارقة لدي او العكس من ٢,٥ درهم ل ٢٠ درهم ، يعني لو تاكسي رايح من الشارقة دبي ، العديد بيفتح علي ٢٠ درهم ، دا شجع سواقين الشارقة إنهم يروحوا دبي في اي وقت ، وشجع المطحونين يدوروا علي طرق تانية يروحوا بيها دبي .

- الطريقة الاسهل لمعظم الناس إليي معندهاش كار ليفت بعد موضوع ال ٢٠ درهم تعريفه ، إنه بياخذ تاكسي يروح بية محطة الاتوبيسات ، ومنها

يركب دبي اتوبيس دبي ب ٥ درهم ومن محطة الاتوبيسات في دبي ياخذ
تاكسي لمكان شغلة (ودي مكنتش اعرفها لاني كنت جديد) .
بس خلاص .

طيرانت

يقولوا الحب و الزواج قسمة ونصيب ، زي ما الشغل قسمة ونصيب ، يعني ممكن الواحد يفضل يحب في وظيفة سنة او سنتين (قصدي بنت) وميحصل نصيب بعد ما يعدي الانترفيو (قصدي يقابل أهلها) وييكون مستني اتصال من الشركة (قصدي ابوها) يقوله تعالي استلم الوظيفة او هو إللي يتصل بعد اسبوعين لما محدش يعبره وبعدين الشركة تقوله مفيش نصيب .

او ممكن الواحد بيعت السي في لشركة ومن غير انترفيو يقولوله معندناش وظائف خالية ، زي ما الواحد بيعت ناس عشان يخطبلوا واحدة ويكون الرد معندناش بنات للزواج او مش هنتجوز دلوقتي .

او ممكن الواحد يقدم في شركة ويقبلوه وهما عارفين إنه لسة مدخلش الجيش ، بس عشان مؤهلاته حلوة وموافق علي كل شروطهم يوافقوا عليه ويقولوله إنك حتى لو دخلت الجيش هنستناك وعمرنا ما هنستغني عنك لكن اول ما يستدعوه في الجيش ، فية شركات محترمة بتفضل عند كلمتها ويفضل له مكان لحد ما يخلص الجيش وفية شركات محترمة تانية بتقوله ، اسفين منعطلكش .

او ممكن الواحد يقدم في شركة ويقبلوه عشان محدش غيره اتقدم للوظيفة دي او خافين إن محدش تاني يتقدم ليها لكن لو اتقدم حد افضل منه بيعوه في لحظة .

او ممكن الواحد يعمل انترفيو وينجح فيها ويشتغل وبعدين ميحسش إن دي الوظيفة المناسبة فيسبها ، زي ما الواحد يتقدم لوحده ويقعد معها كام مرة وبعد كدا يحس أنهم مش متفاهمين .

او ممكن الواحد بعد ما يشتغل سنة او سنتين ويبقى عنده خبرة ، يبدأ يدور علي شغل وقت إضافي او بارت تيم عشان يزود الدخل بس لو المدير مش هيرحمه ، مش هقول زي الزواج عشان محدش يفهمني غلط 😊 .

او ممكن بعد كام سنة شغل في شركة ، يتنقل لشركة ثانية بمرتب ومركز أحسن زي ناس كتير اول ما ربنا يفتحها عليهم، يغيروا البيت وإللي في البيت عشان المستوي الإجتماعي الجديد معدش يسمح .

حد فاهم حاجة ، أكيد لأ ، دي إستعارات مكينة حيث شبة الوظيفة بالعروسة او البنت او الزوجة 😊 .

إحنا خلصنا من مشكلة المواصلات ، ومشكلة الاكل والأسعار ، لسة مشكلة العقد . الايام بتمر والزيارة هتخلص طب وبعدين ،اعمل إية اجيب ورد واقعد اقطع بيحي مبيحبنيش ، قصدي هيمضي العقد مهيمضيش ، ولا استني لما الزيارة تخلص وبعثها يقولي شكرا أخ طارق ، مصر محتجالك أكثر من دي .

انا قعدت مع نفسي افكر وقلت لو سألتنه انا همضي العقد إمتي ممكن يقولي بعدين او ممكن يرد رد مش كويس او ممكن يقولي ان مستواك كان وحش الفترة إللي فاتت وانا لسة مش متأكد منك ، وفي كل الحالات دي مش همضي العقد لان موقفي ضعيف ومش هقدر ارد سعتها وأنا اصلا مبيحبش ألح في الطلب او اطلب الحاجة أكثر من مرة ، طيب تعمل إية يا طارق ؟ تعمل إية يا طارق ؟ الجيش قالك إتصرف صح ؟

قلت لنفسي فلنفرض إن وظيفتك دي هي البنت إللي بتحبها وإنت عاوز أبوها
(المدير) يوافق عليك تعمل إية ؟

- أتجوزها عرفي وأحطه قدام الامر الواقع ... استغفر الله العظيم دا هيبقي الامر
الوقح مش الواقع

- طب أطلع عليها إشاعات عشان ابوها يحس ان مفيش حد هيتقدم لها غيري
فبيوس إيدي عشان اوافق اتجوزها - إية ياعم الافكار الوحشة دي 😊.

فاكرين فيلم " وش إجرام " لما هريدي هنيدي (طة) كان عاوز يطفش الواد بتاع
كمال الاجسام إللي كان جاي يخطب البنت إللي بيحبها (رحاب) ، لما "بوحسن
جيه متأخر 😊 "

انا قلت مفيش غير الحل دا " ابوها يحس ان مفيش حد هيتقدم لها غيري
فبيوس إيدي عشان اوافق اتجوزها "

لو تفتكروا اول ما اشتغلت واتكلمت علي الناس إللي في الشركة وقلت إن فية
واحد هندي اسمه آرون وإنه عايز يسبب الشركة بس المدير قاله اصبر شوية لما
اجيب شخص يمك الشغل بتاعك و المفروض الشخص دا بيبقي أنا . انا قلت
في عقل بالي لو آرون ساب الشركة ...المدير عمره ما هيفكر يمشي لان مش
هيبقي فية غيري ، هو دا كان الكارت إللي لازم العب بية " ارووون ، طير إنت "

قربت من آرون وبدات ادردش معاه ، عشان اعرف هو عايز يمشي لية واعرف
عيوب الشركة عشان ابقي واخذ بالي من إللي هيحصلي ومنها ازن عليه عشان

يسيب الشركة والزن علي الودان اشد من السحر .
قالي انه جايله عرض ب ١٠ الاف درهم وانه كلم المدير اكثر من مرة عشان يمشي
وكل مرة يطلعه بحجة مرة يقوله استني لما اجيب حد ومرة يقوله حللي المشاكلي
اللي في البرنامج الاول ومرة يقوله اول الشهر الجاي لما طارق يشد حيلة ويفهم
البرنامج كويس وهكذا....

آرون كان مشتت الفكر بين الشركة والمشاكل إللي عاوز يخلصها في البرنامج وبين
العرض إللي هيصبع منه لو فضل المدير يأجل الموافقة علي إنة يمشي . ودا كان
بياثر علي شغله فكان لما يحل مشكلة يحصل مشكلة تانية ودا كان مضايق المدير
جدا لانه حاسس إن آرون قاصد يعمل كدا عشان يمشي ودا بيخليه يعاند أكثر
ويقوله مش هتمشي وكان بيعاقبه و يخصم من مرتبة . والحقيقية انه كان بيشتغل
كثير ويروح للعملاء ويعطي تدريب وبعدين يشتغل برمجة وكان مرتبة ٤٠٠٠
درهم وملوش سكن ولا اي حاجة . يعني من الاخر كان المدير مستغله أسوء
إستغلال .

بدات اتكلم معاه وقتله إنت إللي عملت في نفسك كدا ، انت اللي مبتطلبش
بحق كويس وبتسكت لما يخصم منك وبتخليه يزعلك ، انت طلبت تسيب الشركة
من زمان ولما يقولك اصبر شوية بتصبر ، لكن لو جيت قتلته انا ماشي اول الشهر
وخلاص بلا تردد ولا رجعة ، مش هيقدر يتحكم فيك ولو قعدت هيبقي منك
مش أمر منه .وعلي فكرة انا مرتي اكثر من مرتبك دا غير إن سكاني علي الشركة
ودا عشان قبل ما أجي كان شرطي إن السكن يكون علي الشركة ، أنا قاعد

وطبعا انا كنت فرحاً جداً ، تسخيني جية علي فايدة ، وآرون مشي وخذ حقة
كمان والمكان فضيلي .

لكن دائما الجزاء من جنس العمل ، بعديها شوفت اللي مكنتش عامل حسابة
ولا جية في بالي إنه هيحصل ، وفضلت اقول يا ريتني مكنت سخنتك يا آرون ،
يا ريتني مكنت قتلتك " طير إنت " .

وجهات نظر

صوابك مش زي بعضها ، زي ما فية ناس هتوافقك علي رأيك ، ناس هتختلف معاك فية وزى الحكمة ما بتقول : لولا إختلاف الآراء لبارت السلعة .

عارف ان فية ناس إختلفت معايا من موقف آرون " طير إنت " وفية ناس متفقة معايا في إللي حصل . كلها وجهات نظر وعشان نحكم علي موضوع لازم نشوفه من زوايا مختلفة ، عشان كدا هناخد موضوع آرون من كل الزوايا إللي في الشركة . آرون شغال في الشركة من ٣ سنوات ويعتبر من مؤسسي البرنامج إللي المفروض أنا هشتغل عليه وابقي مسئول عنه بعد كدا ، البرنامج دا لإدارة المؤسسات او الشركات العقارية .

هو والمدير (صاحب الشركة) كانوا بيشتغلوا فية كبرجة وتصميم وكل شىء وكان بيعجي ناس بسميكمملوش شهر او شهرين ، يا إما شغلهم مش كويس او مبيعجبوش المدير .

زي ما قلنا قبل كدا المدير كان شغال في عمان وكان بيرجع اخر الاسبوع عشان يتابع ويراجع الشغل مع آرون . وكان بيراجع كل حاجة ، الموضوع في الاول كان لسة صغير لكن لما الشركة كبرت شوية والبرنامج بدأ يتباع لشركة واتنين وخمسة وعشرة وبدا فية دخل كويس ، المدير فتح فرع في عمان و بدأ يسبب حجات كتير في الشغل لآرون بدون ما يرجعها ودا عشان ضيق الوقت وكثرة المهام سواء في دبي او في عمان .

آرون كانت امكانياته محدودة ، المدير قالي كدا وآرون نفسه قالي انه من ساعة ما

دخل الامارات وهو مفتحتش كتاب ولا زود معلوماته عشان مفيش وقت والشغل واخذ كل وقته . وبالتالي مفيش تحديث وتأقلم مع كل ما هو جديد في تكنولوجيا المعلومات.

آرون كان طيب وغلبان ، والمدير كان بيستغل النقطة دي وكان بيشغله كثير حتى معظم ايام الجمعة وكان بيتاخر في الشركة لمنتصف الليل .

ودينا كانت نفس النظام ، بتشتغل كثير ، كانت بتروح الساعة ٨ مساء ، واول ما توصل البيت ، تفتح اللاب توب وهاتك يا شغل والمدير دخلها شريكة له في الشركة بمجهودها وطبعاً دا كان ذكاء شديد منه لانها فعلاً كانت شايلة الشركة ، هي اللي بتقابل العملاء وتخلص احتياجات الشركة طوال الاسبوع دا غير إنها بتنتقل دبة النملة في الشركة . لو طارق خرج ١٠ دقائق، المدير بيعرف ☹ .

عيب آرون إنة مبيركزش ، يعني ممكن يحل مشكلة فيسبب مشكلة ثانية ولأن المدير معدش بيراجع الشغل قبل ما يروح للعميل ، الدنيا بتبوظ عند العميل ، فلازم آرون يروح للعميل بسرعة عشان يصلح المشكلة، تكون ظهرت عند عميل تاني يروح يحلها وهكذا دواليك .

آرون قالي انه اشتغل بعد دينا ب ٦ شهور وهما الاتنين بدأوا بمرتب متقارب لكن هي دلوقتي بتاخذ ٩ الاف درهم وشريكة في الشركة لكن انا باخذ ٤ الاف درهم ومرمطون في الشركة .

المدير بياخذ دينا معاه في اي اجتماع او اي مقابلة مع شركة ثانية وعلي طول يقولي يا ريتك نص دينا ، دينا بتشتغل في الشركة واول ما بتروح بتشتغل من البيت ويوم الجمعة كمان بتشتغل من غير ما اقولها ، بتشتغل من نفسها لانها

. بتحب الشغل .

هو عاوزني ابقى زيتها لكن انا مش زيتها انا بشر عايز اشتغل وعايز اخرج اتفسح وعايز اقعد مع صحابي واعييش حياتي . الحياة مش شغل وبس ، لكن هما حياتهم كلها شغل .. دا كلة علي لسان آرون ..
قلتة يا ضنايا يابني .. كمل كمل 😊 ..

قالي انا لو غلظت اي غلظة في البرنامج بيخصم مني ولو اتأخرت بيخصم مني وعمره ما خصم من دينا حاجة ، الاجازة اللي فاتت كان ليا عمولة ٥ الاف درهم وقالي لما ترجع هتخداهم وبعد ما سفرت باسبوعين اتصل بيا وقالي تعالي عشان فية شغل كتير ومتعطل . جيت علي طول ومدنيش بدل اجازتي إلي اتقطعت وكمان مدنيش عمولتي .

قلت يا انهار ابيض ... فينا من كدا؟؟؟ الا الفلوس ، انا ممكن اسكت عن أي حاجة إلا فلوسي .

قال انا جايلي عرض من شركة ب ١٠ الاف درهم ، شركة كبيرة ومدة العرض شهرين عشان اروح ليهم . وقلت للمدير وقالي هجيب واحد تدرية وبعدين امشي ، يعني بعد شهرين هتمشي

عدي ٣ شهور كل لما اقله عاوز امشي يقول مش لاقى حد يبجي مكانك ولما انت جيت قالي هتمشي بعد شهر ، قلتله ابقى قبلي ، عدي ٣ اسابيع وانا لسة معرفتش ربع البرنامج

وجهة نظر المدير :-

المدير كان دائما يقولي آرون دا اغبي واحد شفته في حياتي ، كل العملاء بيشتكوا منه ، العملاء دلوقتي بيخافوا من اي تعديل نعملوا في البرنامج لانهم عارفين ان آرون بيصلح حاجة ويبوط حاجة تانية .

مستهتر .. مش منظم .. بيضيع وقته .. الحاجة ممكن تخلص في ساعه بتاخذ منة ٤ ساعات .. انا نفسي يسبب الشركة من بكرة .. بس انت لما تشد حيلك في البرنامج شوية .. وهو يحل المشاكل بتاعته مع العملاء .. انا لو متبعتش كل حاجة بنفسي هو هيخرب الشركة .. انا بخصم منة عشان عارفه بيحب الفلوس فلما يغلط ويتخصم منة تاني مرة هياخذ بالة ...
وجهة نظر دينا :

دينا بتقول آرون مش كويس ... مهمل ... مبينظمش شغله ... وبينسي هو عمل اية . فييضطر يعمل الحاجة اكر من مرة .. بيروح لاي عميل عشان يحل مشكلة يقوم بسبب مشكلة تانية ... العملاء بتخاف لما يروح عندهم

كلام دينا والمدير متقارب ودا لسبب مهم جدا ، إن المدير بيكون وجهة نظرة بناء علي وجهة نظر دينا ، يعني لو دينا قالت عن حد وحش ، يبقى الحد دا وحش ف نظر المدير حتى لو عمله البدع .

ودينا هي إلي اكتشفت ان آرون جايله عرض من شركة تانية ، قالتي هو في يوم نسي العرض بتاعه علي المكتب وانا بالصدفة لقيته .. واخدين بالكوا بالصدفة ، والصدفة كانت بتعمل معاها حاجات كثير 😊 .

من وجهة نظري :

سواء آرون كويس او وحش ، هو دلوقتي معاه عرض من شركة تانية ولو إستني

أكثر من كذا العرض ممكن يضيع عليه ، وهو مقدم إستقالته أكثر من ٣ شهور
ومن حقه يمشي قانونيا بعد مرور شهر من تقديم الإستقالة ، لكن المدير مستغل
إنه معندوش جرأة ومخلهوش يمشي لحد دلوقتي وكمان بيضغط عليه في الشغل .
انا مكنش عجبني الظلم إللي كان بيتعرضله آرون ومرضاش إن دا يحصلي ، فكنت
بديله نصائح إنه مينفعش يسكت والمفروض يعمل إية ، لكن بصراحة عمري
مكنت اتوقع إن رد فعله هيكون بالسرعة دي ، كنت متوقع إنه هياخد شهر او
أكثر ، او هياخد الكلام من هنا وبطيره من هنا .

مظنش إن كلامي بس هو إللي خلي آرون ياخذ قراره ، أكيد كان بياخذ اراء ناس
تانية لكن كان مستني الفرصة الصح وإللي جت لما المدير بعته رسالة و قاله
هخصم منك ١٤ يوم عشان كذا مجاش الشركة تاني وراح قدم شكوي ضد
الشركة في العمل والعمال . وخلال اسبوع العمل والعمال حكموا بقبول إستقالة
آرون .

من الاخر آرون راح للعمل والعمال وقاهم " اخاف ألا أقيم حدود الله " علي
طول حكموله بالخلع ، طبعا أكيد مش انا محامي الخلع ☺ .

ما بعد آرون :-

في اول رد فعل ، الشركة بعته رسائل لكل العملاء بعدم التعامل مع الموظف
آرون من تاريخه لانه ترك الشركة ، واي تعامل معاه علي مسئولية العميل .
قبل كذا ، لما كانت مشكلة تظهر عند عميل ، كان بيتصل علي موبيل آرون ،
وآرون يروح يخلها ، لكن دلوقتي العميل بيتصل علي تليفون الشركة ، وكنت أنا او

دينا إلي بنرد علي التليفونات وطبعا ولا دينا فاهمة حاجة ولا أنا فاهم حاجة من مشاكل العملاء.

وظهرت أكبر مشكلة ، اخر إصدار من البرنامج غير موجود في الشركة ، كل التعديلات والتحديثات إلي عملها آرون للعملاء خلال آخر ٢٠ يوم غير موجودة علي الجهاز الرئيسي للشركة .

المدير جه يلومني و يتفزلك ويتنرفز عليا ، انت ازي مخدتش التعديلات دي من آرون ، امال انت قاعد في الشركة كل يوم بتعمل اية .قلت وانا اعرف منين ، حضرتك مقولتليش اخد منه حاجة ، أنا اي تعديلات بعملها بحطها علي الجهاز الرئيسي اول باول ، لكن معرفش إذا كان آرون بيحط ولا لأ.

رد عليا وقال ، آرون ضحك عليك ولبسك الطاقة وسرق البرنامج ، قلت لا ملبسنيش حاجة، انا معايا الكاب بتاعي ☺ ، انا لسة جديد في الشركة، طبعا فهم من كلامي إنه هو إلي لبس الطاقة ☺.

المدير راح رفع قضية علي آرون إنه سرق البرنامج واضر بالشركة ؟ بس طبعا القضية لازم يتحدد ليها جلسة وإخطار وبحث يعني الموضوع هياخد وقت علي الاقل شهر .

المدير قعد معايا نفكر إزاي هنعدي الفترة الانتقالية بسلام ونسلم البرنامج لسلطة مدنية (ليا طبعا ☺) . قالي هتتصل علي آخر عميل وهتاخذ منة نسخة من قاعدة البيانات وتقارنھا بقاعدة البيانات إلي موجودة في الشركة عشان تحدد

الفرق بينهم وانا هديك تقرير بكل الحجات إللي آرون عملها خلال ال ٢٠ يوم
اللي فاتوا (من التقرير اليومي بتاع آرون) وانت عليك تخط خطة تنفيذ .
طارق ، الفترة دي صعبة ، و دا إختبار حقيقي ليك ، ولازم تثبت نفسك.
حاضر يا بشمهندس ، إن شاء الله ، وإبقي قبلني (في سري طبعا) .

الفترة الإنتقالية

بعد الإجتماع العظيم إلي عملناه عشان نرسم خطة للفترة الإنتقالية وبعد القبول الجبري لإستقالة الحكومة السابقة (قصدي آرون) قرر المجلس العسكري (قصدي المدير) تكليفي بتشكيل حكومة جديدة (مني انا بس) تتولي زمام الامور وتكون عليها المسئولية الكاملة لإدارة شئون البلاد (قصدي البرنامج) . وطبعا زي ما كل الناس عارفة ، لما يحصل مشكلة ، الحكومة إلي بتشيلها ، فيقرر المدير يقبل استقالة الحكومة ويكلف شخص تاني بتشكيل حكومة جديدة .

المدير سافر علي عمان عشان يهتم بالشئون الخارجية للبلاد ، وأنا بدأت تظهرلي المطالب الفئوية للشركات اللي بنتعامل معاها (مشاكل بتقابلهم في البرنامج) ، وطبعا مفيش إستجابة فورية للمطالب ، لإني لازم أعمل دراسة كاملة للمطلب دا وتأثيره علي البرنامج ككل ، ودا كان بيخلي الشركات تعتقد إن مفيش إستجابة لهم فيقوموا بتصعيد الموقف وعمل إضرابات وإحتجاجات منها قطع اي مصادر للدخل والإتصال المباشر بالمدير ، ودا كلة كان بييجي علي راس العبد لله إلي لسة اول مرة يمسك حكومة وعاوز يثبت إنه يقدر يعدي الفترة الإنتقالية بسلام وأمان .

المدير طول الاسبوع في عمان وكل لما أساله علي حاجة يقولي جمع المشاكل والحجج اللي هتقف معاك و لما اجي اخر الاسبوع هنعمل إجتماع وناقش المشاكل دي كلها .

طيب ما كل حاجة واقفة اصلا ، يعني هفضل طول الاسبوع أجمع أجمع في مشاكل واستني المدير ؟ هيبجي يقول امال انت اشتغلت في إية طول الاسبوع لما كل حاجة واقفة معاك ، وبردوا هتيجي علي راسي .

مكنش قدامي إلا إني احاول مع نفسي في المشكلة عشان افهمها جت إزاي ، وساعات كنت بتصل علي العميل اساله المشكلة جت إزاي ، وافضل اجر بحد ما المشكلة تحصل معايا ومنها بعرف العيب فين واحله ، طبعاً كنت بموت في الموضوع دا ، لكن الحمد لله المشاكل كانت بتتحل بباركة دعاء الوالدين ، كنت بروح كل يوم علي ١٢ بالليل ولو روحت بدري بفضل اشتغل بردوا لإني عاوز افهم كل حاجة وعاوز اقوم ملم بالبرنامج في اقل وقت .

المدير كان بيعجي اخر الاسبوع ومبيكنش فاضي خالص ، معظم الوقت يا في البيت يا وراه إجتماع ومبيقعدش معايا اكثر من ساعة يكلم كلمتين ويخلع ويسبني مدبس ولا ألق اناقشه في اي حاجة ، ولو جيت كلمته لما يسافر يقولي منا كنت عندك مسالتيش لية ؟ من الاخر حوريني يا طاطا .

إتعلت البرنامج كله لوحدي ، يا إما بالتجربة ، يا من ملفات الشرح القديمة ، يا إما من العملاء أنفسهم ، لان العميل إللي كان بيحصل معاه مشكلة ، كان بيشرحها لي المشكلة حصلت إزاي ومنها بفهم الجزء دا .

لما آرون مشي مكنتش اعرف العملاء وكنت بتلخبط حتى في اسماءهم لما حد يتصل في المكتب ، لكن لما بقيت مسئول عن الفترة الإنتقالية عرفت كل العملاء والمهندسين كمان 😊 . وضربت صداقة مع المسئولين عن البرنامج في معظم

الشركات ، وكنت بحسب كل واحد إنه اهم عميل عندي ، طبعا دا مهم جدا ، لما تصاحب العميل بتاعك هيساعدك حتى لو عنده مشكلة هيقولك عليها ويصبر عليك لما تحلها مش هيوصل الموضوع لصاحب الشركة او الادارة بتاعته علي طول ويكبر الموضوع ، فيه ناس كتير بتعمل كدا ، عشان تحسس المدير بتاعها إنه شغال وكلة بيعجي علي راس المسكين إلي هو انا .

موقف من المواقف النادرة مع المدير بتاعي كان الحسابات ، الجزء الخاص بالحاسبين في البرنامج

انا مشتغلتش في برامج حسابات قبل كدا بس كان عندي اساسيات عنها ، المدير كان قعد معايا انا ودينا عشان يشرحلنا الحسابات ، فاكرين يوم ما بعث رسالة لآرون قالة لو مجتث محضوم منك ١٤ يوم واللي من ساعتها آرون مدخلش الشركة . هو كان يوم ملوش نهار .

قعد معنا حوالي ساعه ونص يتكلم عن اساسيات الحسابات ، الدائن والمدين ، والحسابات إلي اساسها داين والحسابات إلي اساسها مدين . دينا قائلتي بعديها إنه شرحلها الموضوع دا اكر من ٥ مرات وبتطلع كل مرة ولا الهواء بس بتعمل نفسها فاهمه عشان ميزعقش ليها .

حتى دينا سألته يومها ، هي لية الاصول في الحسابات مدينة ؟ قال هي كدا ، طبيعتها كدا ، ينفع اسالك انت لية بنت ؟ انا اتصدمت من الرد وهي ازبملت ، فعلا إجابة مقنعة جدا .

الحجات إللي كان بيقولها كانت أساسيات وكنت عرفها كلها ، وهو طبعا مفكر نفسه بيقول دورر و كنوز وطبعا انا لازم احسسه اني بستفيد ، المدير بتاعي هعمل إية 😊 .

دي نصيحة لاي حد ، اوعي عمرك تحسس مديرك انك مبتستفدش منه او تعرف أكثر منه ، لان دا هيبقي له اثار سلبية عليك ، وخصوصا لو انت جديد . لكن يا رتني مكنت حسسته إني فاهم لإني كنت كل لما اسالة في اي حاجة في الحسابات ، يقولي انت مفهمتش المحاضرة اللي انت اديتها ساعتين ؟ وانت لما مكنتش فاهم مقلتش سعتها لية ؟ ويعمل عليا اسطوانة كدا وفي الاخر يقولي شوف كتاب في الحسابات اقرأة ولما ارجع اخر الاسبوع هعمل اختبار فية !!! اية ياعم دا ؟ انت بتكلم طالب في الثانوية ؟ هعمل إختبار ؟ وفي الاخر مبيدنيش عقاد نافع .

في مرة اكتشفت انة فية شاشة في الحسابات فيها غلط ، فضلت أكثر من ساعه عشان افهمه اللي انا عايز اقوله ، لاني مبيدنيش فرصة اكمل كلامي ، اول ما ادخل في موضوع الحسابات يروح داخل شمال !! انت مفهمتش المحاضرة اللي شرحتها ساعتين ؟ انا قلتلك اقرأ في الحسابات مقرأتش لية ؟ انت مبتسمعش الكلام !! انت انت انت ... وبعد ساعه لما يفهم ان فية مشكلة يقولي " دي زباله من زبالات آرون .. وحاول تصلحها " . ماشي يا عم المدير ، شكرا ، جبت التايهة .

حالي النفسية تعبت جدا ، لاني لوحدي في الشغل ولوحدي في السكن ، مفيش حد اكلمه . ولما الواحد يكون مضايق او مخنوق بيبقي عايز حد يتكلم معاه . فترة كانت صعبة جدا . (صعبت عليكموا صح) .

بعد مرور شهر من العذاب ، الحمد لله بقيت شايل البرنامج كله وفاهم كل جزء فية لكن حجم التعديلات وطلبات العملاء كنت كثير وكان لازم حد تان يبجي عشان يساعديني .

بدأت اكلم المدير عن صاحبي المبرمج إللي في مصر عشان يبجي يساعديني ويشيل عني شوية . قالي ماشي ، بس هنجيبه زيارة الاول كتجربة . يعني ياخذ اجازة من شغلة ويبجي شهر ولو لقيته كويس زيك كدا هيكمل معنا ، ملقتوش كويس يبقي يكمل الشهر وياخذ مرتبه وتذكر سفره ويرجع علي مصر .

انا اتبسطت صراحة ، لما قال كويس زيك ، اول مرة يقولي انت كويس ، بس معجنيش الطريقة إللي هيحيب بيها صاحبي ، قتلته حضرتك مينفعش واحد يسافر ويسيب شغله واهله يعرفوا إنة مسافر يشتغل برة ويرجع بعد شهر ، حضرتك إعمله انترفيو او إختبارات زي ما انت عاوز ولو إقتنعت بيه يبقي نجيبه لانة لازم يقدم إستقالته ولازم يخلص اوراقه في الشركة عشان العقد إللي ماضيه هناك ، لو حضرتك مقتنعتش بيه يبقي هو موجود في شغله هناك . قالي خلاص هشوف ، بس هيبجي زيارة زيك وبعدين هعملك انت وهو الاقامة مع بعض ،

قلت مفيش مشكلة . طبعا انتوا فاكرين اني لسة علي زيارة ☹ . بس ولا فارق
معايا ، زيارة زيارة ، مهو مفيش غيري دلوقتي ، يعني ميقدرش يعمل حاجة ☺ .

هريدي

المدير قرر فجأة إنه ينزل مصر عشان يقابل ناس عشان بيزنس خاص بية ، المهم قالي هات رقم هريدي صاحبك عشان أقابله في مصر وأعمله إنترفيو ، إديته الرقم وإتصلت علي هريدي وقتلته إجهز للإنترفيو وقتلته علي معظم الاسئلة غللي ممكن المدير يسألها .

وبالفعل نزل المدير مصر وإتصل علي هريدي وإتقابلوا وهريدي فضل يتكلم معاه عن نفسه وعن خبراته وصورالاته وجولاته ومفيش أحسن من الكلام وحد هيسأل حصل ولا لأ 😊 .

المدير إتبسط من هريدي زي مكان مبسوط مني قبل ما أجي الإمارات وقاله إنت معايا إن شاء الله وأنا ناوي افتح فرع في مصر ولو محبتش تكمل شغل في دبي ، ممكن تنزل تمسك فرع مصر .

إية دا ياعم الحج ، نفس الكلام إللي إتقالي اول ما سفرت ، هو كل الموظفين في الشركة هينزلوا يمسخوا فرع مصر إللي لسة متفتحش اصلا ؟
وانتهت الإنترفيو بدون أي إختبار تقني سواء عملي او نظري لهريدي .

يعني هريدي يعتبر هيبجي علي ضمانتي ودا إللي مكنتش عاوزه ، كنت عاوز المدير يختبره زي ما هو عاوز عشان لو إتكلم بعد كدا أقول حضرتك إختبرته .

بعد ما المدير رجع من مصر باسبوع ، قالي خلي هريدي يشوف اقرب وقت يقدر
يسيب الشركة اللي هو شغال فيها عشان اعمله زيارة وييجي . طبعا كنت
مبسوط جدا وقلت لهريدي " مللم خلقاتك عشان هتدلي طوالي علي دي " .
هريدي علي ، او هريدي ، اسم الشهرة ، مبرمج ، أكبر مني بسنة ، شغال في
شركة كبيرة في مصر ، بس كان مخنوق منها شوية ، مرتبه مش مناسب وطلب زيادة
كذا مرة وطلبه إترفض بحجة إن الزيادة بتبقي سنوية ومينفعش يزيد دلوقتي فقرر
إنه يسيب الشركة وكلمني كذا مرة من اول ما سفرت عشان ييجي يشتغل معايا .
طبعا انا مفهم هريدي طبيعة الشغل والظروف إللي انا مریت بيها ، عشان ميجيش
ويتفاجأ بس هو كان موافق لإنه حسب تعبيره " إتخنى " من الشركة إللي هو فيها

اول ما قلت لهريدي ، راح طابع إستقالته " كان مجهزها ومستني الفرصة ☺ " .
وسلمها للمدير بتاعه .

المدير قاله ، لبة يا هريدي بتستقيل ، قاله حضرتك عارف المرتب مش كويس وانا
طلبت زيادة كذا مرة وإترفضت وانا جايلي عرض في الامارات وهسافر اخر الشهر
إن شاء الله .

حصل إجتماع في الشركة وهيصة وقالوله ، هنزودك الف جنية لو سحبت
الاستقالة ، قاهم إزاي ؟ هيا الزيادة مش سنوية ، قالوله دي هتبقي ليك انت بس
، زيادة استثنائية بس ثابتة يعني هتاخدها علي طول ، وهنسفرک في اقرب فرصة
السعودية او الكويت .

شركة هريدي ليها فروع في قطر والكويت والسعودية ولبنان واوقات بتسفر
المبرمجين ٦٣ شهر او شهر او سنة حسب إحتياج العملاء في الخارج وطبعاً مش
اي مبرمج بيسافر ، لازم يكون خبرة كويسة وقديم في الشركة لإنه بيقبض في
الخارج بالساعة وبال دولار ، دا غير مرتبه اللي في مصر ماشي زي ما هو ، يعني
بيقبض مرتبين ، المرتب المصري ومرتب بالدولار ، الله يبارك للجميع ، إحنا
مبناحسدش ، إحنا بنقرررر بس 😊 .

الشيطان بدأ يلعب في راس هريدي ، ما كدا كويس ، الف جنبة زيادة وانا في
بلدي ، الناس كلها بتقول ديي غالية... ومش هتوفر حاجة بيقى لية اسافر واتغرب
واتبهدل مع طارق ، وكمان هما هيسفروني في اول فرصة
...ووووو.....ووو...ووووو...ووو .

ناس كتير قالت لهريدي ان المرتب اللي هتاخده في ديي وحش ومش هتوفر منة
حاجة وهتصرفه كله .

هريدي بدأ يفتاحني في الموضوع ، قالي الوضع كذا كذا ، وانا شايف كدا كويس
،واكمل في الشركة أحسن والناس كلها بتخوفني من السفرية دية ، ويقولولي مش
هتوفر .

انا سبته يكلم لحد ما خلص خالص ، وكنت ماسك نفسي علي الاخر واول ما
خلص ، رحنا داخل فية شمال ، انت بتهرج يا هريدي ، يعني انا من اول ما
سفرت وانت عمال تقولي شوفلي فرصة ، وانا من وقتها عمال اقنع في المدير وبعد

ما أقتنع ووافق وقال كلمه عشان نطلعه الفيزا ،جاي تقولي اصلهم زودوني وانا شايف كدا احسن ؟

مش هي دي الشركة اللي كنت عمال تلعن فيها وانهم بيضحكوا عليك وبيدوك مرتب وحش ورفضين يزودوك ، دلوقتي بقوا كويسين ، واية ضمنك ان بعد شهرين ثلاثة يلغوا منك الزيادة ، وقتها مش هتقدر تكلم ، لانهم قالوك دي مش هتتضاف للمرتب الاساسي ، والفرصة هتكون راحت عليك .

انت عارف إني انا لوحدي هنا ، وفيه أكثر من واحد يتمني بييجي ، وانا عايز اجيبك انت الاول ، دلوقتي بتبيع عشان زودوك وتخرجني قدام المدير ، إنت عارف إني اتخنقت من الوحدة و مفيش حد اتكلم معاه و يشاركني المواقف اللي بعيشها ويشيل عني شوية ، ايد علي ايد تساعد بردوا و الوضع مش هيفضل كدا علي طول واي يوم بيعدي علي الواحد هنا بيزداد خبرة في البلد .

عموما ما دام إنت قررت إنك متجيش ، ربنا يوفقك ويسهلك وأنا هتصرف .

هريدي إتاثر بالكلام وحس بالذنب ، طبعاً من أستاذ في الدراما 😊 . وقال خلاص ياعم انا مش راجع في إتفاقي معاك وإن شاء الله هاجلك بعد شهر ومش هسحب الإستقالة .

طبعاً المفروض يمشي بعد شهر من تاريخ تقديم الإستقالة بس هو عشان علاقته حلوة هناك بالناس وكان لية رصيد أجازات ، خلص خلال اسبوعين .

هريدي راح دور علي كافي نت وعمل إسكان للجواز بتاعة وبعث الصورة و لما كلمني علي انت بعدها فضل يلوم فيا ، يتفع كدا ياعم طارق ، مش إنت إلي قايلي خدها بكاميرا ، طب انت لما شوفتها مش واضحة مقولتليش لية ، قتلته والله محدت بالي وبعدين انا مصور بكاميرا كانون دييجيتال مش موبيل نوکيا 😊 .
والحمد لله إنه مكنش إكتشف إني كنت مصورها بكاميرا ، كانت فضيحتي هتبقى بجلاجل .

المهم ربنا سهل والموضوع خلص والفيزا طلعت وجينا عشان نحجز لهريدي علي طائرة ملقناش ولا كرسي فاضي لمدة اسبوع ، كل الرحلات مليانة ، كان جاي قبل رمضان بيومين او ثلاثة ، وبالصدفة دينا لقيت مكان فاضي لواحد كانسل السفر بتاعه ، اتصلت بهريدي وقالته روح إحجز حالا علي طائرة بكرة المغرب ، في واحد كانسل المحجز بتاعه .

هريدي كان وقتها في القاهرة وراح علي طول حجز لكن ملحقش ينزل بلده في الشرقية عشان يسلم علي أهله ، يا دوبك اشترى شوية مستلزمات عشان السفر و ظبط شططة لأنه ساكن في القاهرة مع صحابة عشان الشغل .
حصل مواقف طريفة في مجيء هريدي :

الموقف الاول : الحاجة والدتي كانت مستنيه تعرف اليوم إلي هريدي مسافر فية ، ومجهزة الأكل المصري ، شوية بط وشوية فراخ وسمنة بلدي ، عناد للمغترين 😊 .

ربنا يباركلي فيها يارب ، طول عمرها والله ، حتى ايام الكلية وأنا ساكن في المدينة الجامعية ، كانت نص الشنطة بخدها ملابس ونصها الثاني اكل 😊 .

اتصلت علي والدتي وقتلتها إن هريدي هيسافر من القاهرة إنهاردة المغرب ومش هيعرف يقابل حد ومش مهم بقي الحجات اللي هتبعثوها . والدتي قالت مش ممكن هريدي يسافر الا لما ياخذ الحجات ، دا أنا بجهز فيها من اسبوع . أحمد اخويا إتصل علي هريدي وقاله إنت فين عشان هجبلك حجات طارق القاهرة ووالدتي حطت الحجات كلها في شنطة وقفلتها قفلة محترمة عشان متفتحش إلا في الامارات .

كان فية حجات كنت طلبتها من أحمد إشتراها وهو في الطريق ، وإداها لهريدي عشان الشنطة متقفلة ومفيش مكان فهريدي حطها في الهاند باج بتاعته من غير ما يعرف إية الحجات دي .

هريدي قبل ما يطلع علي الطائرة وهو بيعدي من الجهاز ومعاها الشنطة الهاند باج ، الجهاز صفر ، قالوله إنت معاك إية في الشنطة ، في معاك شيء حاد ، قال ممعش حاجة ، قالوله طب تعالي هنا وفتشوه تفتيش ذاتي ودقيق وفتحوا الشنطة وفتشوها ، طلوعوا منها علبتين امواس حلاقة هههههه .

قالوله إنت واخدج امواس حلاقة علي الطائرة لية ؟ هتحلق شنبك هناك ؟ هريدي ميعرفش عنهم حاجة ، دي من ضمن الحجات إللي احمد اخويا إدعمله وحطهم في الهاند باج علي طول 😊 .

بس لو قال إنهم مش بتوعي هتبقى مصيبة ، ممكن يشكوا فيه ، وسعتها بقي
قبلني لو حد عرف مكانك الامن المصري ما شاء الله عليه في الحججات دي ،
ممكن يظبطوه تظبيطة محترمة .

هريدي استعبط وقال انا معرفش ان الحججات دي ممنوعة ، انا اول مرة اسافر ،
وفي هزار كدا قال ، بس انا مسامح فيهم ، خدوهم هدية مني ، فضحك الامن
وضحك هريدي وضحك الجمهور وتعال الضحكات في أركان المطار وضحك
الطيار وعمل تخميسة بالطيارة وعدي هريدي والامن خد الامواس وأنا محلقتش 😊

الموقف الثاني والأشد : المرة الجاية إن شاء الله 😊

هريدي في دبي

لما هريدي قالي إنه خلص كل الاجراءات ومستني الطيارة كان الوقت حوالي الساعة ٦ مساء بتوقيت دبي ، كنت بخلص شغل و المفروض إني اروح بقي ، لكن عشان انا ساكن في الشارقة فقلت أستني في المكتب وكلها ٣ ساعات بس وأروح علي المطار 😊 ، محدش ضامن ظروف المواصلات في البلد دي . قلت أقضيها إنترنت ولا أي حاجة والوقت هيعدي بسرعة .

وانا قاعد كدا في أمان الله ، لقيت صوت ضئيل جاي من الموبيل بتاعي ، أكيد عرفتوه ، البطارية ضعيفة ، يا اتهاااار ابيض ، ضعيفة مين ، دا الراجل لسة هيوصل بعد ٣ ساعات ونص وعشان يطالع من المطار فيها ساعة عشان اول مرة وزيارة ، يعني الموبيل هيكون فصل شحن .

مخبيش عليكوا ، الموبيل كان صيني ، اول ما نزلت الموبيلات الصيني ، اول إصدار ، انا اشتريته ، كان ب ٧٠٠ جنية وقتها ، بس كان تحفة وفضل معايا أكثر من سنة ونص دون أن يشتكي وطبعاً كان أكثر حاجة بتميزه الصوت المزعج والمنبة إلي يصحى القليل والتليفزيون ، ويا سلام بقي لما الواحد يطلع إريال التليفزيون إلي في الموبيل وانا راكب في التاكسي ، وألاقي سواق التاكسي يبصلي كدا ولسان حاله بيقول " الواد دا عبيط ولا إية " . كان ببسلي في وحدتي ، لكن شكله هيعملها معايا إهمادة وهيفصل شحن ، ربنا يستر .

طلعت علي المطار في حدود الساعة ٩ مساءً عشان انتظر هريدي باشا قادما من ارض الوطن ، وقلت افصل الموبيل عشان البطارية متفضاش خالص ولما الطائرة توصل ابقني اشغل الموبيل ثاني .

الطيارة وصلت حسب ما أعلن المطار ، قلت الحمد لله ، جيت أشغل الموبيل منطقتش ، ياعم الحج اشتغل ابوس إيدك ، نام للابد ، طب أنا ذي مش أطلع رقم هريدي علي ورقة عشان ارن عليه من موبيل اي حد واقف ، مجتتش في بالي الفكرة دي ، علي أساس إن موبيلي مش هيعمل معايا كدا .

مكنش قدامي إلا إني اقف ابص علي الناس إلي خارجة من المطار واحد واحد، ودا طبعا عذاب لان مطار دبي الدولي بيبقي زحمة جدا ، وطبعا عشان هريدي ميعديش مني ، مكنتش بسبب حد خارج الا لما اتأكد منة سواء بنت او ولد ، إفرض متخفي مثلا ، معروفش انا ويتوه مني ، ولا إية ؟ 😊 .

وقفت ورا الفاصل بين مكان الإنتظار ، وبين الممر إلي بيخرج منة المسافرين او القادمون ، قلت عشان ابقني قريب ولو شوفته ونديت عليه ، ممكن يسمعني . ومن بعيد وبخطي هادية لحتته ، شابا في مقتبل العمر ، (مش وسيم ولا حاجة انا اوسم منة) يرتدي بدله ويضع القليل من الكريم علي شعره المجعد (شعري أحسن من شعرة كتيبيير) ، يدفع ترولي عليه شنطتين ، إحدهما شنطة سفر صغيرة والاخري شنطة يد ، ينظر يمنا ويسرة ، وكأنه يبحث عن شيء ما .تري علي ماذا يبحث ، هل فقد شيئا ، ام أنه منبهر بما يشاهده من الجنسيات المختلفة ، فهذا كوري وهذة فلبينية ، وهذا هندي وهذة روسية ، وهذا مصري وهذة مغربية ،

انا : ياعم والله حرام عليك يا هريدي . في حد يقف ورا عمود

هريدي : ياعم امال اقف فين ، انا عمال ارن علي موبيل مبيردش

انا : انا مش قيلك قبلني علي الباب ، دا الباب ؟

هريدي : انا طلعت لقيت الناس ماشية مشيت معاهم ، وبعدين وقفت هنا استناك

انا : شاطر ياخويا ، يلا عشان إتأخرنا وهنيجي علي الشغل بدري بكرة .

المفروض تاني يوم هريدي هيروح معايا الشغل ، كان يوم خميس عشان يقابل المدير

قبل ما يسافر عمان ، انتوا عارفين انه بيحي الاربعاء ويسافر الجمعة .

خدنا تاكسي وطلعنا علي البيت ، وطول الطريق بيحكيلي علي اللي حصله في

المطار وتفاصيل اليوم الاخير في مصر لحد ما وصلنا البيت ، حمد الله علي

السلامة يا هريدي ، خش برجلك اليمين ، إتخترتي يا حلوة يا زينة يا وردة من

جوة جنينة ، لولولولولي 😊 .

طبعا عملت إنقضاض علي الشنطة إلي جيالي من مصر لما تحتوية من خيرات

بلدنا ، إتعشنا عشاء مصري ١٠٠ في المية وأخلدنا للنوم .

صحيت الصبح ٦:١٥ كالمعتاد بالنسبالي ، طبعا الاول مكش حد معايا ،

الشقة كلها تبغي ، لكن دلوقتي ، لازم كل حاجة بالمواعيد ، واهم حاجة ، الحمام

، لازم يكون بالمواعيد ، عشان محدش يتأخر فياخر إلي بعده ، لو عارف نفسك

هتتأخر في الحمام ، يبقى إصحي بدري يا حلو ، وعشان أنا عارف نفسي ،

صحيت بدري 😊 . انا فيا عادة من ايام الدراسة ، أحسن أفكار بتجيلي وانا في

الحمام ، بحب افكر وأتساور مع إبليس ههههه . وانا في الدراسة كنت براجع إلي
بذاكرة في الحمام ، اهو بدل ما تقعد فاضي ☺ .

نزلنا من الشقة علي ١٠:٧ الصبح ، وصلنا المكان إلي الاتوبيس هيتحرك منة
١٥:٧ والاتوبيس جية في ميعادة ٢٠:٧ ، مفيش احسن من كدا ولا تعب
مواصلات ولا أي حاجة ، طبعا فاكرين موضوع المعاناة إلي شوفتها في
المواصلات سواء من الناحية المادية او الحر الشديد في إنتظار التاكسيات .

هريدي باشا ، محمش بحاجة ، يا دوبك وقفنا من ١٥:٧ لحد ٢٠:٧ لما الاتوبيس
جية ، وكان عمال يقول ، إية الحر دا ، اووف ، قلتلة يابني إنت في نعمة ، إنت ما
شوفتش ولا هتشوف حاجة من إلي انا شوفتها ، ضحك ضحكة شريرة وقالي "
طبعا " منا لازم استفاد بكل يوم انت قضيتته في الامارات قبلي ، قلتله معاك حق
، قول اوووف براحتك ، من حقا .

وصلنا الشركة و بدأت افرج هريدي علي البرنامج في السريع واقوله النقاط إلي
المدير ممكن يكلم معاه فيها وممكن يساله في اية واول مقابلة بيني وبينه كانت ازاي
، دا غير إني لما جيت وبدأ يشوف طريقة شغلي او تفكيري ، كان بيعترض علي
حجات و هو لما يشوف حاجة متعجبوش بيفضل يتكلم فيها بالساعة لحد ما
يخسس إلي قدامة إنه ولا حاجة . ويفضل يعيد في الكلام " البرمجة في مصر برمجة
سوق ، والمبرمجين بيقفوا كثير ، وكل واحد بيكتب اللي عايزة ، والطريقة اللي هو
عايزها ، ومحدث بيراجع وراهم الكود ، وبتبقي هيصة ، لكن هنا لأ ، هنا كل
حاجة بحساب ، وكل حاجة بتتراجع "

ساعات الواحد بيضايق من كتر الكلام ، بس لازم يتقبل الوضع والتغيير ولازم
يمشي علي نظام المكان اللي هو فية . انا بقول الكلام دا كلة لهريدي عشان
ميقعش في نفس المواقف اللي انا وقعت فيها .

كان لسة محدش جية الشركة ، السكرتيرة سجرید سافرت الفلبين لانها كانت علي
زيارة وكان لازم تسافر لما يخلصوا الاقامة بتاعتها، وآرون انتوا عارفين مشي ،
ووردة كانت سابت الشركة بعد مانا جيت بجوالي ١٥ يوم تقريبا . يعني حاليا إحنا
٤ فقط . انا وهريدي والمدير ودينا .

وانا قاعد بشرح لهريدي ، دينا جت ، هاي طارق ، هاي هريدي كيفك ،
حمدالله ع السلامة وراحت علي المكتب بتاعتها في الاوضة الثانية ورجعت بعد
دقيقتين بالضبط ، بصت في الاوضة وبعدين قالت

هريدي !! انت قاعد ع الكرسي بتاعي ، ممكن تشوف كرسي تاني عشان عايزة
الكرسي دا .

هريدي او هريدي ، بصيلها كدا مزهلا ومندهشا ومنصدما وراح قايم وهي خدت
الكرسي ومشيت .

قالي اية دة ، مفيش كسوف ، قوم من علي الكرسي بتاعي ، كدا وش ، قتلته
عادي متستغريش ، انت مش في مصر ، قال ماشي ياعم بس بردووو ، دا انا
لسة اول يوم ، تقول الكرسي بتاعي ؟

قتلته " ما قلنا إنت مش في مصر ، إنسي بقي "

هريدي و التاكسى

هريدي وصل الإمارات يوم الاثنين بالليل ٢٥ أغسطس ، جيه معايا الشغل يوم الثلاثاء الصبح ، أكيد ٢٦ أغسطس ☺ ، شرحته شوية في البرنامج ونظام الشغل وإديته تاسك بسيطة كدا يتسلي فيها وعدي يوم الثلاثاء عادي وروحنا مع بهرام ، سواق الاتوبيس إللي بياخذنا .

يوم الاربعاء ، المفروض هريدي هيقابل المدير ، هريدي كان قلقان وخصوصا بعد موقف جواز السفر إللي كان صورته بالموبيل . المدير جيه آخر النهار كدا وسلم عليا ، إزيك يا طارق عامل إية وسلم علي هريدي ، إزيك يا هريدي ، حمد الله علي السلامة ، أخبار مصر إية ، أهلك وحشوك ولا لسة ؟ وقال تعالوا علي غرفة الاجتماعات ، هريدي قالي ، هو المدير عرف إن اسمي هريدي امتي انا مكنتوش في السي في ، قتلته من اول يوم وانا بقول هريدي مش بقول هريدي خالص ، قالي ناصح ، مش كفاية في مصر الناس نسيت اسمي هريدي وبتقولي هريدي .

رحنا علي غرفة الاجتماعات ، المدير بدأ يتكلم مع هريدي ، وطبعا الكلام هيبدا بالمقدمة " انت عارف إني جبتك من غير ما أعملك انترفيو ولا اي حاجة ، انا جبتك علي ضمانه طارق ، فلانم تثبت نفسك في الشغل ، طارق جيه في ظروف صعبة وأثبت نفسه إنه يقدر يتحمل الشغل ، انا جبت ناس قبل كدا لكن مكنوش كويسين ومكنوش بتوع شغل ، فبمجرد الفيزا بتاعتهم خلصت ، قتلهم إنزلوا مصر خدوا خبرة كويس وبعدين فكروا تسافروا تاني.

طبعا انا رحيت ساند زهري للكرسي وحاطط رجل علي رجل ودورت علي المشط
بتاعي عشان اظبط شعري بس ملقتوش ، فتنحنحت كناية علي إثبات وجودي
والموافقة علي ما قالة المدير 😊 .

بعد كذا المدير إتكلّم عن نظام الشغل ، نفس الإسطوانة إللي قالهالي اول ما جيت
، نظام الشغل هنا غير نظام الشغل في مصر ، هنا كل حاجة بنظام و بحساب ،
شغلك لازم يكون منظم ، إحتمالية الخطأ لازم تكون ضعيفة او معدومة ولازم
تتعود علي كذا ، لازم تكون يقظ ، لازم تجتهد ، لازم تثبت إنك جدير بالثقة .

الكلام دا لما إتقالي اول ما جيت ، كنت بسمع واهز راسي و اقول ماشي وحاضر
، ودا إللي المدير عايزه ، السمع والطاعة حتى لو مش هتتفد ، بس قول حاضر
😊 .

لكن هريدي كان مختلف شوية ، الموقف معدش بحاضر وماشي ، رد علي
المدير وقاله : منا كنت شغال في شركة كذا (كذا دا كناية عن إسم الشركة 😊)
ودي شركة كبيرة وفيها نظام بروفيشنال وواحدة إلايزو ، يعني تخطيط ومتابعة
وكل حاجة بتتعمل بحساب ..ووو...ووو.

المدير إضايق من كتر الكلام ، وأنا عن نفسي إضايقت ، ودي كانت اول غلطة
لهريدي مع المدير في دبي ، كونك ترد علي مديرك في كل كلمة يقولها فدا مش
كويس ومش هيزود قدرك ، هو يجبك لما تقول حاضر وماشي وتطبق دا علي
شغلك ، مش ترد عليه وتقول أنا ومش أنا .

أنا ومش أنا دي قبل ما تيجي الشركة ، بتبين قدراتك ومواهبك ، لكن بعد ما جيت الشركة الكلام خلص ، بين شغل بقي .

في وسط الحوار ، المدير حب يختبر هريدي في سؤال ، وكان السؤال دا موضوع نقاش طويل بيني وبين المدير ، وكنت قايل لهريدي عليها عشان يعمل حسابة لو إتسئل فيها ، هو كان سؤال فني في البرمجة ، فهريدي إجابته حاضرة وقبل ما المدير يكمل السؤال كان هريدي بيجابو ، لكن من سرعه هريدي في الرد ، قلب خطوتين مكان بعض ، ودا يبوظ الدنيا خالص ، فطبعاً لو المدير أخذ باله منها كانت هتبقي مصيبة ، وهيدخل معاه في تفاصيل أكثر وسعتها ممكن هريدي يتلخبط وإحنا مش عاوزين مشاكل من اولها ، فأنا رحنا داخل بسرعة و بضحك قلت انا قتلته علي السؤال دا ، وقلت المدير هيسألك فيه ، فالمدير وهريدي ضحكوا ، لكن هريدي حس بالإحراج .

في آخر الإجتماع ، المدير قال لهريدي ، انا هبدأ ادريك شغل من بكرة وإنت هتروح لوحداك إتهاردا عشان هنروح أنا وطارق هنروح المطار كمان ساعتين ، هيجيلكم ضيف جديد ، سامح ، مبرمج دوت نت . فإنت روح ظبط الشقة ، او ظبط عشاء ، عشان الضيف إللي هيجي دا ، أكيد هيجي تعبان وعاوز يتعشي او عاوز ينام .

لما خلصنا الإجتماع ورحنا الغرفة الثانية أنا وهريدي ، قالي يعني كان لازم تقول إنك قتلتي علي السؤال دا ، ما كنت تسييني أجابوه ، قتلته عشان انت بتكلم كثير من غير ما تفكر واللي بيتكلم كثير بيغلط ، وانت بتجاوب عكست جزء في الكود مكان جزء تاني ولو المدير لاحظ كان هيبقي موقفك وحش ، فأنا قلت

كدا عشان ألقك و أقفل الموضوع و انت تسكت . هريدي قال ، طب كويس ، مش عايزين مشاكل من اولها . قتلته وبعدين حاول متتكلمش كثير ، يعني مش لازم تعلق علي كل كلام المدير ، هو بيكلمك علي النظام هنا كذا وكذا، مش تقولة انا كنت شغال في شركة وكان فيها نظام والشركة واخذ الايزوو هو مالة ومال الحجات دي . ما دام شركة واخدة الايزوو ، سبتها ليه ، كنت خليك جنب الايزوو

قالي انا دائما اكتيف Active واحب تكون لما شخصية وارد علي الكلام ، مش اسمع ويس ، قتلته انت حر ، بس خلي بالك ، دا مش كويس وممكن يبجي علي راسك بعد كدا .

جت الساعة ٦ وبهرام بتاع الباص رن عليا عشان أنزل ، إتصلت بيه وقتله انا مش هاجي معاك ، بس صاحبي هيبجي معاك هتنزلة نفس المكان ، فقالي اوك بس بسرعة انا واقف تحت ،قلت لهريدي يلا إنزل بسرعة الباص واقف تحت وممكن يمشي لو إتأخرت ، هريدي قال ماشي وبدأ يقفل جهازه وشنطته ونزل . شوية لقيت هريدي بيرن عليا ، إتصلت بيه من تليفون الشركة، قالي مش لاقى الباص ، قتلته إزاي ، قالي انا واقف من ٥ دقائق ومش لاقيه ، قتلته طيب أستني هتصل بيه .

أتصلت ببهرام

انا : إلو حبيبي ، وين إنت ؟

بهرام : أنا يمشي ، صاحب مال إنت يتأخر

انا : حبيبي ما في تأخير ، هو ينتظر تحت

بهرام : انا خلاص مشيت ،

انا: ما ينفع يرجع ثاني ، هو يسوي إنتظار تحت بناية

بهرام : ما بيصير والله صديق ، فية واجد زحمة وايد

اتصلت علي هريدي وقتله إن الباص مشي ، حاول تاخذ تاكسي وتروح بقي .

طبعا أنا عرفت بهرام عمل كدا لية ، عشان انا مكلمتوش عن هريدي ولا إتفقت

معاه علي ثمن المواصلات بتاعته وخصوصا إنة جاي في اخر الشهر وبهرام ملوش

دعوة اول الشهر ولا آخر الشهر ، واحد هيركب معايا لازم يدفع .

هريدي اول مرة هيركب تاكسي في دبي ، ومش أي وقت ، دا وقت الزروة ، يعني

صعب إنة يلاقي تاكسي ، هريدي فضل ساعة مش عارف يوقف تاكسي ، وأول

ما وقف تاكسي طلع يجري عليه ، قاله الشارقة ، السواق قاله نووووووووو

...شارقة اذ ابج برويلم ،

No Sharja is A big problem

وراح التاكسي ماشي ، بعد ربع ساعة وقف تاكسي ثاني ، الشارقة ؟

قاله نووووووووو...شارقة اذ ابج برويلم ،

تاكسي ، اتنين، ثلاثة ، اربعة ، ونفس الرد ، قاله نووووووووو...شارقة اذ ابج

برويلم ، ف هريدي بدأ يشغل محه ، وقال لنفسه الناس دي مش عاوزة تروح

الشارقة ، لكن لو انا عرضت عليه بونص ، فلوس من تحت لتحت ، رشوة من

الآخر ، يمكن يوافق .

وقف تاكسي ، الشارقة ، نووووووووو... شارقة اذ ابج برويلم

No Sharja is A big problem

Haridy : I will give you bonus

هديك بونص ، سواق التاكسي قاله كام ؟ How much ?

هريدي شاور بإيده كأنه بيعمل خمسة وخميسة وقاله خممممسة درهم

Fiiiiivvvee Dirhams ، طبعا هريدي لسة في الاول وموضوع ال ٥

درهم ب ٧,٥ جنية شغالة في دماغه ، سواق التاكسي راح بصصله بإستحقار

وقفل شباك التاكسي وراح ماشي 😊 .

انا لو مكان سواق التاكسي مش هسيبه وأمشي لو عرض عليا كدا ، انا هقوله
لف واركب من الناحية الثانية ، وأول ما يبجي قدام التاكسي ، هدوسه ، ٥ درهم
يا مفتري .

تاكسي وإثنين وتلاتة وهريدي مفكرش يزود ال ٥ درهم بدرهم واحد ، لحد ما
الساعة عددت ٨ ونص ، يعني فضل في الشارع يدور علي تاكسي حوالي ساعتين
ونص .

لقي تاكسي ومن غير بونص ، ما خلاص الوقت بقي متأخر والعملية فكت شوية
ووصلت البيت علي ٩ بالليل كدا لكن كان في عداد الاموت من التعب ، يا
دوبك في السريع جهاز سرير لسامح ، ورن عليا ، إتصلت بيه وكنت لسة في
الشركة وقال انا هنام ، مش قادر أتحرك ، إبقى هات عشاء معاك وإنت جاي .

فاكرين ، لما هريدي إضايق من تأخر بهرام وقال مواعيده مش مضبوطة ، إتأخر
١٠ دقائق او ربع ساعه وإحنا في الحر ، ثاني يوم بهرام إتأخر و هريدي شايفه من

بعيد جاي ، قال براحتك يا بهرام ، براحتك يا أسد ، احنا نيجي بدري وانت
تدلح علينا براحتك ، من حق الكبير يدلح ، من حق بهرام يدلح 😊 .

انا مت من الضحك وقتلته ، دا من تاثير يوم واحد بس مع التاكسي ، انا فضلت
كدا شهر ونص كاملين ، عشان تحمد ربنا . قالي مهما كنت تحكي مش زي ما
تعيش الموقف . فعلا إللي يشوف غير إللي يسمع . الكلمة دي لسة هسمعها تاني
من واحد صاحبي تاني ، رأفت ، بس دا لسه قدام شوية ، لما أخلص علي هريدي
الاول 😊 .

إنتظار في المطار

علي الساعة ١٠ ونص ، إنطلقت أنا المدير إلي مطار الشارقة الدولي ، لنتظر المبرمج الجديد المدعو سامح ، حيث أن الوقت المفترض لوصول طائرته هو الحادية عشر .

مكناش عارفين شكله ، هي صورة الجواز ومتعرفش منها الشخصية كويس ، طبعنا ورقة مكتوب عليها إسمه عشان نقف بيها قدام بوابة الخروج ، ولما يشوف إسمه هيعرفنا .

لما وصلنا المطار سالنا علي الطائرة ، قالولنا الطائرة لسة موصلتش ، وإحتمال تتأخر شوية .

المدير كان كريم ، عزمي علي العشاء في ماكدونالدز ، لما اللاكل إتخط علي الترابيزة ، إفتكرت هريدي الغلبان ، إلي إترمط لحد ما لقي تاكسي ، إلي قالي انا تعبان وإبقي هات عشاء معاك ، مكنش ليا نفس للأكل ، مقدرش أكل من غير صاحبي ، لازم يكون عندي أحاسيس ، بس صراحة ، الساندوتش كان مغري ، والبطاطس كانت سخنة ، قلت هو أكيد في سابع نومة دولقي ، ولم أترك العنان لضميري كثيرا ليؤنبي ، فإنقضت علي الساندوتش ، ألتهمه ، ومع كل بطاطساية أقول سامحي يا هربي ، غصب عني يا هريدي . بس الساندوتش خلص ، مفيش تاني ، انت عازم قطة علي العشاء ولا إية ياعم ؟ يلا ، من رضي بقايله عاش ، الحمد لله ، نعمة .

تراخ .قلت لهريدي دا ميت ، عمره ما هيقدر يبجي معنا ، كتبته العنوان علي ورقة ، وخذت موبيل هريدي وحطيته جنبه وكتبته رقمي وقلته لما تصحي البس وتعال علي العنوان دة ، لو معرفتش ، رن عليا .

وصلنا المكتب ، لقيت دينا بتتصل بيا علي ٩:٣٠ الصبح .

دينا : الو

طارق : الو سلام عليكم

دينا : كيفك طارق

طارق : الحمد لله ...

دينا : انت وين ؟

طارق : بالمكتب

دينا : سامح معاكم

طارق : لا

دينا : مجبتوش معاكم لية ???

طارق : كان تعبان ومقدرش يصحي

المدير راح واخذ منها التليفون ...

المدير : ايوة يا طارق ..انت ازاي يابني تسببه ومتجبوش معاك ؟

طارق : كان تعبان ، ومقدرش يصحي !!

المدير : قالي كنت حاول معاه تاني هيبجي ازاي دلوقتي ؟

طارق : انا سبتله تليفون هريدي والعنوان كمان وقتلته لو معرفتش تيجي إتصل بيا

المدير : كنت جيبه ويمشي العصر لو تعبان ، كنا عايزينه يحضر معنا الاجتماع ، طيب يلا سلام .

طارق :قلت سلام يابن ال.....

بقي امبارح تقولنا ناموا وتعالوا براحتكوا ، ودلوقتي تقولي مصحتوش لية ، الحمد لله ابي جيت ، كان زماني متشروح دلوقتي 😊 . وانت مش بروفيشونال ، انا روحت بعدك وجيت بدري ، عشان انا همي علي الشركة ، لكن انت مش همك ع الشركة ، والاسطوانات بتاعة اصحاب الشركات إللي الواحد حفظها ، ومسجلها عشان لما يفتح شركة ان شاء الله يقولها لموظفينه 😊 .

كان يوم خميس وكان المفروض هريدي هياخد اول تاسك من المدير ، لكن اليوم خلص والمدير مقعدش معايا ولا مع هريدي ، قضى اليوم مع دينا و سامح ، كانوا وخذين مشروع جديد ، في حكومة دبي ، حاجة زي بوابة إلكترونية كدا ، شغل ويب .

المدير قالنا خلاص هنقعد بكره مع بعض ، وهديكوا التاسكات الجديدة بكره دا إللي هو الجمعة ،

طبعا انتوا عارفين لية بنروح لية ، عشان المدير بييجي اخر الاسبوع وميقعدش معنا كثير فبنضطر نتقابل الجمعة ساعتين تلاتة ، وعلي كلام المدير ، إحنا بنشتغل السبت عشان الضغط وعشان العملاء مطالبهم كثير ، بس إن شاء الله ، إن شاء الله ، اول ما الموضوع يتعدل هيبقي الجمعة والسبت أجازة .

وكلام الليل مدهون بذبدة يطلع عليه النهار مش يسبح بس ، دا يختفي ،
ويتبخر، ويقولك من أنتم .

لان الكلام دا بيتقلي من اول ما حيت ، وآرون لسة شغال ، ولما آرون مشي ،
الضغط زاد مش قل ، وعمر الضغط ما هيخف ، لان عمر المشاكل ما تنتهي ،
ولا عمر المطالب هتخلص ، يعني مهما تخلص شغل ، هتلاقي شغل جديد جايلك
، ومهما تخلص تاسكاتك هتلاقي تاسكات جديدة ، لكن بردوا لازم تضحك
علي الموظف عشان تديله شوية حماس و الاماني حلوة والاجازات حلوة .

زي الزواج بالظبط ، عمر مراتك ما هتبطل تقولك هات ، وكل مرة هتقول المرادي
بس ، عشان خاطري الحاجة دي بس ، حبيبي حبيبي ، اخر مرة صدقني ، طيب
مش عاوزة خلاص وزحلانة منك ، وطبعاً لازم تصالح ولازم تداوي ، ولا عمرها
هتبطل تطلب ولا هتسيبك الا لما يجيلك الضغط ، والسكر ، والزايده ، و ممكن
املاح ، لكن فية امل وأماني إنها في يوم تقولك خد مش هات ،
خد شيل الواد شوية ، أعملك شغلة في البيت بدل مانت قاعد كدا ، خد غير
انبوبة البوتجاز ، او خد في اسنانك ، عادي يعني .

طبعاً مش كل الزوجات كدا ، دي قلّه مندسة ، ربنا يجعل كلامنا خفيف عليهم ،
ملناس بركة إلا هما ، بياكلونا ويشربونا ، ويبغسلونا ، ويبكولنا الهدوم ، هنفتري
يعني ، يا مفتريين ، يا وحشيين ☺ .

المهم يعني ولا الجمعة ولا السبت خدناهم اجازة خالص ، من ساعه ما اشتغلنا .
في يوم قبل ما هريدي يبجي ، عرفت إن واحد صاحبي إسمة وليد ، من أيام المدينة
الجامعية في دبي ، إتصلت بية وجيه زارني وبيت معايا الخميس ، وسبته في الشقة

يوم الجمعة ورحت الشغل ورجعته العصر . فاكرين وليد ، بتاع التلاجة ، مقال
إبسطةا يا باسط ☺ .

رحنا يوم الجمعة وهريدي خد اول تاسك لية والمفروض انة هيشغل فيها لحد ما
عمر يرجع يوم الاربعاء . وهيتواصل مع المدير زي ما كلنا بنتواصل معه عن طريق
الإيميلات او عن طريق مسنجر جوجل Gtalk . دا غير ان كل واحد بيعت
تقرير يومي للمدير بالشغل إللي خلصه ، عشان يبقى متابع معاه ، طبعا هو في
اوقات كتيرة مبيصش علي أي تقرير ، بس لو كل يوم الصبح ملقاش الإيميلات ،
بيعمل هيصة ، وإحنا مش ناقصين .

تاسك هريدي خدها بصورة عامة من المدير ، لكن تفاصيلها إنا إللي هشرحهاله
، يعني هقوله يعمل كذا وكذا وفي انهي مكان في البرنامج وبعد ما يخلص ، أنا الللي
هعمل تيست او أختبر الشغل بتاعه قبل ما المدير يشوفه . يعني لو المدير مسك
في شغلة غلطة ، مش هو بس إللي هيتعاقب ، أنا كمان ، لاني انا الللي أختبرت
الشغل ومكتشفتش الغلطة ، دا إية الحلاوة دي . طبعا اي حاجة تقف قدام
هريدي ، طارق .. طارق .. ، طبعا مش هقدر أقوله مشغول ، ولا مش دلوقتي ،
دا صاحبي مهما يكون ، دا غير الللي كان بيحصل معايا ... كنت اجي اقول لآرون
اي حاجة ، مرة يقولي ومرة يقولي بعدين انا مش فاضي بعد شوية ، فكنت استني
لما يخلص شغله عشان يقولي علي إللي انا عاوزه .

ومن السهولة إللي هريدي لقيها ، سواء في التاسك او الشرح والمساعدة ، بدأ
يستصغر حجم الشغل و حجج البرنامج ، وحجم الشركة ، دي شركة صغيرة ، ودا
البرنامج ميجيش حاجة جنب شغلي في مصر ، دا البرنامج بتاع الشركة في مصر

كبير والواحد كان مسئول عن حجات كثير .

قتله ياعم الحج احمد ربنا ، انت لسه في الاول وانت مش في مصر ، وبكرة الشركة هتكبر وهتبقى مسكلك فرع ولا حاجة ، مفيش احلي م الاحلام ، إحلم يا هريدي ، إحلم 😊 .

وبعدين انت مالك البرنامج كبير ولا صغير ، انت اهم حاجة هتاخذ شغل ، خلصه وانت ساكت وانت مش سايب مصر وجاي عشان برنامج كبير ولا صغير ، انت جاي عشان توفرك قرشين وتاخذ خبرة من البلد ممكن تنفك في المستقبل وممكن تتعرف علي ناس او تلاقي شغل افضل والحياة تمشي معاك .

هريدي وسامح مكنش ليهم إيميلات علي موقع الشركة ، فكانوا بيعتوا التقرير اليومي عن شغلهم من الإيميل الخاص بيهم ، المدير بعد ما سافر بيومين عمل لكل واحد إيميل وبعثهم لدينا عشان تديهم للشباب ، دينا وسامح كانوا في إجتماع عشان الموقع إللي بيعملوه ، فقالت لسامح ، انا هديك إيميل وإيميل هريدي ، اول ما ترجع الشركة ، إديله الإيميل والباسورد . سامح نسي يديي الإيميل لهريدي ، فهريدي آخر اليوم بعث التقرير بتاعه من الإيميل الشخصي ، يومين ورا بعض ومن الإيميل الشخصي ، فالمدير قاله انت بعثلي من إيميل شخصي ليه؟ مبتستعملش إيميل الشركة ليه؟ قال انا مليش إيميل علي موقع الشركة !!

المدير راح مكلم دينا علي الشات ، انت ادتي هريدي الإيميل بتاعه؟ قالت ايوه من يومها .

المدير راجع لهريدي وقاله دينا بتقول انها ادتك الإيميل ، فهريدي رد قال

**She is a Liar
she didn't give me anything**

كذابة مدتيش أي حاجة

فما كان من المدير إلا انة اخذ الكلام نسخ ولصق وعلي الشات مع دينا وقال
? what is your answer on that

إية ردك علي الكلام دا ؟

موقف بدأ بسيط ، بس مع واحد كوي وإتين بيست بقي كبير قوي ،

هريدي رد بكل جرأه وقال إنها كذابة ، طب دينا هيكون رد فعلها إية علي

الكلام دا وخصوصا إنها قالت للمدير ، أنا ادتهوله من يومها ؟

هل هتقول الحقيقة ، إنها إديت الإيميلين لسامح ومتعرفش إية إلي حصل بعدها ؟

بس دا هيعتبر خطأ تاني منها لانها المفروض متديش الباسورد بتاعه إيميل هريدي

لسامح !!

هل هتحاول تنتقم من هريدي عشان قال عليها كذابة ، وهتألف اي حجة تطلع

هريدي غلطان و تبرأ نفسها ؟

هل الموقف هينتهي علي كذا ولا هيبقي له تبعيات ؟ وتأثير علي شغل هريدي ؟

وإية موقفني أنا من الدور دا ، بصفتي شاهد مشفش حاجة ؟

إنتظرونا في المقال القادم ☺ .

هريدي والمدير الجزء الاول

لما هريدي قال علي دينا إنها كدابة والمدير خد كلام هريدي نسخ ولصق علي الشات مع دينا ،

، هي متزكرتش انها إدتهم لسامح ، فكانت عايزة تدافع عن الموقف ومطلعش نفسها غلطانة، فلازم مين إللي يطلع غلطان ؟ أكيد هريدي !! قالت إن هريدي دائما سرحان وإنها أكثر من مرة تنادي عليه وميردش ، ولا يسمعها ، وقالت إنها اصلا بتحس إنه نايم مش بيشغل ،

he is a sleepy guy
, and always out of mind
many times i talk to him ,he doesn't hear or get me

دينا بتخاف من المدير جدا ، وبتخاف تطلع غلطانة في اي حاجة ، بتحب تظهر دائما في دور إللي مبيغلطش لأن المدير عندنا لما يلوم حد او يوبخه " زي ما هنشوف بعد كذا كثير 😊 " بيحسسه إنه ولا حاجة . غير إنها حست بالإهانة من كلمة هريدي فحبت تظبطه ، وطبعا المدير هيصدق مين ؟ أكيد يعني مش هيصدق هريدي لو فضل يحلف للصبح .

المدير قال اتصرفوا مع بعض ومحدث بيعتلي اي إيمل تاني إلا من إيملات الشركة .

بدأت دينا تكلم هريدي وسامح تستنفسر ، فسامح رد وقال انا نسيت ادي الإيمل لهريدي ، دينا قالت إمم ، طيب إديهوله دلوقتي والموقف خلص علي كدا ،

لكن نظرات هريدي لدينا ونظرات دينا لهريدي كانت تحمل الكثير ، كنت أري بعيوني البريئة 😊 مخالب الاسد في عيون هريدي تريد أن تنقض علي دينا فتفتك بها ، وأري سم الثعبان يتطاير من عيون دينا يريد أن يقضي علي هذا الكائن الهاردي .

طبعاً هريدي كذا خد كارت احمر من دينا ، اي غلطة ، اي كلمة ، اي نفس هيتنفسه أكيد هيوصل للمدير ، والصراحة مكش هريدي بس ، كان اي حد فينا إحنا الثلاثة ، انا وهريدي وسامح يعمل اي حاجة كانت توصل للمدير ، واوقات كانت بتحط شوية بهرات من عندها مع إدراج حسنة النية 😊 . فقررنا نحن الثلاثة (طارق وهريدي وسامح) إطلاق لقب الثعبان Snake علي دينا ، حيث أنها تستحقه بجدارة .وزي ما قتلوكوا قبل كذا ، انا كنت بستغل طبيعة دينا الثعبانية لما بكون عاوز اوصل حاجة للمدير ، سلوك او انطباع ، ضيق او ضجر ، كنت بكلم معاها كأني بدردش واقولها علي فكرة دينا انا محبش كذا ، علي فكرة الحاجة دي بضايقي ، علي فكرة اسلوب المدير معايا في الحجة دي مكش كويس ، ومبتعديش ساعة بالكثير الا والمدير يكون عارف ، ويتناقش معايا بطريقة او بأخري في الحاجة دي ، قال يعني حس بيا مش هي اللي قائلته .الموضوع مكش خوف إني اقول للمدير بنفسي ، بس الحقيقة إن اي مدير مبيحبش الموظف يتكلم معاها بصراحة زائدة ، او يغلظه في حاجة ، المدير مبيحبش يظهر إنه غلطان . لكن في بعض الاوقات لما كان بيحصل مشكلة كبيرة بيني وبين المدير ، مكنتش بستني ، كل واحد بيطلع اللي عنده بقي وإللي يحصل يحصل وهنشوف الموضوع دا قدام شوية .

شوية والاقية قاطع تركيزنا تاني " الله يلعن إللي علمك برمجة يا آرون "

يا هريدي إرحمنا ، يقولي ، يا طارق متخلف ، والله متخلف ، مش عارف هو بيكتب أكواد إزاي ، هو آرون دا كان مبرمج ولا المدير جايبه من اي حنة كذا ومعلمة شوية برمجة .

طبعا وضع هريدي كان مختلف عني ، لما كان يعمل الحركتين دول ، كنت بروح أقعد معاه وافهمه الاكواد ماشية إزاي ، لكن انا لو كنت فضلت ادعي علي آرون سنة ، مكنش حد هيسمعني ، كنت وحيد ، بين اربع جدران في غرفة ، مكنتش بسمع إلا صدي صوتي وانا بدعي عليه ☺ .

وهريدي كل ما حاجة تقف معاه يدعي علي آرون عشان اروحله ، و اشوف إية إللي واقف معاه في الشغل بتاعه وأفهمه عشان ميبوظش حاجة تانية وبردوا كان في حجات هريدي بيعملها تبوظ شغل عندي ، لان كل حاجة مرتبطها ببعضها . ودا كان وارد يحصل من هريدي عشان هو لسة جديد في الشغل . فكنت لما بعمل تيست او تجريب للغشل بتاعه ، اي حاجة احس انها هتبوظ شغل في حنة تانية كنت بروح اصلحها بنفسني .

المهم جية المدير ووصلنا اللاب توب بتاع هريدي بشاشة العرض ، يلا يا عم هريدي شغل لنا اي حاجة فرفشة كذا ، قصدي اتفضل ورينا شغلك ☺ .

بدأ هريدي يثني علي نفسه وعلي مجهوده العظيم في العمل علي أكواد آرون وطبعا انا والمدير خلاص هنفرقع ، هريدي إبدأ يلا باول شاشة و إنجز عشان المدير مش فاضي .

بدأ هريدي يشرح ويكلم ، وبدأ المدير يسأله ويقوله طب جرب كذا ، طب لو عملنا كذا هيحصل إية ؟ وهريدي يجاوب مرة ، ويغلط مرة ، ووشة يحمر مرة . المدير راح ماسكه بقي ، قاله انت كدا مش فاهم اللوجيك كلة كويس (أساسيات البرنامج) واكيد فية حجات هتغلط فيها ، حاول تركز زيادة ومتسرحش وانت شغال ولو حاجة وقفت معاك إسئل طارق او إسئلني .

أوبيااااا ، حاول متسرحش ، دي كلمة دينا ، الكلام علق مع المدير ، إنت اللي جبتة لنفسك يا هريدي، شاطر عمال تثني علي نفسك ، طب لما تتأكد ان كل حاجة سليمة الاول إبقى قول إللي انت عاوزه .

الحمد لله الموقف عدي علي خير وشغل هريدي كان كويس مش وحش ، لكن المدير حب يزنقه ويغلطه عشان ميحسش إنه جامد يعني ومش كل شوية يكلم عن نفسه كتير .

بعد عرض شغل هريدي قعدنا مع المدير عشان يدينا الشغل الجديد بتاع الاسبوع الجاي ، وتنفق علي مواعيد رمضان ، طبعا مواعيد رمضان غير الأيام العادية ، يعني المفروض الشغل من ٩ صباحا إلي ٣ عصرا ، يا سلام إية الدلع دا ، بعد ما كنا بنروح مرة الساعة ٦ ومرة الساعة ١٢ ، هنروح الساعة ٣ ، دلع عيني دلع ، مرحي مرحي .

لكن المدير كان له وجهة نظر تانيه ، قالنا انتوا مش هتعرفوا تروحو من الزحمة ، الساعة ٣ دي البلد كلها هتبقى في الشارع ، كله مروح ، يعني ممكن توصولوا الساعة ٩ بالليل ، فالأفضل انكموا تقعدوا في المكتب لبعده المغرب تظفروا وتصلوا وتروحو ، ودا احسن ليكوا عشان متتعبوش في المواصلات ، لان الواحد

إتفقت مع سامح وهريدي اننا هنقول للمدير إن الاتوبيس هيتحرك الساعة ٣
وهيوصل علي الساعة ٥ ومش هنجيب سيرة الاتوبيس بتاع الساعة ٤ والا
هيقولنا اقعداو للساعة ٤ ودا مش كويس
قلنا للمدير ، قال اوك مفيش مشكلة بس طبعا كان يقوها من غير نفس خالص

وبدأ الشهر الفضيل ، معظم الأيام كنت بروح انا وهريدي في الباص الساعة ٣
وسامح ودينا كانوا بيتأخروا عشان المشروع إللي شغالين فيه كبير وفيه موعد تسليم
قريب ، ودينا كانت بتوصله بالعربية بتاعتها لانها ساكنة في الشارقة . كان اوقات
بيوصل في آذان المغرب واوقات المغرب بيآذن عليهم في الطريق واوقات كان بيروح
معانا . وقبل ما يخلص اول اسبوع من رمضان ، المدير اتصل بيا من عمان في يوم
الساعة ٥ ونص كدا ، كنا لسة واصلين الشقة انا وهريدي وسامح .

المدير : الو إزيك يا طارق عامل اية ؟ وصلتوا الشقة ولا لسة ؟

انا : اه الحمد لله ، لسة واصلين حالا

المدير : طيب حمد الله علي السلامة

انا : الله يسلم حشرتك

المدير : بص يا طارق ، انا ملاحظ إن البرفورمانس (الأداء) بتاعكوا قل جدا
و موضوع الساعة ٣ دا مش هينفع خالص ، انا مش جيبكوا من مصر وواحد
لكوا شقة بالشىء الفلاني عشان تيجوا تشتغلوا ٣ ساعات وتروحو ، إحنا
مزنوقين وإن عارف دا كويس ، فيا إما تفضلوا في المكتب وتمشوا بعد المغرب ،

يا إما تشتغلوا من الشقة بعد الإفطار وكل واحد معه اللاب توب بتاعه ، فكروا في الموضوع ورد عليا إنهاردة ، انا مستني منك إيميل يلا سلام .

قلت في سري ابوة كدا اظهر علي حقيقتك ، اظهر وبان عليك اللعنة مش الأمان 😊 . إللي مزنوق يا خويا يروح الحمام ، ولو إنت مزنوق علي طول ، هاتلي حمام متنقل ، بس متقرفناش كل شوية ، دي أيام مفترجة ، يعني ممكن أحلق شعري زيروا واقعد ادعي عليك طول الليل.

قررت عمل إجتماع طارئ مع هريدي وسامح ، عشان ناخذ قرار شجاع ، نوقف به جبروت المدير ، ونعطية درسا لا ينساه في التعامل مع الشباب المصري المكافح إللي زينا، واتخذنا القرارات التالية :-

١- الموافقة علي العمل بعد الإفطار وأمرنا لله ☹️ .

٢- توحيد الدعاء علي المدير وقت الأذان ، عسي أن يستجيب الله لنا ويريحنا منه .

٣- ان يقوم المدعو : طارق بتجهيز الإفطار ثلاث ايام في الاسبوع في حين أن يكون المدعو هريدي " مانتخ ونايم "

٤- ان يقوم المدعو : هريدي بتجهيز الإفطار ثلاث ايام في الاسبوع في حين أن يكون المدعو طارق " مانتخ ونايم "

٥- ان يقوم المدعو : سامح بغسيل الاطباق يوميا قبل وبعد الإفطار لعدم وجود خبرة مسبقي في تجهيز الإفطار .

٦- يظل المجلس في حالة إنعقاد دائم لمتابعة كل ما هو جديد ، والله الموفق .

وبدأنا نشتغل بالليل ، وإللي بطنة ملانة ومش قادر يشتغل ، وإللي يدخل الحمام وميطلعش منه ، وإللي ياخذ اللاب ويقعد علي السرير شوية ، وياخذ اللاب في حضنة وينام شوية ، وضع كان صعب الصراحة .
لكن هل الوضع هيستمر علي كذا ، نشتغل بالنهار ونروح نجهز الإفطار ونقعد نشتغل بالليل زي البطريق؟ و هل المدير هيعتبر موافقتنا علي الشغل بالليل دي ضعف وهيحاول يستغلها أكثر؟ يا تري مين هيعمل مشكلة مع المدير؟ و يا تري مين هينزل مصر قبل نص رمضان ، إنتظرونا في المقال القادم 😊 .

أسبوع من العذاب

بعد إجتماع مجلس إدارة الشقة ، و صدور البيان رقم (١) الموجة إلي المدير ، بدأنا في التنفيذ العملي ، بقينا نروح الشغل الصبح ، نرجع قبل المغرب ، نفطر ونروح نصلي العشاء والتراويح وبعدين نروح نشتغل، فيه مننا إللي كان بيصلي التراويح كاملة وفيه إللي بيصلي ٤ ركعات ويتسحب زي الحرامي . وبعد كذا كل واحد يلزم جهازه ويشتغل لحد الساعة ١١ او ١٢ وتاني يوم الصبح بيعت التقرير اليومي بشغل النهار وشغل الليل .

المدير كان حاسس انه ممكن يستغلنا أكثر من كدا ، أصل موضوع الشغل بالليل دا مش مضمون . أكيد الشباب بيقعدها يهزروا او يلعبوا او يخططوا لحجات ، ودا مش في صالحه ، فإستنادا للبيان رقم واحد وهو الموافقة علي العمل ليلا ، أي بعد الإفطار ، وحيث أن البيان لم يحدد المكان الذي سيتم العمل فيه سواء في الشقة او في مكان آخر ، قرر المدير تخليه عن منصب " المرؤة والشهامة " وتكليف أعضاء مجلس إدارة الشقة " طارق وهريدي " بالعمل ليلا عند العملاء - ومحدث يفهم غلط .

بصوا يا شباب ، إحنا هنحاول نستغل فترة رمضان وإن العملاء المهمين بتوعنا الشغل عندهم خفيف بالليل، ونروح ننزل اخر نسخة من البرنامج عندهم ، ممكن يحصل لخبطة شوية عشان الشغل إللي آرون نزلوا عند العملاء دول ومعدناش نسخة ، فانتوا هتشوفوا الفرق وتعملوه عند العميل وبعدين تنزلوا النسخة ، تمام كدا . كان هذا الحديث علي لسان المدير في اول إجتماع بعد البيان الاول .

نظرت إلي هريدي نظرة حزن وأوغرورقت عيناى بالدموع ثم هممت بالإجابة علي
المدير : اوك إن شاء الله

المدير : هتروحوا عند كل عميل وتعملوا تقرير عن حالة النسخة إلي عنده ، وإية
الإختلافات بينها وبين النسخة الاخيرة بتاعتنا وهتحتاج وقت قد إية عشان تتعمل
وتبعتهولي وأول ما تخلصوا التعديلات دي ، هتنزلوا نسخة تجريبية عند العميل ،
يجربوها لمدة يوم ، بعد كدا تأخدوا موافقة كتابية من العميل قبل ما تنزلوا النسخة
علي كل الاجهزة ، لازم الموافقة قبل ما تنزلوا النسخة ، عشان لو حصل مشكلة
منروحش في داهية .

طارق : إن شاء الله

هريدي في سره ، شوفتها في عنيه : روح يا شيخ ، داهية تاخدك إنت ودينا في
يوم واحدة .

انا من عنيا لهريدي : يارب يا هريدي يارب ، بس حرام دينا ، دي طيوووية
خاالص ^ _ ^ .

كان عندنا عملاء في دبي والشارقة وعجمان لكن العملاء المهمين إلي المفروض
نعمل عندهم الشغل دا كانوا حوالي ٤ عملاء ، عميل في دبي ، و ٣ عملاء في
عجمان .

عميل دبي كانت شركة كبيرة ، والبرنامج عندها بقالة ثلاث سنين فكمية البيانات
اللي في البرنامج كبيرة جدا ، كذلك في عميل في عجمان نفس النظام ، والباقي
عميل من سنة او سنتين .

بدأنا بعمل دي ، روحنا اول يوم من الصبح ، عشان مش هينفع نروح الشقة في
الشارقة قبل الإفطار ونرجع تاني دي بعد الإفطار .

المسئول عن الكمبيوتر هناك ، إسمه "راشد" ، بكستاني ، إستقبلنا وظبط مكان ليا
أنا وهريدي ، وقالي تعالي أعرفك علي مدير الحاسبات مصري زيك ، قلت بجد ؟
طب الحمد لله ، مصريين زي بعض وهنفهم بعض ايوة كدا ،دنا مصري وابويا
مصري ، قهووة المصريين ، ، قهووة المصريين ، الله يرحمك يا عوكل
، كنت محظوظ بشروق وانا محظوظ بدينااا ^_^ .

**Rashid: Mr.Ahmed, this is Mr.Tarek ,Software engineer
coming to install new version .**

أحمد : اهلا وسهلا ، انت إللي مكان أروون ، بص بصراحة ، انا مش عاوز اي
تعديلات ، آرون كان بيعي ينزل نسخة عشان يصلح مشكلة ، يسبب لنا ٣٠
مشكلة ، وكلة بيعي فوق راسي انا ، النسخة إللي عندي زي الفل ، عارف
مشاكلها فين وعارف بجلها إزاي ، انا مش ناقص والله .

الله الله ، هي من اولها كدا ، والمدير عملي البحر طحينة ، وهتنزل نسخة تجريبية ،
ويوافقوا عليها ولازم يمضوا قبل ما تنزل النسخة ، وهما مش طايقين حد اصلا ،
روح يا شيخ منك لله .

طارق : يا أستاذ أحمد ، شغل المصريين غير شغل الهنود وانت عارف كدا ، وبعدين
لو ظهر اي مشكلة ، اديني رنة هتلاقيني عندك ، وانا هنزلك نسخة علي جهازك
تجربها الاول ، متخفش والله ، إحنا جيين نظبط مش نبوظ .

أحمد : يا سيدي اهلا وسهلا ومعلش ان كنت اتكلمت معاك كدا وإحنا اول مرة
نتقابل ، بس بصراحة آرون كان مورينا الويل ، انا لو مسكتة والله لأعلقة علي
باب الشركة لما بيانله صاحب ، دا كان ببيجي يستخبي مني .

طارق : ربنا يستر ، انا الحمد لله طويل ومش هتعرف تعلقني _ ^ .

أحمد كان طويل قوي ، اطول مني ، وآرون كان من القريبين من الارض ، حاجة
صغيرة كدا .

خلصت مع أحمد كلام علي أمل إن النسخة الجديدة تعجبه ورحنا علي المكان
إلي راشد طبهولنا

وخدنا نسخة من البرنامج إلي عندهم وبدأنا نقارن بين النسختين .

المفروض إن لكل عميل بعض الإضافات والتقارير الخاصة بيه وإلي بتختلف من
عميل لآخر والحجات دي كانت مع آرون ، فلما ساب الشركة ومشى خد
الحجات دي معاه و مكنش معانا نسخة منها . فشغلتنا الأساسية إننا نظبط
الإضافات دي تاني عشان العميل ميحسش إن فيه حاجة ناقصة .

بدأنا نكتب الملاحظات وطلبنا التقرير للمدير وقلنا ان التعديلات هتاخذها يوم
ونص عشان تخلص ، رد علينا في الايميل وقال متمشوش إنهاردة إلا لما تخلصوها
عشان إحنا مضغوطين ومفيش وقت وأبقي تعالوا بكرة نزلوا النسخة التجريبية علي
طول .

طب أدعي عليك باية وإحنا في شهر مفتوح ، يعني كدا مش هنروح إلا في آخر
الليل .

المهم فضلنا نظبط في البيانات ومشاكلها وطبعا كل الموظفين مشيوا الساعة ٣ ما عدا بتاع الكمبيوتر ، راشد وواحد زميله ، فضلوا معنا ، قاعدين علي النت وإحنا عمالين بنت . والمغرب أذن وطبعا مش معنا فطار ، فجبولنا كل واحد بتاعة زبادي لحد ما نروح ، لان مفيش مطعم قريب ولو طلب دلوقتي ولا حد هيعبرك ، مين هيجبلك دليفري المغرب في رمضان .

هريدي : علي آخر الزمن أفطر زبادي ؟

طارق : معلش يا هريدي ، إحمد ربنا ، لو عاوز بتاعتي كمان خودها وخليني أخلص شغل عشان نروح

صلينا في الشركة المغرب والعشاء وكأنا مش في رمضان وفضلنا شغالين لحد ١١ ونص بالليل ، الصراحة شكلنا كان يصعب علي أي حد ، مساكين كدا ، نزلنا من الشركة و لقينا تاكسي علي طول ، الوقت كدا كدا متأخر وممكن تلاقي تاكسي بسهولة والطريق بيبيقي فاضي وصلنا البيت في تلت ساعة وكنا مقتولين ، وأول ما دخلنا الشقة ، بصينا علي غرفة سامح لقيناه نايم ، قلنا يا بختك يا سامح ، بصينا للمطبخ وبعدين بصينا لغرفتنا ، إية دا ، سرير يا هريدي ، اه سرير يا طارق ، طب إجري إلحقه قبل ما يهرب ، إجري . سرير .. سرير .. سرير .. أحمدك يارب .

وكل واحد إترمي علي سريره زي اللي بيغرق كدا واول ما يوصل الشاطيء يترمي عليه زي المقتول . وفي لحظة كنا في سابع نومة ومن غير إفطار ، علي أمل إننا نعوض دا في السحور ، ولكن من كتر التعب والإجهاد محسناش الا والفجر بيأذن

. يعني ولا إفطار ولا سحور . وبدل ما نقول دعاء الاستيقاظ ، الحمد لله الذي
أحيانا بعد إذ أماننا وإلية النشور ، قلنا حسبي والله ونعم الوكيل فيك يا عامر (
المدير) .

روحنا الشغل الصبح في الباص ومن هناك خدنا تاكسي علي العميل بتاع دبي ،
نزلنا نسخة تجريبية من البرنامج علي جهاز مدير الحسابات وقلنا هنرجعلك بكرة
تكون جربتها عشان ننزلها علي كل الاجهزة . مدير الحسابات بصلي بإستغراب
كدا وقال بلهجة إستنكار ، بكرة مين ياعم الحج ، هو سلق بيض ، انا عاوز علي
الاقل إسبوع ، قال بكرة قال .

إية ياعم المدير إللي من بولاق دا ، انا حاسس إني مش في دبي خالص وممكن بعد
شوية الاقبة بيضربني . قتلته اوك ، هكلم المدير بتاعي وأتصل بيك إن شاء الله ،
قالي اوك ماشي .

ورجعنا علي الشركة بتاعتنا بعد الضهر وبعث إيميل للمدير باللي حصل ، رد عليا
وقالي خلاص كل يومين إتصل بيه وشوفه وصل لحد فين . وقال بعد الفطار إبدأوا
في عملاء عجمان .

عملاء .. عملاء .. عملاء .، إية ولاد الخونة دول مش ورانا غيرهم ^_^ .
المسجد كان قصاد العمارة إللي إحنا ساكنين فيها ، يعني لو بصين من شبك
الغرفة بتاعتي ، بشوف المسجد .

فطرنا وروحنا صلينا العشاء في المسجد و قبل صلاة القيام ما تبدأ ، طلعت انا وهريدي وخذنا تاكسي وروحنا علي اول عميل في عجمان ، ومن حظنا كان فية مسجد جنب الشركة ، روحنا جري عشان نلحق اللي باقي من صلاة القيام .

بعد ما القيام خلص ، روحنا علي العميل ونفس الخطوات ، خدنا نسخة من البرنامج وعملنا مقارنة ، وكانت الاختلافات بسيطة خلصناها يومها ونزلنا النسخة التجريبية وطلعنا من عند العميل الساعة ١٢ ونص بالليل ، ونفس النظام وصلنا الشقة مقتولين ، وأول ما دخلنا الشقة ، بصينا علي غرفة سامح لقيناه نايم ، قلنا يا بختك يا سامح ، بصينا للمطبخ وبعدين بصينا لغرفتنا ، إية دا ، سرير يا هريدي ، اه سرير يا طارق ، طب إجري إلحقه قبل ما يهرب ، إجري . سرير .. سرير ..

سرير .. أحمدك يارب

وبردوا مقدرناش نصحي نتسحر ، فضلنا ٣ ايام ورا بعض منتسحرش لما خلاص كنا هنموت بجد ، قمة الإرهاق ، مفيش إحساس خالص إنك في رمضان .

الوضع مع سامح كان قريب مننا ، بس كان افضل شوية ، يعني كان بيروح علي الساعة ٩ او ١٠ بالليل من المكتب ولما يروح يكمل شغل لحد الساعة ١٢ وبعدين ينام .

الحجات دي كلها كانت في تاني اسبوع من رمضان ، هريدي كل يوم يتزمر ويتخفق من الوضع أكثر وانا كنت مضايق جدا وسامح كان مضايق جدا جدا ، فقررنا عمل إجتماع لمجلس إدارة الشقة لنتناقش حول الوضع الراهن والمشتعل ،

طارق : إية يا جماعة ، الوضع كدا مش كويس خالص ، إحنا قربنا نموت ، دي مش شركة ، دي سخرة

هريدي : انا بفكر أدخل في المدير شمال ومعنديش مشكلة إني أنزل مصر ، دا ذل
ياعم الحج

سامح : وانا معنديش مشكلة إني ارجع مصر ، إية المشكلة يعني

طارق : مش كدا يا جماعة ، احنا سبنا شغلنا في مصر وسفرنا عشان نعمل حاجة ،
يعني المفروض منخدش قرار زي دا بسهولة كدا ، لان دا هيبقي فشل ، وياعلم
هنعرف نرجع شغلنا في مصر ولا هنروح شغل تاني ولا هنعمل إية ؟ إحنا نستحمل
شوية ، مش حلوة لما اهلنا ولا أصحابنا ولا حد يقول علينا فشلنا في الغربية ورجعنا

وفي نهاية الإجتماع اتخذنا القرارات التالية :-

١- أن نصبر ونحتسب ، فلم نأتي إلي دي لكي نمرح ونلعب وإنما جئنا لكي
نكون أو لا نكون

٢- ان نتحدث مع المدير لتخفيف العمل في الايام المتبقية من شهر رمضان .
والله الموفق ،

لكن هذة القرارات لم تكن كافية بالنسبة لهريدي ، وكان يوجد شيئاً ما بداخله ، لم
يفصح عنه إلا في الإجتماع مع المدير وأمام الجميع ، كانت تصرف غير مقبول
بالمرة ، صدمني وجعل المدير يتخذ قرار لم يؤثر فقط علي هريدي بل أثر علينا
جميعاً .

مائدة الرحمن

شوفنا مع بعض أسبوع من العذاب ، وقد إية كانت ايام صعبة ، كنا بنختار بين النوم او الأكل ، الفطار اللي المفروض يكون الساعة ٦ ونص ، لكن عشان ظروفنا بيكون الساعة ١٢ بالليل او واحدة ومعظم الوقت بنفضل النوم ودمج الفطار مع السحور ودا مبيحصلش عشان مبنصحاش للسحور أصلا من التعب . بعد كدا الموضوع بدأ ينتظم شوية وبدأنا نفطر في الشقة وبعدين نروح لعميل بعد صلاة العشاء ، فكان واحد مننا بيجهد الفطار ، وفقا للبيان رقم واحد ، يا طارق ، يا هريدي ، وسامح بيغسل .

اليوم إللي كنت بجهز فية ، هريدي بينام اول ما يوصل من الشغل لحد الفطار ، والعكس لو هو اللي بيجهد ، أنا بنام لحد الفطار .

في يوم هريدي قالي ، هو مفيش موائد رحمن هنا زي مصر ، ونريح نفسينا من موضوع تجهيز الفطار دا ، قتلته لا ياعم مظنش ، انت في الامارات ، الحجات دي في مصر بس ، قالي ياعم متسأل يمكن يكون فية ، قتلته معرفش حد هنا عشان اسئلة ، وعدي الموقف علي كدا .

وفي يوم كنت انا إللي بجهز الفطار ، وبعد ما طبخت الرز والفراخ وعملت السلطة ، وكان لسة بيجي نص ساعة علي المغرب كدا ، فتحت جهازي وقلت أقعد علي النت شوية ، لكن عشان معندناش شبكة ، فكنت بقف باللاب توب في الشباك ، أسرق اي شبكة ويرلس مفتوحة ^_^ .

خدنا علي مكان قاعد فية مصريين وقال معلش خدوا الشباب جنبكوا وانا هجبلهم أكل ، ووسعولنا مكان ، وهو دخل جوا المسجد ، وجاب أكل زيادة لينا ، وعصير وتمر ولبن إسمة "لبن اب Laban Up" علي وزن سفن اب .

طبعا اول مرة اشوف اللبن دا ، ملناش في الحجات دي ، فسامح بيستلني علي أساس إني اقدم واحد فيهم ، إية "لبن اب" دا ، قتلته مش عارف لبن ام ، دا لبن اب ، واضحة يعني ^_ ، كان ماسك العلبة في إيده ، راحت واقعة من إيده ، قتلته هات ، إنت مش وش نعمه ^_^ .

الأكل كان عبارة عن رز برياني ، وفراخ ، زي اللي في الصورة ، رز بسمتي وعلية حجات كتيرة كدا معرفهاش ، بس طعمة جميل . وكان يوم لحمة ويوم فراخ ، بيدلعوا الناس ، الله يكرمهم .

أذن المغرب ، كلنا تمر وشربنا عصير ، ولسة هنبدأ ناكل ، إية دا فين الملاعق ، هناكل إزاي ، لقيت الناس شغال بإيدها ، هريدي بصلي وانا بصيت لسامح وسامح كان عاوز يقوم ، مفيش حد فينا بيعرف ياكل بأيده كدا ولا عمرنا جربناها اصلا ، قتلتهم بصوا ، زي ما الناس بتعمل اعملوا

وبدأنا نمد إيدينا زي الناس نضغط علي الرز عشان نطلع بيه في إيدينا ميطلعش ، امال الناس دي الرز بيطلع في إيدها إزاي ، كنا عاملين زي اللي بيصطاد سمك ، المفروض تضم صوابعك الاربعة وقصادهم صابع الابهام وتضغط علي الرز وبعدين ترفع إيديك تكون مليانة رز ، دا المفروض ، لكن إحنا كان بيطلع في أيدينا حبيتين رز ، خمس حبيبات ، لا تسمن ولا تغني من جوع .

مرة في إثنين في ثلاثة ، بدأت إيد الواحد تتعود و تمتلي رز ، لكن قبل ما يوصل جهاز الادخال "الفم " بيكون وقع ٨٠ في المية منة علي الارض ، بقيت عامل زي الطفل الصغير ، اللي بيغرق السجادة أكل ، صراحة كنت مكسوف جدا ، واول ما الرز يقع ، اسحبة تحت الصينية عشان ميينش .

بعد ما خلصنا اكل ، وهما بيثيلوا الصينية ، لقيوا قدامي جبل من الرز ، اللي كان واقف ، كنت في قمة الاحراج ، إية الطفل الصغير دا ^_^ .

دخلنا صلينا المغرب وروحنا ، وكنت مبسوط الصراحة ، أخيرا هنرجع من الشغل ننام ومفيش تجهيز أكل ، سامح قال انا معرفتش افطر ، قلت يعني إحنا إللي فطرنا ، عموما من بكرة ، كل واحد يجيب ملعقة في جيبه ونزل بدري شوية عشان نقعد براحتنا .

حصلت لينا مواقف مضحكة كثير في موائد الرحمن دي ، إحنا الوحيدين إللي كنا بناكل بملاعق في المائدة كلها ، اول ما يبدأ الاكل ، كل واحد يدخل إيداه في جيبه ويطلع الملعة بتاعته ، واول ما يخلص يدخلها تاني .

من أكثر المواقف المضحكة ، في يوم جمعة ، إتأخرنا في الشغل مع المدير وراجعين في تاكسي ، قبل المغرب بنص ساعة ، فقلنا مش هنروح الشقة بتاعتنا ، هنروح علي المائدة علي طول ، التاكسي المفروض بيعدي من قدام المسجد ، فهريدي قال للتاكسي نزلنا قدام المسجد دا ، قتلته إية ياعم ، ينزلنا قدام المسجد فين ، فية حد بيروح مائدة رحمن في تاكسي ، انت عاوزهم يجروا وانا كلهم ، قلت للتاكسي إطلع قدام شوية ، ونزلنا قدام شوية ، ورجعنا مشي ، وكل واحد شايل

شنطة لاب توب في إيدته ، ورايح يقعد في مائدة الرحمن ، الناس كلها بتبصلنا
. ^_^

إفطار مائدة الرحمن دا كان بيخفف عننا كتير بصراحة ، غير الأكل ولبن اب ^_^
، كنا بنفطر مع الناس وبنكلم وكل واحد يتكلم عن مشاكلة في الشغل والاقامة
وحجات كتير .

إنتظروا المقال القادم : هريدي والمدير الجزء الثاني ، قريبا إن شاء الله .

هريدي و المدير - الجزء الثاني

شوفنا في مقال " أسبوع من العذاب " إللي إتعرضنا له انا وهريدي وسامح من ضغط في الشغل ، المعروف إن في رمضان بيكون الشغل خفيف ، سواء شغل خاص او حكومي ، لكن المدير كانت وجهة نظره زي ما قالها ليا في التليفون صراحة "أنا مش جيبيكوا من مصر ، عشان تشتغلوا ساعتين وتمشوا "

وظبط لينا خطة الشغل إللي كادت أن تقضي علينا ، مكناش بنعرف ننام ، شغالين قبل الفطار وبعد الفطار ، في المكتب قبل الفطار ، وعند العملاء بعد الفطار ونرجع البيت متكسرين آخر الليل .

قعدنا مع بعض انا وهريدي وسامح عشان نشوف هنعمل إية ، وهنقول إية للمدير عشان مش هنقدر نكمل بالشكل دا ، وقرر نا إننا هنستحمل ومنحولش نصعد الموضوع او نبين إننا مضايقين ، بس هنطلب منه أننا منروحش لاي عملاء بعد الفطار ونشتغل بالليل ساعتين عشان نلحق ننام ونتسحر .

طبعا إحنا كنا بنحكي كل حاجة لدينا يوم بيوم ، وهي أكيد بدورها بتوصل دا كله للمدير ، يعني المفروض إنه عارف كل إللي حصل معنا في أسبوع العذاب دا . المدير جيه يوم الخميس ، سلم علينا ، وأخباركوا إية ، وأخبار الشغل ، مالكوا ضعفانين كدا لية ، يا قلب امك ، صعبنا عليك بجد ، الراجل الدمعة هتفر من عينه .

قال خلاص إنا عزمكوا علي الفطار إنهاردة ، محمش يروح ، لا شكلنا فعلا صعبنا عليه ، ظلمتك يا كبدي ، هو فعلا كان شكلنا متغير جدا ويصعب علي الكافر ، شعرنا كبر ، عيننا طلعت لبرة ، خدودنا دخلت لجوة ، حواجبنا طلعت لفوق ، وشفافينا نزلت لتحت ^_^ ، بس مع دا كله مكنتش متوقع منه العزومة دي ، والصراحة مكنتش دا السبب الأساسي للعزومة ، كان فية سبب تاني هنتكلم عنه في المقال القادم إن شاء الله .

المدير نادي علي ديننا وقالها إتصلي علي مطعم (.....) مش فاكرا اسمة الصراحة و قالها إحجزي طرابيزة عشان هنفطر كلنا سوا إنهاردة ، وهو إتصل علي اسرته وقاهم هنفطر سوا مع الشباب في المطعم فمتجهزوش فطار في البيت ، الراجل هيعزم الامارات كلها عشان تفطر معانا ولا اية ، دا اية العزومة دي .

بعد ما خلص موضوع العزومة بدأ يتكلم معانا وقال " انا هبدأ في إجراءات الفيزا والإقامة ليكوا انتوا الثلاثة ، بس عايزكوا تطلعوا رجالة ، طارق بقاله فترة معانا وثبت إنه قد المسئولية ، فيا سامح ويا هريدي ، أنا هجازف وأقدملكوا وانتوا لسة مكملتش الشهر فعاوزكوا تطلعوا قد المسئولية .

إحنا كنا مزهولين إحنا الثلاثة ، عزومة ، وفيزا وإقامة ، اية الكرم دا ، هو كان حاسس إننا هننفجر فية ولا اية ، عشان كذا بيعمل إصلاحات سياسية ^_^ ، قصدي إصلاحات عملية ، مع إننا مكناش هننفجر اصلا ، بس خير ، يارب يكون صادق المرادي . وللعلم ، كان فية سبب اخر وراء الحديث عن الفيزا والأقامة ، هنتكلم عنه في المقال القادم إن شاء الله .

فية ناس هتستغرب ، هو لحد دلوقتي لسة مخلصش الفيزا والإقامة بتوعك ، انت بفاك كام شهر في الشركة ، والمفروض إنك بقيت شخص أساسي .

هو دا المفروض فعلا ، من وقت ما آرون مشي ، لكن حصل حاجات كتير بوظت حسابات المدير ، زي المثل اللي بيقول " من أعمالكم سلّط عليكم " .

الشركة كانت شراكة بين المدير ومواطن إمارتي ، وكانت مقسومة جزئين ، جزء سوفت وير ودا خاص بالمدير ، وجزء هارد وير ودا حاص بالمواطن . المهم حصل حاجة بينهم ، معرفش إية هي بالضبط ، تسببت في إنهم هيفضوا الشراكة .

طبعا الخسران الوحيد هو المدير بتاعي ، لان الشركة بأسم المواطن ، وإيجار المكتب بإسم المواطن ، ولما قرروا يفضّوا الشراكة ، المواطن رفض يتنازل عن إسم الشركة او عن المكتب بداعي إن الاسم بقي معروف للعملاء بتوعه والمكتب طبعا إيجار قديم وبإسمه فمش هينفع يغير المستأجر .

المدير كان لازم يختار إسم جديد لشركته ويتأجر مكتب جديد وطبعا دا كلفة كتير جدا ، لان الاسعار كانت نار في الوقت دا ، وأتذكر إنة دفع أكثر من ٦ أضعاف إللي كان بيدفعه كأيجار في المكتب القديم .

لكن الصراحة المواطن كان رجل محترم ، وكان أي حاجات بيحتاجوها علي أسم الشركة القديمة حتى بعد ما أنفصلوا كان بيوافق عليها لانهم لسة مخلصوش تراخيص الشركة الجديدة .

لما حصل الخلاف دا ، مرضيش يمشي في إجراءات الفيزا والإقامة بتاعتي ، لانها كدا هتطلع علي الشركة القديمة وهيضطر بعدها يعمل نقل إقامة ليا علي الشركة

الجديدة ، فقرر إنه يستني لحد ما ينتهي من تراخيص الشركة الجديدة وبعدين يمشي في إجراءات الفيزا و الإقامة بتاعتي .

بعد ما تراخيص الشركة الجديدة خلصت ، كان لازم يبدأ في إجراءات الإقامة بتاعتي بسرعة ، لاني دخلت في المخالف ، بس هو كان محتار ، يبدأ في إجراءات إقامة هريدي وسامح ولا يبدأ في إجراءات إقامتي انا بس الاول !! .

لكن هو قرر إنه هيمشي في الإجراءات لينا إحنا الثلاثة ، حسب كلامه يعني ، هو كان بيقول لينا الكلام دا وأنا شايف في عينه التردد ، لكن كنا مبسوطين ، أخيرا هيبقي لينا إقامات ، عشان نعرف نطلع عينه من غير خوف ولا تردد .

بعد الحديث عن الإقامة ، المدير بدأ يتكلم عن نظرتة المستقبلية للشركة ، وإننا عاوزين نخلي برنامج الشركة أفضل برنامج عقارات في الامارات والخليج كلها ، وهنحتاج معانا ناس مبيعات ، بعدين بص لهريدي وقاله ، متشوفلنا واحد مبيعات كويس من الشركة اللي انت كنت شغال فيها في مصر ،

هريدي : طيب والمرتب ظروفه إية ؟

المدير : هياخد نفس المرتب بتاعك

هريدي ما صدق الفرصة تجيله للكلام عن المرتب ، رد وقال ابوة بس المرتبات هنا ضعيقة قوي ، فية شركات بتدي مرتبات حلوة ، أضعاف المرتبات هنا ونفس الخبرات ، والناس إللي في مصر بتشتغل علي برامج كبيرة ، لكن البرنامج بتاع الشركة هنا صغير ، ميجيش موديول Module (جزء او قسم) في برنامج الشركة اللي انا كنت شغال فيها في مصر ، ومظنش حد هيرضي ييجي علي المرتب دا .

أنا أتصدمت من كلام هريدي ، يخرب بيتك يا هريدي ، الراجل لسة قايل همشي في إجراءات الفيزا ، وخليكوا رجالة ، وانت تيجي تقوله هيرضي ييجي علي المرتب دا ، الراجل عمال يقول عاوزين نخلي برنامج الشركة أفضل برنامج عقارات في الامارات والخليج كلها و إنت تيجي تقوله البرنامج بتاع الشركة صغير وميجيش حاجة في برامج الشركة في مصر .

انا بصيت للمدير ، لقيت وجهه بقي احمر ، والعفاريات بتتنطط علي كتفه و قام رادد علي هريدي وقال : امال انت قبلت المرتب دا لية ؟ وقيلت تشتغلي علي برنامج صغير لية؟

هريدي بأسلوب يخلي الواحد يشد في شعره: انا قلت أجرب السفر ،أهو تغيير جو ، ولما قدمت إستقالتني ، إتخيلوا عليا عشان أفضل ، وعرضوا عليا مرتب أكثر من إللي هوفروا هنا ، بس انا كنت خلاص قررت السفر .

المدير شاط أكثر من كلام هريدي وشعره بقي أحمر من الغيظ ، وراح راجع لورا بالكروسي وحاطط رجل علي رجل بإسلوب سخرية قال لهريدي ، يعني انت عاوز تاخذ مرتب كبير ، عاوز كام مثلا ، ١٠ الاف درهم ، ١٥ الاف درهم ، اوك مفيش مشكلة ، بس اية مؤهلاتك إللي هتخلي شركة كبيرة تقبلك وتديك المرتب دا ، الإنجليزي عندك ضارب ، وبتخاف ترد علي العملاء ، ومعندكش خبرة في البلد ، الموضوع مش خبرة برمجة وبس ، الموضوع برمجة وخبرة بسوق العمل ولغة قوية وحجات كتير معندكش منها حاجة ، وووو ... ، وووو ... ، وووو ...

انا عمال ابص للمدير وابص لهريدي ، هريدي إتغسل من الكلام ، ومنطقش .

طبعاً في كلام كثير المدير قاله مش صح ، لكن هو بيغسل في هريدي وخلص
عشان يحسسه إنه غلط لما قال كدا وإنه في نعمة والمفروض ميتكلمش .

بعد كدا عم الشركة صمت رهيب كل واحد شغال مع نفسه ولا نفس ، ةعلي
الساعة ٢ كدا المدير خرج ، وهو في الطريق اتصل بيا ،

المدير : إنت فين ؟

طارق : في المكتب

المدير : طب إطلع برة المكتب

طارق : حاضر ، وفي سر هو هيضربني ولا إية

طارق : أيوة يا بشمهندس ، أنا برة دلوقتي

المدير : بص يا طارق ، هريدي مش كويس ، وطريقة كلامة مش كويسة ، إللي
حصل إنهاردة وإللي حصل الاسبوع إللي فات منه يدل علي إنة مش كويس .

إللي حصل في الاسبوع إللي فات ، إن هريدي طلب من المدير مرتب علي الأيام

إللي أشتغلها في الشهر إللي فات ، هريدي كان بدأ شغل آخر ٥ ايام في شهر

أغسطس ، فالمدير قاله مرتب علي إية ؟ انت لسة مكلمتش شهر عشان تاخذ

مرتب !

هريدي : انا حصلي كدا في الشركة غللي كنت شغال فيها في مصر وخذت مرتب

٦ ايام

المدير : احنا مش فواعلية بنشتغل باليوم

هريدي : انا ممعيش فلوس وكنت عامل حسايي علي كدا ، عشان كدا جيت من مصر قبل بداية الشهر

المدير : ماشي ياعم ...عنيننا ليك ، وإداله مرتب ٥ ايام ، بس كان مضايق جدا وقتها .

فطبعا المواقف جمعت بعضها وجية كلام هريدي الاسبوع دا مع طلبه الاسبوع إللي فات وسخنوا المدير قوي ، أنا لما حسبت ان المدير لسه هيتكلم كثير ، رحنت مشغل التسجيل في الموبيل بتاعي (اول موبيل صيني نزل في السوق المصرية في ٢٠٠٨ كان ب ٧٠٠ جنية ، يحتوي علي راديو وتليفزيون وساعات أعلي من الميكروفون وخاصة تسجيل المكالمات) ، وبدأت تسجيل المكاملة كلها ، المدير إتكلم عن طريقة طلب هريدي للمرتب ، وإنة ممكن يخصم تذكرة السفر قصاد المرتب دا ، وبعدين إتكلم عن طريقة الكلام عن البرنامج والمرتب و في آخر المكاملة قالي متقولش لهريدي الكلام دة كلة ، انت قوله يهدي شوية ويشنغل كويس عشان يحافظ علي وظيفته وإلا هينزل مصر .

انا قصدت بالتسجيل دا ، إن هريدي يسمع الكلام مباشرة من المدير ، عشان يتصدم ويتظبط ، وبعد كدا يفكر قبل ما يتكلم ، لاني عارفه كويس ، لو قتلته متكلمش وترد ، يقولي انا بحب ابقى أكتيف ، ومحبش اشتغل وبس ، لازم يكون ليا رأي ، فقلت متعفش نفسي كثير في الكلام وأديله التسجيل يسمعه وخلص .

لسماع التسجيل كامل :

<http://youtu.be/BMd2Im0LSMw>

بعد كدا روحنا علي المطعم عشان الفطار ، عزومة المدير ، ودة هنفرد ليها مقال كامل لما فيها من مواقف مضحكة وشيقة . المهم وإحنا بنفطر ، وفي وسط الكلام ، هريدي قال إحنا عايزين تليفزيون في الشقة ، قلت في سري هية ناقصة يا هريدي ، انت مسحوب من لسانك ، طبعا لسة متكلمتش مع هريدي علي إلي حصل بيني وبين المدير ، لان منفردتش بية خالص في المكتب ، وقلت نتكلم بالليل عشان نتناقش علي راحتنا ، المدير بصلي كدا وضحك بسخرية فيما معناه ، شايف مجايك ، وبعدين رد علي هريدي وقال ورينا شغلك الاول وابقى اطلب اللي انت عايزة ، هريدي قال مش انا اللي عايز التليفزيون ، دا سامح اللي كان بيقول عاوزين تليفزيون في الشقة ، المدير قال وانت المحامي بتاعهم يعني ، في طريقة هزار ، بس كان بيكز علي اسنانه .

السكن بتاعنا مكنش فية تليفزيون ، كان فية مقومات الحياة ، مطبخ كامل ، غسالة ، ثلاجة ، بوتجاز ، والسرير بتاعتنا ، لكن مفيش حجرات للرفاهية ، وانا بالنسبالي مبحبش اتفرج علي التليفزيون ، دا غير ان الموبيل الصيني بتاعي كان فية تليفزيون فلما كنت احب اتفرج ، كنت اتفرج عليه ، وأصلا مفيش وقت للتليفزيون ، لكن سامح هو اللي كان بيحب التليفزيون وهو اللي علق علي موضوع التليفزيون دة وإحنا في الشقة لكن هريدي ، المحامي العام ، هو إلي إتكلم .

لما روحنا ، وقبل ما ننام ، قلت لهريدي ، فإكر لما جالي تليفون من المدير في المكتب وطلعت برة ، قالي اه ، قتلته كان بيتكلم عنك ، هريدي سئلني : بيكلم

عني في إية ، قتلته ولا حاجة ، دا بس بيشكر فيك ، انا مش هقولك علي إللي
قاله ، أنا هخليك تسمعه ، وشغلت التسجيل ، وإديت الموبيل لهريدي وسمع
المكالمة .

بعد ما المكالمة خلصت ، هريدي قالي ، لو عندك اي تعليق قوله ، قتلته لأ
معنديش اي تعليق ، انا هروح أنام ، أصلي تعبان واول ما أحط راسي هنام علي
طول ، مش زيك هتفضل سهران ، مش انت عاوز تبقي نشيط و أكتيف ؟ خلي
إلاكتفة تنفعك !! هات الموبيل ، يلا تصبح علي خير ، وإبقي طفي النور .
موقف هريدي في العزومة خلي المدير يتخذ قرارات خطيرة منها إنة وقف إجراءات
الفيزا والإقامات و.....

نكمل المقال الجاي إن شاء الله عشان هريدي طفي النور ^_^ .

عزومة المدير

لم يكن سبب عزومة المدير في الاساس هو أسبوع العذاب ، لكن كان أحد الثلاثي المرح (طارق - هريدي - سامح) علي موعد مع السفر ، وفقا للسؤال الذي طرحته علي الصفحة " تعتقد مين هينزل مصر في رمضان ؟ " كانت معظم التوقعات تشير إلي هريدي ثم طارق ، وحصل سامح علي اقل التوقعات . لكن في الحقيقة فإن المدير لم يكن بالسذاجة لكي ينهي عمل هريدي قبل إنتهاء مدة الزيارة ، وإلا اصبح هو الخسران ، كذلك الحال مع سامح ، إذا لم يبق إلا هذا الفتى الغلبان ، الضعفان ، إللي مش كسلان ^_^ ، أكيد عرفته ، مفضلش إللي هو .

لو تفتكروا ، لسة مفيش ولا إقامة إتعملت عشان نقل الشركة ، لكن الزيارة بتاعتي إنتهت ، كانت شهرين قابلة لتجديد شهر ، لكن لازم التجديد يكون قبل ما الزيارة تنتهي ، وعشان المدير او دينا مأخدوش بالهم من الموضوع دا ، وأنا طبعا معرفش في الحجات دي ، فالشهرين خلصوا من غير ما يجددولي الشهر ، فكان لازم أخرج من البلد ، وإلا هيبدا عد غرامة قدرها ١٠٠ درهم يوميا ، لأني اصبحت مخالف ، او مقيمة إقامة غير شرعية ، وهناك فرقا شاسع أيها القارئ الكريم بين علاقة و إقامة غير شرعية ، حتى لا يذهب أحد بعيدا عن لب الموضوع . ^_^

نعود لللب الموضوع ، لما الزيارة بتاعتي إنتهت ، المدير قالي هنجزلك تذكرة لمنطقة إسمها " كيش " هتقعد في المطار لحد ما نطلعلك زيارة وبعدين ترجع ، المنطقة دي منطقة إيرانية ، أنا قلت لأ ، كيش لأ ، المدير قالي لأ لية ؟ قتلته عشان الناس

اللي بتروح كيش وتنزل مصر ، آمن الدولة بيأخذهم ويستجوبهم " رايح غيران
لأيه ، تعرف مين هناك " وكلام كتير علي الفاضي . طبعاً انا مش عارف دا
بيحصل ولا لأ ، بس إللي اعرفه إن اللي بيروح إيران ، كانوا بيضططوه في آمن
الدولة ، وانا اول ما بسمع كلمة آمن الدولة ، بفتكر فيلم الكرنك ^_^ .
المدير قالي خلاص ، انا مسافر عمان ، وهحاول أعملك فيزا لعمان ، لو عملتها
هتيجي عمان وتقععد معايا شهرهناك لحد ما نخلص إقامتك في دبي ، معملتهاش ،
يبقي هتستني في المطار وهنعملك فيزا زيارة تاني . قلت ماشي عمان عمان ،
أحسن من كيش .

وسافر المدير علي عمان والحمد لله ، فشل في إستخراج فيزا لعمان ، بعثلي وقالي
إحجز تذكرة لعمان ذهاب وعودة يوم الخميس ، بحيث المدير هيكون في دبي
ويعملي فيزا زيارة ، وهي عادة مبتخدش أكثر من ساعة عشان تطلع ، هكون أنا
مستني في مطار عمان - مسقط .

رحت أنا وهريدي يوم الثلاثاء علي مكتب العربية للطيران ، عشان نحجز تذكرة
لمسقط ، وملفناش إلا رحلة واحدة الساعة ٦:٠٠ مساءً وهتعود ٧:٣٠ مساءً ،
إتصل علي دينا وقتلتها مفيش إلا رحلة واحدة يوم الخميس الساعة ٦:٠٠
مساءً والعودة ٧:٣٠ مساءً ، أحجز ولا إية ؟ قالتلي إحجز ، وقتلتها اوك
وحجرت ، كانت تكلفه التذكرة حوالي ٦٠٠ درهم .

تاني يوم بعث للمدير إيميل وقتلته " ابشر ، حجرت تذكرة لعمان يوم الخميس
الخميس الساعة ٦:٠٠ مساءً والعودة ٧:٣٠ مساءً " ، لقيته بيتصل بيا ،
طارق : الو سلام عليكم يا بشمهندس

المدير : وعليكم السلام ، انت بتستهبل يعني

طارق : سكت ، مفيش كلام وفي سري (الراجل دا عبيط ولا إية)

المدير : إنت حاجز تذكرة الساعة ٦:٠٠ مساء ، أطلعك فيزا امتي إن شاء الله ، هي الجوازات بتبقي شغالة الساعة ٦:٠٠ مساء ؟ التذكرة دي إنت إللي هتشيلها ، الشركة مش مسئولة عن أخطاء الموظفين .

طارق : لا بقي دا انت بتستهبل ، في سري بردوو ، حضرتك انا معرفش ، انا إتصلت بدينا قبل ما أحجز وقتلتها علي المواعيد ، قالتلي إحجز ، انا مش مسئول عن شيء .

المدير : واحد منكم إللي هتشيلها ، الشركة مش مسئولة ، إديني دينا

دينا : ايوة يا عامر ، طبعاً هي بتتديله باسمه ، شركاء بقي ، انا مجاش ببالي إن الجوازات بتكون مسكرة "مقفولة" واساساً مفيش موعد تاني للسفر غير هيك الموعد .

المدير : كلام انا مش سامعه

دينا : اوك خلاص ، دي غلطي ، أنا هحاول ارجع التذكرة ولو ما رجعت بشيل تكلفتها .

وخلصوا كلام في التليفون والحمد لله دينا إللي هتشيلها مش أنا .

زي ما بيقول المثل : عض شغلي ولا تعض رغيفي _ ^ ، قال يقولي إحجز وبعدين يقولي هتشيلها ، شالتك أمتا الغولة .

أخت دينا كانت بتشتغل في مطار الشارقة ، كلمتها عشان تشوف صرفة للتذكرة ، وأختها حاولت لكن معرفتش ، لان العربية للطيران مبرجعش فلوس حد .

طبعاً دا كله ، اما مخالف وأيام بتعد ، والمدير مضايق ، لانه هو إللي هيدفع ، وأنا مبسوط ، أحسن يستاهل ، لو كان عملي الإقامة اول ما جيت ، مكنش دا كله حصل .

المهم المدير قالي خلاص ، انت هتنزل مصر ، هتقعد هناك أسبوع لحد ما نعمل الإقامة وترجع تاني . أوبأااااا ، مصر ، الحنين إلي الوطن ، أمي الحبيبة ، من إبنك حبيبيك ، إللي مكنش بإيده لحظة يسيبك ، أخبارك إية ، وحشاني يامه ، وكلوكم وحشني ، وعامله إية ، البعد عنكم والله غصبا عني وسلميلي ياما علي إللي بالي بالك وإقربها كل كلمه عنها كتبتها لك ، وقوليلها إني راااااااااا جمع والفرحة قريبة . طارق عباس ، أمي الحبيبة ^_^ .

الفرحة مكنتش سيعاني ، هنزل مصر ، اول مرة غربة ، والأيام كانت صعبة ، والواحد ضعف خالص ، يروح يشم نفسه شوية بقي .
تظاهرت إن الموقف عادي ، عشان المدير ميقوليش هتشيل التذاكر ، أنا عارفه عاوز أي منفذ يخلي الواحد يشيل فلوس ويس .
قالي إحجز علي الجمعة الجاية ، والعودة بعد أسبوع ، وإبقي خد الفلوس من دينا ، وفي الاسبوع دا عاوزك تعلم هردي كل حاجة في البرنامج ، عشان هو إللي هيتعامل مع كل العملاء وانت مش موجود .

كدا بقت رسمي خلاص ، هنزل مصر بعد أسبوع ، المدير قال ، انا هعزمكوا علي الإفطار إتهاردا عشان انت هتسافر الاسبوع الجاي ، ويبقي فطرننا سوا ، فمحدث يروح ، وقال لدينا ، زي ما شفنا في المقال إللي فات تحجز في مطعم .

المطعم إسمة " أبو شقرة " مطعم معروف في مصري وفتح في دبي وابوظبي ،
المهم قبل الفطار بنص ساعة ، إتحركنا من المكتب إحنا الاربعة ، انا وهريدي
وسامح ودينا وروحنا علي المطعم بعربية دينا ، والمدير هيقبنا هناك هو وأسرتة ،
المدام وأولاده الاتنين ولد وبنت .

إتقينا علي باب المطعم ، ودخلنا مع بعض ، المدير واسرتة ، بعدين دينا ، وإحنا
وراهم ومع اول سلمه من سلام المطعم ، منظر خرافي ، علي كل سلمة ، بطيختين
واحدة علي الشمال وواحدة علي اليمين بطبخ مصري أصلي ، الواحدة تيجي
١٠ كيلو ، بصيت لفوق كدا ، وشوفت منظر البطيخ ، كنت هقعدي علي السلم
واقول جمعوا حوالي البطيخ دا ومش عاوز أدخل جوا ، البطيخ وحشني جدا ،
مشفتوش من ساعة ما سافرت ، وأنا مدمن بطيخ .

طلعت السلام ، وأول ما دخلت جوا المطعم ، لقيت أكل ، تخيلوا ^_^ ،
لقيت أكل ملوش حصر ، أطباق أكل كثير وكبيرة ، ومحدش حوليها ،
وصلنا للطرايبزة المحجوزة لينا ، لقيت مكتوب عليها إسم المدير ، المدير قال كل
واحد يروح يجيب فطاره ، إختاروا إللي انتوا عاوزينه ، اوبن بوفية .

اوبن بوفية ؟ بتاع الأفلام دا ، اول مرة في حياتي أدخل اوبن بوفية ، طول عمرنا
بنختار وجبة واحدة ونحاسب عليها ، إنما اوبن بوفية ، بدأت أخاف ، أفكرت
هاني رمزي لما دخل اوبن بوفية ، وفي الاخر خادوه علي القسم عشان مدفوش
الفلوس ، ممكن المدير يعمل معانا كدا ولا إية ؟

روحنا علي اماكن الاكل ، عشان نختار الاكل بتاعنا ، كل واحد مننا (أنا وهريدي
وسامح) أخذ طبق من المكان المخصص للأطباق و بدأ هريدي وسامح يختاروا

أصناف من الاكل ويحطوا في أطباقهم لكن أنا فضلت أبص علي كل الاصناف ، كل حاجة حلوة ، مختار أختار من فيهم ، كل الاصناف عجبتي ، وللحظات بسيطة ، تذكرت أسبوع العذاب ، لما قضينا يومين علي إفطار بعلبة زبادي ومتسحرناش ، لما كنا بنرجع من الشغل في نص الليل ، ونختار بين الاكل او النوم

وقررت الإنتقام ، هأخذ من كل صنف ، لن أترك صنفا دون أن اضع ملعقتي فيه ، نأخذ من كل رجلا قبيله ^_^ .

وبدأت أجيب أطباق ، أعبي الطبق واروح أحطه علي الطرايزة ، فراخ شغال ، ديك رومي شغال ، لحم ضاني شغال ، كباب شغال ، حمام شغال ، رز بالكبدة شغال ، شيبسي شغال ، سلطات شغال ، دا غير الحلو بأنواعه المختلفة ، كله شغال ، مبسبش حاجة أنا ، انا كنت عاوز طرايزة لوحدي .

دا كله والمغرب لسة مآذنش ، بعد كدا قعدنا ، مستنيين الأذان ، وانا عمال ابص للأكل ، مش هرحموكوا ، اصبروا لما يأذن بس ، هنسفكوا .

وأذن المغرب ، وشربنا عصير ، بعدين حنة كباب ، مع حنة فراخ ، ومفيش مانع من ملعقة رز ، بطاطساية مقرمشاية . شوية ولقيت نفسي معنتش قادر ، والاكل لسة زي ما هو ، هالار اسود . انا بقالي ساعة عمال أجمع في الاكل ، وفي الاخر مكملتش ما يعادل ربع وجبه .

المعدة صغرت والحمد لله ، متعودة علي الزبادي والنوم من غير سحور ، الامعاء تقلصت ، منك لله يا جمال يا مروان ، بقي يبقي قدامي الاكل دا كله ومش قادر اكل حاجة ، أعمل إية ، أعمل إية ؟

ندهت علي الوايتز ، وقتلته لو سمحت ، واحدة سفن اب ، يمكن تهضم وتعمل
أي مكان في المعدة ، الكباب هيطير من عيني .

المدير لما لقاني بطلت أكل الأطباق لسة زي ما هي قالي ، كل يا طارق ، إتغذي ،
عشان لما تروح للحاجة الوالدة متقولش إنك ضعفان ، قلت في سري ، هي هتقول
بس ، دي هتقول وهتدعي وهتחסبن ، دا انت يمكن تتسخط قرد لما أنزل مصر .
جيه السفن آب ، وشريت شوية ، وحركت بطني حركة لولبية عشان يفضي أي
مكان ، وبالفعل ، أكلت معلقة رز بالكبدة وبطاطساية ، كان هذا آخر ما دخل
غلي معدتي .

وجاء العاملون ليحملون هذة الاطباق المليئة بالاطعمة ، لتذهب إلي اين ، لا أعلم
، لكني أحسست بضيق بداخلي ، علي مصير هذة الأطعمة ، وتذكرت كم من
أناس يموتون جوعا ، وكم من يتمني مثل هذة الاطعمة التي لن يكون لها مصير غير
الإهلاك ، ولكنها حكمة الله في الارض .

وجاء أحد العاملين بكتيب صغير بداخلة الفاتورة ووضعها امام المدير ، وكان
هريدي يجلس بجوار المدير فنظر إلي الفاتورة يعينيه الثاقبتان ليصاب بعلامات
الذهول ، نظرت إليه واحسست إن المبلغ كبير .

خرجنا من المطعم لنستقل السيارة مع دينا متجهين إلي الشارقة ، حيث نسكن ، ثم
أخبرنا المدير أن غدا الجمعة راحة ، وطلب مني أن احجز تذكرة سفري لمصر يوم
السبت وأن أخذ ثمن التذكرة من دينا .

لما روحنا البيت هريدي قالي ، عارف الفاتورة كام ، قتلته كام ، قال توقع كام ،
قولتله يعني لو كل واحد ١٠٠ ، إحنا كنا ٨ يبقى كله ٨٠٠ درهم ، قالي الفاتورة

١٧٠٠ درهم ، شهقت شهقة سمعها مدير المطعم في دبي ، مش عارف اذا كان المبلغ دا حقيقي ولا اية ، يمكن هريدي شافه ١٧٠٠ بس هز ٧٠٠ ، ويمكن يكون ١٧٠٠ درهم ، الله أعلم . دا إحنا مكلناش حاجة ياعم الحج ، يلا ياعم إحنا مالنا ، دفعنا من جيبنا يعني .

طبعا فاكيرين التسجيل بتاع المدير في المقال اللي فات ، ولما هريدي زود الموضوع وإحنا في العزومة وطلب تليفزيون ، وطبعا دا سوء موقفه أكثر عند المدير .
تاني يوم " يوم الجمعة " ، بعد صلاة العشاء والتراويح ، لقيت المدير بيتصل بيا من عمان ، وهريدي كان جنبي ، عرفت إن المكاملة عن هريدي ، لانه أكيد مش هيعدي هريدي في العزومة كدا ، رديت علي المدير وشغلت التسجيل ، عشان هريدي يسمعها بعد ما المدير يقفل ،

طارق : سلام عليكم ، الووو

المدير : أيوة يا طارق ، أخبارك

طارق : الحمد لله

المدير : خلصتوا صلاة

طارق : اه خلصنا من زمان

المدير : طيب تقبل الله ،

طارق : إن شاء الله

المدير : طارق ، بلغ محمد (هريدي) انه تحت إختبار لمدة شهر ، لو مثبتش نفسه فية هينزل مصر وهيتحمل كل مصاريفه من تذاكر الطيران والفيزا وكل حاجة عشان هو مش جاي هنا يلعب .

كان باين من صوت المدير إنه متعصب ، جايب آخره من هريدي ، بس قالي كلمتين حلوين خلوني أحط رجل علي رجل وهو بيتكلم كدا ، قالي " زي ما كنت متوقع منك انك تشيل شغل من عليا وثبت نفسك وعديت المرحلة ديه وانت معنا خلاص " .

بعدين كمل وقال ، لكن بالنسبة لمحمد او هريدي ، انا مش راضي ولا عن شغله ولا عن سلوكه ، سلوكه لازم يتغير ، ميقعدش طلبات طول النهار ويقعد يشتغل ، يطلع شغل وبعدين يطلب .

بعدين إتكلنا علي التاسكات شوية ، وقفل .

اول ما قفلت مع المدير ، شغلت التسجيل وإديت الموبيل لهريدي وقتلته ، خديا أكتيف .

لسماع التسجيل كامل :

<http://youtu.be/W3ipQCilbEq>

كنت أعنف هريدي بسبب سخط المدير عليه ، وكانت هذة التسجيلات صعبة للغاية عند سماعها ولكن لم أكن أدري ان المكاملة القادمة ستكون لي ، وتعنيف شديد ، دبرت له دينا ، بسبب تذكرة السفر التي تحملت هي تكلفتها ..

إنتظروا المقال القادم ، المسافر

عزومة العميل

نظرا للظروف التي تمر بها البلاد ، ونظرا لمماطلة العملاء في دفع المستحقات ،
قررنا أن نأخذ حقنا من العملاء عزومات ^_^ .

بعد عزومة المدير ، كان المفروض المقال يبقي " المسافر " ، بس كنت مشغول
شوية ولسة مجهزتوش ، إتهاردة الاحد بتاريخ ١١-٠٣-٢٠١٢ ، كنت معزوم
عند عميل ، وأفكرت مقال عزومة المدير ، فحببت أعملكم مفاجأة ، مقال فرش
، عزومة العميل ^_^ .

انا صورت السفره قبل ما تتظبط ، لاني بحب اشرف علي العزومة إللي هتعزم فيها
بنفسي ، عشان وقت الهجوم ، أبقى عارف أماكن الضعف ، وبردوو صورت طبق
الاكل بتاعي بعدالهجوم بس في الحباثة ^_^ .

وطبعا أنتوا عارفني من وقت عزومة المدير ، لا أترك شىء إلا ووضعت فيه ملعقتي
^_

عملت طبق مشكل حلو ، وكنت حاسس إن العيون كلها عليا مش عارف لية ،
ممكن عشان أخذت قلب الحروف كله، ونص الكبدة ؟ عادي يعني ، مناسبت
نص الكبدة للباقيين !!

الطبق الكبير كان فية يبجي نص خروف ، محشي بطاطس ورأس الحروف ، والقلب
والكبدة ، طبعا أنا درست الخريطة قبل ما كل الناس تدخل ووقت الهجوم ،
هجمت زبي زبهم ، مفيش تفرقة ولا حد قبل حد ، بالعدل والمساواه ^_^ .

بس عاوز أقولكم إني مع كل ملعقة وكل حباية رز ، كنت فاكّر أعضاء المدونة
عضو عضو ، أنا مبنساش الفائز بتوعي في الرخاء ^_^ .
وأخير ، زي ما حسين فهمي و محمود ياسين قالوا " الرصاصة لا تزال في جيبي "
أنا بقولكم " العزومة لا تزال في بطني " .
وفي السنة اللي قبلنا فيها عزومة المدير ، قبلنا بردو عزومة العميل
عزومات عربي ، أأأأأأأأأم الاجنبي .

المسافر

وما اشبه اليوم بالبارحة ، قلت في آخر مقال عزومة المدير " إنتظروا المقال القادم ، المسافر " ، ولم أكن أعلم اني ما أقصه عليكم من تجربه مررت بها ، قد يتكرر في هذه الايام ، فقد قابلتني كثير من المشاكل في العمل الاسابيع الماضية ، والتي لم تُحل بعد ، وكان هذا سبب تأخري في كتابه هذا المقال ، حيث كنت كثير التفكير في الايام المقبلة ، وكنت أضع تصور لكل السيناريوهات التي قد تحدث لي ، فماذا سيحدث إذا لم تحل هذه المشاكل وسأضطر إلي النزول لمصر نهائيا ، ام أن مشيئة الله ستجعلني اتغلب علي هذه المشاكل ، اسئلكم الدعاء .
وعلي رأي الست ام بطاطا ، انت محسود يابني ، إظهار بعد عزومة المدير ثم عزومة العميل ، في حد كانت عينه وحشة ، وأقول لهؤلاء العملاء المدسوسين بين الفائز " متبصوليش بعين ردية ، دي ماما تعبت فيا " ^_^ .

كنا واقفين بعد عزومة المدير إللي كانت بسبب إني هنزل مصر وإحتمال مرجعش ثاني في رمضان ، فيبقي فطار جماعي لكل الموظفين في الشركة ، وكمان علي رأي المدير ، عشان أتغذي شوية، قال يعني العزومة هتغذيي وتشيل أثار الايام القاحلة إللي مرت علينا . وطبعا فاكرين هريدي الأكتيف ، لما طلب تليفزيون والمدير رد عليه وقاله وربنا شغلك الاول وبعدين أطلب إللي إنت عاوزه .
وإحنا خارجين من المطعم ، المدير قالي إبقي إحجز تذكرتك علي الجمعة الجاية والرجوع بعد إسبوع ، خلال الأسبوع دا هكون عملتلك الفيزا ، وإبقي خد فلوس التذكرة من دينا ، دينا كانت وافقة وسامعه الكلام .

يابن ال... ، عايزني أنزل مصر يوم ١٨ رمضان ، وأرجع بعد اسبوع ، يعني قبل العيد بخمس ايام ، روح يا شيخ منك لله ، منك لله ، منك لله يا جمال يا مروان . أنا قلت اوك ماشي ، وأنا متأكد إنه مش هيلحق يعمل الفيزا ، بس قلت أخده علي قد عقله ، علشان نخلص .

إتحركنا ناحية العربية بتاعه دينا عشان توصلنا لحد البيت ، لانها زي مانتوا عارفين ساكنة في الشارقة ، فالمدير حب يهزر ، قال لدينا انت هتكري لوحك مع ٣ شبان في العربية ، قالت عادي ، شو المشكلة ، قلت في سري ، ياعم دي ميتخفش عليها ، دا إحنا إللي نخاف علي نفسنا منها .

تاني يوم ، في الشغل ، واحنا في المكتب ، سألت دينا ، جبتي فلوس التذكرة ، ردت وقالت اوووو ، نسيت !! لا والله ، نسيتي !! نسيتي تاكلي ، نسيتي تشربي ، نسيتي تعكنني علينا ، نسيتي تستحمني في الفسين ؟

قلت : أصلي كنت عاوز أحجز إنهاردة عشان أبعث للمدير إني حجزت عشان ميزعقش

قالت : لو معك مصاري إحجز وأنا بسحبهم من الصراف اليوم وبجهملك بكرة في الصباح

طبعا انا لسه قابض ، يعني مقدرش أقول ممعيش مصاري (حلوة مصاري دي !! اردني بقي) ، مقدرش أقول ممعيش فلوس ، أبقى كداب وش ، بس أنا مش عاوز أدفع من معايا ، انا عاوز أي فلوس تبقي معايا وأنا نازل مصر وهما الصراحة مش مضمونين .

قلت اروح أحجز من معايا ، للمدير يغير رأيه ومعرفش أنزل مصر ، وانا مروح ،
حجزت وبعث إيميل للمدير بالليل إني حجزت علي يوم ١٩ رمضان والرجوع يوم
٢٦ رمضان والله الموفق وحسي الله ونعم الوكيل .

تاني يوم سألت ديننا ، جبتي الفلوس ؟

قالت : اووو نسيت ، الطريق كان زحمة وما عرفت أعدي علي الصراف .

طب اقول إية أنا بقي ، روعي يا شيخة يصرف فيكي ربنا ، شكل البت هتنام
علي الفلوس ، طب وبعدين ، ١٧٠٠ درهم حق التذكرة ، دا غير إني مخالف ١٨
يوم ، يعني هدفع في المطار حوالي ١٨٠٠ درهم ، مهو اليوم مخالف ب ١٠٠
درهم علي طول ، يعني كدا ٣٥٠٠ درهم طاروا في الهوا ، أي نعم كدا كدا
هاخدكم ، لان الشركة هي اللي هتدفع الغرامة مش أنا ، بس هاخدكم لما ارجع
وعليك خير ، لكن نا عاوز أنزل مصر ويكون معايا مبلغ كويس ، مش أدخل علي
الحج الوالد و إيدي فاضية .

الاسبوع خلص ، وانا كل يوم أقول لدينا جبتي الفلوس وهي كل يوم تنساهم بس
بعذر مختلف فانا قلت خلاص ، أخذهم من المدير بقي .

خلال الاسبوع دا شرحت لهريدي البرنامج كله ، وعملته تسجيل فيديو ، عشان
يبقي يراجع مع نفسه لأني عارف إن فيه حاجات كتير هتضيع منه وخصوصا إن
الشرح مكثف ، فهو براحته بقي يتفرج علي الشرح الفيديو .

اول ما المدير رجع من عمان ، يوم الاربعاء ، إتصل بيا بالليل وكانت مكاملة من
اسواء المكالمات بينا

عرفت منها يعني اية snake / ثعبان ، كما أطلقنا علي دينا .
دينا قالت للمدير ان طارق طلب الفلوس أكثر من ٢٠ مرة وحساب البنك
مكنش فيه فلوس ، وانا إتخرجت منه أكثر من مره وفضلت تنفخ فيه ، تنفخ ،
تنفخ لحد ما استوي ، واول ما استوي ، إندلق عليا ، وهو سخن ^_^ .
المدير زي مانتوا عارفين بيصدق اي كله دينا تقولها دا غير الثقة العمياء ، إتصل
بيا ونزل رغي رغي مبطلش ، وانا ساكت مبتكلمش ، انتوا اية مشكلتكو
بالضبط ؟ هريدي من اسبوع يقولي انا اشتغلت ٥ أيام إدوني فلوسي وانت
دلوقتي كل شوية عاوز فلوس التذكرة ، انتوا مش بتقدروا ، انا جاييلكوا شقة
كويسة وجاييلكوا اثاث و عفش كويس ، علي الاقل قدروا الحجات دي ، يعني
بدل ما أقعد ٢ في الاوضة ممكن أقعد ٤ في الاوضة ، وإللي عاجبه عاجبه ، قدروا
الحجات دي يا طارق واعرفوا إننا في شركة واحدة ومكان واحد ، انت عارف إننا
داخلين في مشاريع جديدة وحتين فلوس كثير فيها ، شير شوية يعني محبكتش
الالف درهم دلوقتي ، لحد ما الامور تستقر ، إحنا بقالي ٤ سنين مبنأخرش مرتبات
علي الناس ، حصل ظروف معينة ، مش لازم كل ساعتين يا دينا فين الفلوس ،
يا دينا فين الفلوس ، لا يا بابا مش كدا ، عيب يعني ، انا كل دا وبقيمك انت
وهريدي ، الاسلوب (behavior) بتاعكوا مش عجبي . انا لو علينا انا ، مش
هخليكوا تشتغل انت وهريدي بالمستوي دا ، انا بجاول ابذل مدهود و بجاول
أعلمكوا و بجاول أشغلكوا .
إنت شايف نفسك كويس في البرمجة ، البرمجة دي ولا حاجة ، البرمجة اللي انت
شايف نفسك كويس فيها دي ولا حاجة ، فيه بيزنس و فية حجات كثير ورا

البرمجة ، انت مشفتش العميل كان بيتكلم في التليفون ازاى ، انا مرضتس اسمعك
الشتيمة إللي كان بيقولها ، يعني الموضوع مش برمجة وبس. انت جاي في بيئة
فيري بروفيشونال (Very Professional) ، لازم تتعلموا ، لازم تصبروا حتى لو
شهر .

فية شركات هنا بتاخر المرتبات شهر وأثنين وتلاتة ، وإللي مش عاجبه خلاص
إتفضل إمشي ، لكن أنا بوقف مرتبي عشان الناس تاخذ مرتباتها ، ودا
مبيحصلش في أي شركة ، انت خدت مرتبك ، اصبر شوية يا اخي ، مش كل
ساعة ، يا دينا ، ، يا دينا ، يا دينا ، فأهدي شوية إنت وهريدي عشان أسلوبكم
دا مش عجبي يا طارق .

هاااار اسود يا ولاد ، الراجل مش قايلي خد الفلوس من دينا ، ودينا كانت
بتقول نسيت أعدي علي الصراف ، دلوقتي تقوله طارق بيقولي كل ساعه هاتي
الفلوس ، اااه يا مفترية ، روحي يا شيخخة إلهي صراف ألي يفرمك زي مكنة فرم
الفلوس كدا .

دا انا بقيت عميل ، وخاين واسلوبي وحش و مش مقدر ظروف الشركة وعمال
اطلب في الفلوس ، بجد إخص عليك يا طارق بجد ، يا قاسي يا مفتري .
بعد ما كان اسلوب هريدي بس اللي مش عاجب المدير ، دلوقتي اسلوب
طارق وهريدي ، بعد ما كان طارق ثبت نفسه في الشغل وكويس وهيكمل معانا ،
بقي وحش دلوقتي والبرمجة دي ولا حاجة .

دا دينا دي مش ثعبان ، دي حرباية ، حرباية إية ، دي خلية حراي بتنتج سم
فتاك وقاتل ، دا إبليس ميعرفش يعمل كل دا لوحده .

لكن انا كعادتي لما يكون إلي بيكلمني متعصب او غضبان ، بخلية يفرغ طاقتة خالص ويهدي وبعد كذا احاول اتفاهم معاه ، لان لو كل واحد رفع صوته ، مفيش مشكلة هتتحل ، دا غير إن دا مديري ، مش بس كدا ، لا دا انا نازل مصر خلاص ، يعني عاوز اسيب حاجة من ريحتي في دبي عشان أرجعلها تاني _ ^

بس طبعا الكلام إلي قاله دا مينفعش يتسكت عليه ، و بردوا مينفعش يترد عليه بنفس الأسلوب وخصوصا في الوقت الحالي ، لازم أكون في موقف قوة ، فقامت بتسجيل المكاملة كشاهد إثبات و للذكري وللزمن لأن أكيد هيبجي الوقت إلي هيحصل فية تصفية حسابات وهيبقي الحساب عسير ، عسير قروي .

اي مدير او صاحب شركة مهما يكون راضي علي الموظف ، لكن ساعة الفلوس ، لازم يشوهلك الاداء و يقلل من قيمة الموظف باي طريقة او باي شكل .

يعني مثلا المبرمج ، لو هو جديد و فرش ، هيقوله اهم حاجة الخبرة

لو خبرة هيقوله اهم حاجة الشغل ويكون صح من اول مرة

لو صح من اول مرة هيقوله اهم حاجة البيزنس ..

لو بنزس... هيقوله اهم حاجة انك تدخل فلوس للشركة

لو دخلت فلوس للشركة هيقوله اهم حاجة مسمعش صوتك ^ _ ^ .

المهم هيلاقني سبب يحسس بيه الموظف إنه ولا حاجة

إلا من رحم ربي ، مش كل الناس كدا ،

فية اماكن تحب تشتغل فيها ، بيبقي عايز يطلع قدراتك فبيشجعك ويوزودك ،

ويدلعلك كمان لو عاوز تدلع .

اللهم أرزقنا بمدير يدلنا ، قولوا آميين ^_^ .

موضوع التذكرة في الاساس ملوش دعوة بطريقة الشغل او العملاء ، لكن هو داخل كله مع بعضه ، انا حاولت اوضح للمدير إني برىء من كل هذه التهم المنسوبة إلي ، وإني معرفش إن مفيش فلوس ، وإنها كانت بتقولي نسيت اعدي علي الصراف وأنا ميهمنيش لو أخرت مرتبي شهر او اتنين او ثلاثة لو انا موجود في دبي ، لكن عشان أنا نازل مصر فكنت عاوز أخذ فلوس معايا .

فكان رد المدير ، قولي صراحة هو إنت مفلس في مصر ، انتوا مفلسين ممعكوش فلوس في مصر ؟ انت مخدتش مرتب شهر مش هيكفيك تنزل مصر ؟

سؤال نزل عليا كالصاعقة ، وإنت مال (النقط دي كلام مقصود من

الرقابة مش مني) ، انت مال ... ، هو أنا بشحت منك ، دي فلوس ، قتلته ، انا ببني شقتي في مصر وحتاج الفلوس دي ، ودينا مقلتش إن مفيش فلوس ، قالت بنسي !!

رد عليا وقال ، انت عارف دينا قالت كدا ليه ؟ كانت بتقولك كدا عشان مكسوفة تقولك مفيش فلوس .

يا كميلة ، مكسوفة ياختي ، وانت هتجيبني فلوس من جيبك ، دي شركة ، يعني لو قلتي أستني لما المدير يبجي كان الموضوع خلص ، لكن زي ما قلنا قبل كدا ، إنها النبة المبيتة ، للإنتقام ، من ساعة موضوع تذكرة عمان وإللي إتخصمت منها .

المكاملة كاملة علي هذا الرابط

<http://www.youtube.com/watch?v=SNT0A9reuf8>

بعد إنتهاء المكاملة الطويلة الرحمة ، نظرت إلي هريدي ، وكان يراقبني في تلهف
ليعرف ماذا حدث ، فقد لاحظ تغير تعبيرات والون وجهي مرات عديدة ، من
الاييض (مش ابيض قوي يعني) إلي الاحمر ، إلي الاسود ، إلي الازرق ، إلي
الفوحلقي .

لكنه عندما رأي وجهي قد تلون بالفوحلقي علم أن اسمه قد ذُكر في الموضوع فظل
يشاهد في صمت وكأنه يشاهد حلقة لمصارعة المحترفين ، بين أندر تيكور وأندر
طارق ^_^ .

قلت لهريدي ، شغلنا أغنية كل ظالم يا حبيبي وله نهاية والمدير بتاعنا ظالم من
البداية للنهائية وهاتلنا ٢ بريل ، عشان يغطي علي المر إلي احنا بندوقة ،
وإتخمد نام بقي عشان انا زهقت منك .

تاني يوم ، الخميس المدير جية الشغل ، و سلام علينا وبيضحك ويهزر وكأن
مفيش حاجة حصلت ، كان هدي بقي ، ومفعول النفع والتسخين كان خلص
وأتفرغ .

إداني فلوس التذكرة ، وقالي متزعلش ، انا كنت بس بتناقش معاك ، قتلته اوك
بنفس مسدودة ، وفي سري قلت يا جبروتك يا أخي ، تقتل القليل وتأخذ العزاء
فيه ، أصبر عليا بس ، هردهالك ، مش هنسهالك ، كل غلطة غلطها بوقك يوم
في حقي ، كل جرح وكل دمعه بكاهها هريدي ، هردهالك ، مش هنسهالك ، خد
برامجك ، سيديهااتك ، خد دينا وراااك ، وإديني فلوسي إلي إتظلمت في الشغل
معاك ، فنان يا واد يا طارق ، بس مش لاقني إلي يكتشفك .

كلامك يا مديرنا محفوظ ، والتسجيل موجود وهسلم السي دي لمرتضي منصور
لما أنزل مصر .

يوم الخميس كان يوم مليون ، سلمت كل الشغل لهريدي وقعدت مع المدير عشان
أخذ التاسكات إللي هشتغل فيها وأنا في مصر ، والوضع مش هيفتلف كثير
بالنسبة للمدير ، المفروض إني رايح اسبوع ، يعني كأنه في عمان ، وإتفقنا إني
هكون اونلين طول الوقت عشان لو فيه حاجة وقفت مع هريدي أحلها علي طول

يوم الجمعة ، إتقبلنا ومقعدناش كثير في المكتب ، كانوا بيضططولي فح ، بيعملوا عقد
حقوق ملكية الشركة عشان أمضي عليه ، عشان مستعملش اي برامج للشركة
بدون إذنها ، قالي يعني .

المهم المدير البروفيشونال كان جايب عقد لشركة IBM وبيعدل فيه ، يشيل أسم
شركة IBM ويحط إسم شركته وإدهولي عشان أمضي ، بصيت عليه في السريع ،
لقيت كلمة IBM متكرره أكثر من مرة ، قل بس ، دا كدا عقد لاغي نفسه ،
رحت ماضي عليه علي طول ، وخذت نسخة معايا عشان ابقى اقرأها .

وحانت لحظة الصفر ، ودعت كل الموجودين ، هريدي وسامح ، والحرباية ،
قصدي دينا ، و تحركت من الشركة في رفقة المدير ، عشان هيوصلني للمطار .

السواق بتاعي ، تعني خالص يا جماعة ، اوووف ، بس هعمل إية مضطر

استحمله ، أصله مديري في الشركة ^_^

وصلني لحد باب المطار وحضني وقالي مستنينك ارجعلنا بسرعة ، قلت إن شاء
الله ربنا يسهل ،

أثر فيا جامد الموقف دا ، حسيت في حضنه بحنان مرات الاب كدا ^_^ .
دخلت المطار ، وخلصت إجراءات الدخول ودفعت غرامة التأخير كانت ١٩٠٠
درهم وبعدين رححت علي صالة كبار الزوار ، قصدي صالة الإنتظار ^_^
وقعدت وشغلت اللاب توب ونت ويرلس فري بقي ، وشيكت علي الميل ، قال
يعني الواد مهم ، وبعدين اتصلت علي وليد صاحبي ، سألته إن كان عايز حاجة
من مصر عشان مجبهاش معايا ، أنا يدوبك هجيب حجاتي .
وركبت الطائرة ومستني بقي حاجة حلوة كدا تقعد جنبني زي الافلام ، يعني شاب
في مقتبل العمر ، أعزب ، يبحث عن عروسة ، تعالي بقي يا عروسة .
طبعا فيه ناس هتيجي في بالها فيلم السفارة في العمارة ومضيقة الطيران ، لالا
عيب ، انا مش زي عادل إمام ، أنا عاوز عروسة ، مع العلم أنه لا غني عن
مضيقة الطيران أثناء الرحلة الجوية ونكن لهم كل إحترام وتقدير .
فاكرين فيلم فرح ، البت الصغيرة بتاعه الملجأ ، إللي كانت بتغني " إحنا الجيل
الصح الفلته ، أجيال الالفية الثالثة " ، فاكرين لما هربت و رجعت الملجأ وراح
رجل الاعمال عشان يجيها ، فاكرين مديرة الملجأ إللي كانت بتسمع فيلم "
محسب " لرشدي اباطة ، أختها في الرضاعة جت ركبت جنبني .
والمشكلة إني مقعدتش علي الحرف ، عشان اعرف اهرب ، انا قعدت جنب
الشباك ، فلما قعدت ، لقيت وشي لزق في شباك الطائرة ومبقتش عارف افلفص
، ولا عارف احرك راسي ، بقيت طول الطريق باصص للشباك ، وبعد ما كنت

بقول يارب عروسة حلوة تيجي تقعد جنبي ، فضلت أقول مش عاوز أجوز ، مش
عاوز أجوز ، مش عاوز أجوز ، مش عاوز أجوز ، مش عاوز أجوز .

وعلي صعيد آخر ، ومن زاوية أخرى ، مكنش فية حد من أهلي يعرف إني نازل ،
كنت عملها مفاجأة ، لكن هريدي دمر المفاجأة بطريقة أصابت أهلي بالهلع ،
وظنوا أن مكروها أصاب فلذة كبدهم
يا تري هريدي عمل إية ؟؟؟

ويا تري تاثير المفاجأة إللي اصبحت صدمة علي والدي هيبقي إزاي
وعلي والدي هيبقي إزاي ؟

دا إللي هنشوفه في المقال القادم إن شاء الله .

بيان رئيس المدونة

كتبت هذا المقال بعد تأخر في كتابة المقالات ومطالبة الكثير من المتابعين بسرعة كتابة مقال جديد



انني لم أكن أنوي التأخر في كتابة المقالات، فقد قضيت ما يكفي من العمر
دمة المدونة وأعضائها = والمقال القادم بعنوان " **جاي في السريع** "
استراتيجي: ما فعله الأدمن إستجابة لمطالب الفائز ويدل على إحساسه المرهف بهم، حقاً إنه أدمن،
ملال: "مدونة هذا ما رأيت في دبي" حصلت أحداثها في "دبي"

أيها الإخوة المواطنين

أحدث اليكم في ظرف دقيق يفرض علينا جميعا وقفة جادة وصادقة مع النفس
تتوخي سلامة القصد وصالح المدونة ،

لقد تابعت اولاً باول التظاهرات وما نادى به وما دعت اليه من عدم التأخر في
كتابة المقالات ..

كانت تعليماتي واضحة تشدد علي اتاحة الفرصة امام الفائز للتعبير عن اراءهم
ومطالبهم ،

ثم تابعت محاولات البعض لاعتلاء موجة تلك التظاهرات والمتاجرة بشعاراتها
واسفت كل الاسف من كثرة إعلانات مهندس إتصالات الذي إخترق الشبكات
ويوزع كوبونات .

انني كرئيس للمدونة وبمقتضي الصلاحيات التي خولها لي الدستور الفيس بوكي
كحكم بين السلطات أكدت مرارا وسوف اظل ان السيادة للشعب وسوف
اتمسك دائما بحقه في ممارسة حرية التعبير طالما تم في اطار الشرعية واحترام القانون

لقد قمت بإلغاء كافة الإعلانات الخاصة بمهندس الشبكات دون اللجوء إلي
إسقاط عضوية أصحابها (لفتة إنسانية من اللفاتات بتاعتشي) .

أيها الاخوة المواطنين...

انني لا اتحدث اليكم اليوم كرئيس للمدونة فحسب وانما كمصري شاءت الاقدار ان يتحمل مسئولية هذة المدونة وان يمضي وقته من اجلها وأجل زيادة أعضائها ، لقد اجتزنا معا من قبل اوقاتا صعبة ، واوقاتا مرحة ، ولم نفترق ابدا ، ولم ينسحب منا أحدا .

وأقول بكل الصدق .. وبصرف النظر عن الطرف الراهن .. انني لم أكن أنوي التأخر في كتابة المقالات ،

فقد قضيت ما يكفي من العمر في خدمة المدونة وأعضائها ..

لكنني الآن حريص كل الحرص علي أن تعود المدونة لقوتها حتى تصبح عزيزة آمنة مستقرة .. وبما يحفظ الشرعية ويحترم الدستور .

أقول بعبارات واضحة .. إنني سأعمل خلال الأشهر القادمة بكل جهد . كي يتم اتخاذ التدابير والإجراءات المحققة لكتابة المقالات بانتظام وبطريقة سلمية .. بموجب ما يخوله لي الدستور من صلاحيات .

الإخوة المواطنين ..

ستخرج المدونة من الظروف الراهنة.. أقوي مما كانت عليه قبلها.. وأكثر ثقة
وتماسكا واستقرارا.

إن طارق حسن الذي يتحدث إليكم اليوم.. يعتز بما قضاه من سنين طويلة في
خدمة المدونة وشعبها..

إن هذا المدونة العزيزة هي مدونتي مثلما هي مدونة كل مصري ومصرية.. عربي
وعربية... فيها عشت.. وحاربت من أجلها.... وسيحكم التاريخ علي وعلي
غيري.. بما لنا أو علينا.

إن الكتابة باقية والأشخاص زائلون..

إنتظروا المقال القادم إن شاء الله بعنوان " جاي في السريع "

حفظ الله هذة المدونة وشعبها.. وبارك فيهم وزودهم كمان وكمان

والسلام عليكم ورحمة الله وبركاته... "

، المضيفة تعدي بالاكل كدا قدامك ، وتكون رائحة الاكل نفاذة بردو عشان ، الواحد يجوع ، ويحس إنه في صحراء مكة جوعان و عطشانااا ويقول أحد أحد ، أحد أحد ، ولو عاوز تاكل إشتري يا حلو ، وبعد كدا يشغلوك فيلم ولو عاوز تسمع الصوت لازم تشتري السماعات يا تتفرج علي فيلم من غير صوت .
لما كنت بسافر علي طيران العربية ، كنت باخد ساندوتشات معايا وعصائر ولما يشغلوا فيلم ، اول ما يعدّوا بالسماعات قدامي ، اروح مطّلع السماعات بتاعتي ومشغلها ، غيظة بقي ^_^ .

ذات مرة ، والشنط بتفتش قبل متدخل صالة الإنتظار ، المفتش شال مني قزازة ماء وقزازة عصير كبيرة ، وحطهم واره في سلة كدا فيها حجات كتير متاخدة من ناس قبلي ، خليته بيفتش إللي بعدي وروحت واخدهم من السلة وحططهم في شنتطي وماشي ، هوانا دافع فيهم فلوس عشان تاخدهم مني ولا إية ، بس لو كان مسكني كان ظبطني _^ .

وصلنا بحمد الله مطار القاهرة الدولي ، وزي ما قلت في المقال السابق إني مقولتش لحد من أهلي إني نازل مصر ، بس كنت متفق مع اعز اصدقائي المهندس / سامي حسن عشان ينتظرنني في المطار .

لما خرجت من المطار لقيته مستنيني ، سلامات وبوس وأحضان مصري أم الاجنبي

أصلا مفيش أحضان أجنبي ، في مرة ركبت مع سواق باكستاني ، وكان مضايق جدا ، فسألته انت كويس ؟ مصدق حد يسأله ، قالي كان راكب معايا سيادة أجنبية ومعها طفل صغير والطفل كان بيضحك ليا فحملته وبوسته ، السيدة جن

جنوها إلا لازم تصير علي الشرطة وتقولي ليش تبوس أبني . هادا طفل ،
والاطفال أحباب الله ، كيق تقولي هيك ، انا راجل عجوز ، والراجل يا عيني كان
هيبكي .قلته معلش يا عم الحج ، هما عقلهم كدا صغير وعبيط ، سيبك منهم ،
والله يخليك ركز في السواقة انا عاوز أعيش ^_^ .

المهم ، ركبت انا وصديقي عربية للشرقية ، وفي الطريق إتصلت بيه خطيبته
وسألته إنت فين ؟ قالها انا كنت بجيب طارق من المطار ومعلش إحتمال اوصل
متأخر وبعدين ضحك بصوت عالي .

بعد ما خلص المكاملة سألته بتضحك ليه ، قالي أصل انا المفروض أكون هناك
دلوقتي الزيارة الاسبوعية ،لأني بروح الخميس ، بس مسفرتش البلد إمبارح عشان
اقابلك في المطار فلما قتلها إني كنت بجيب طارق من المطار قالت " يادي طارق
إلي طلعلنا في علبة البخت " .

قلت ياعم كنت رَوَّح ، زمانها بتدعي عليا دلوقتي ، دي الواحدة بتقعد تعد الايام
عشان زيارة خطيبها الاسبوعية تقوم تسيبها عشان طارق ، إستلني أنا ^_^ .
وصلنا مدينة "أبوكبير" وقلت صديقي تعالي بيت معايا إنهاردة وروح بكرة الصبح
، مرضيش وقال لأ لازم اروح عشان أعدي علي خطيبتي، قلت ماشي ، الخوف
حلو بردوو .

أخذت مواصلة للقربة بتاعتي وطول الطريق وأنا بتخيل في شكل أهلي اول ما
أدخل عليهم ويشفوني ، ابنهم في الامارات ومكلمهم إمبارح عادي جدا وموضوع
إنهم يشوفوه لسه عليه ييجي سنة ولا حاجة وفجأه يكون قدامهم ، يااه موقف
جامد ^_^ .

لكن هريدي " طويل العمر ، يطول عمره ويزهزه عصره وينصره علي من يعاديه هاي هيء " ضيع عليا كل الترتيب دا ، واحد صاحبنا كان بيكلم هريدي علي انت وسأله طارق عامل إية ، فهريدي قاله إن طارق نزل مصر إنهاردة بعد صلاة الجمعة يعني زمانه وصل ، فصاحبنا قال طب استني لما أتصل بيه ، وراح ماسك تليفونه ومتصل علي تليفوني لقيه مغلق ، راح متصل علي تليفون البيت الارضي :

إبراهيم : الو سلام عليكم ، ممكن أكلم طارق ؟

والدتي : لا طارق مسافر ، إنت مين ؟

إبراهيم : هو لسة موصلش ، أنا إبراهيم صاحبه

والدتي: وصل منين ، هو في الامارات ؟

إبراهيم : خلاص يا حاجة ، يمكن فية سوء تفاهم ، سلام عليكم

والدتي: الو... الو ..

إبراهيم صاحبي حس إن فيه حاجة غلط ، راح مقفل المكاملة وهرب .

طبعا والدتي قلققت من الكلام ، واحد صاحب طارق بيسأل عليه ، مهو لو

صاحبه يبقي أكيد عارف إنه مسافر ، وكمان بيقول هو لسة موصلش ، وصل

منين ، و سوء تفاهم إية هو فيه إية ؟

والدتي متعودة ترن عليا كثير ، ومن الصبح وهي بترن وكل مرة بترد عليها

السكرتيرة بتاعتي وتقولها " الهاتف المتحرك الذي طلبته مغلقا ، يرجي الإتصال

لاحقا ، شكرا "

قبل مكالمة صاحبي ، كانت ممكن تفكر إن موبيلي فصل شحن ، او انا نايم ، بس بعد المكالمة دي ، أكيد فيه حاجة .

والدتي من النوع إللي بيقلق بسرعة ، يعني لما كنت بشتغل في القاهرة واناخر في المواصلات شوية آخر الاسبوع ، كانت كل شوية تتصل بيا ، انت فين ، وصلت فين ، ابعتلك عربية تحبيك ؟ فما بالكم في الغربية بقي .

بدأ عقلها يودي ويجيب ، والهواجس تزيد ، إيني حصله حاجة ، طارق حصله حاجة ، إتصلوا علي طارق ، الموبيل مغلق ، اول مرة موبيله ييقي مغلق الوقت دا كله ، وصاحبه بيتصل يسأل هو وصل ولا لأ ، أكيد طارق حصله حاجة ، انا قلبي مقبوض ، أستر يارب ، جيب العواقب سليمة يارب .

إخواتي بدأوا يهدوا فيها ، عشان الضغط ميعلاش عليها ، إهدي يا ماما ، شكله نايم ، او الموبيل فاصل شحن ، إتهاردة الجمعة .

وهي ماسكه الموبيل ، وكل شوية ترن عليا ، ويردو نفس الرد في كل مرة

" الهاتف المتحرك الذي طلبته مغلقا ، يرجى الإتصال لاحقا ، شكرا "

" الهاتف المتحرك الذي طلبته مغلقا ، يرجى الإتصال لاحقا ، شكرا "

" الهاتف المتحرك الذي طلبته مغلقا ، يرجى الإتصال لاحقا ، شكرا "

" الهاتف المتحرك الذي طلبته مغلقا ، يرجى الإتصال لاحقا ، شكرا "

ومر الوقت بطيئا جدا علي والدتي المسكينة " الله يبارك لي فيها " وهي تنتظر أن تسمع اي شىء يريح قلبها ، وتدعو الله ألا يصيبه مكروه ، وربما دار بخلدتها ان إنها ، فلذة كبدها ، قد اصابه مكروه ، فحوادث المغترين كثيرة ، فهذا شاب من القرية ، ذهب ليعمل في قطر وعاد محمولا علي الاكتاف ، وهذا مهندس معماري

ذهب ليعمل في السعودية ، وعاد بعد حادثة مروعة علي كرسي متحرك ،
والحوادث كثيرة .

لم أكن أعلم أن هذا كله سيحدث ، كان هريدي يعلم جيدا أنني لم اخبر أحد عن
رجوعي لمصر ، وكان عليه ألا يخبر أحد حتى أصل إلي منزلي وأخبر أنا بنفسي
اصدقائي ، خطأ بسيط ، سبب الكثير من المتاعب ، تحدثت مع هريدي بعدها
وألقيت عليه وابل من اللوم ، تأسف بعدها وقال أنه لم يكن يقصد كل هذا ،
وأنتهي الموقف .

وصلت إلي المنزل في حدود العاشرة مساءً وكان اول من رأيي هو ابن أخي ، وما
إن رأيي حتى ملأ الدنيا ضجيجا " اونكل طارق جية اونكل طارق جية
..... هية هية ... اونكل طارق جية ... اونكل طارق هية هية اونكل
طارق جية اونكل طارق جية ، وأخذ يجري حتى دخل المنزل وصاح في
الجميع ، والله العظيم اونكل طارق جية ، اونكل طارق جية .

كنت واقفا مع أبي ، كان بالخارج يرش المياه من خرطوم بيده أمام منزلي الجديد و
الذي لم ينتهي بناءه بعد . وما إن رأيي حتى ألقى الخرطوم من يده وأحتضني
وقبلته ثم سألني " اية اللي حصل انت جاي لية " ، فأجبته مسرعا " وحشتوني
فجيت اسلم عليكموا وراجع تاني " .

وما إن سمعت والدي ضجيج ابن أخي ورأت الفرحة علي وجهه وهو يقسم بان "
اونكل طارق جية " حتى دبت الحياة فيها من جديد ، بعد أن كانت شاردة الذهن
وجاءت مسرعة إلي خارج المنزل وإختطفتني من وسط الجميع بحضنها الدافئ

الذي أحس فيه دائما وكأنني طفلا صغير ، لم تسألني عن أي شيء ، فقط احضان وقبلات ممزوجة بدموع الفرحة لعودة إبنا سليما إليها .

منذ لحظات كانت تتوق لتسمع أي شيء عنه وها هو الان بين ذراعيها ، يا لها من فرحة ، لا يستشعرها إلا الامهات . حتى حد يشغللنا أغنية " الست دي أمي " أصل الواحد إتأثر وقلب عاطفي ^_^ .

نظرت والديتي إلي وجهي وجسمي ثم قالت " يا بني يا حبيبي انت خاسس كدا لية ، يلعن السفر وسنينه ، يا حبيبي وجهك اصفر كدا لية ، إنت مكنتش بتاكل ولا إية ، مش قتللك إهتم بنفسك يا طارق "

بصيت لنفسي والدمعة كانت تنفر من عنيا ، أصل انا حساس قوي ^_^ ، وقلت لوالديتي : يا حاجة دا رجيم ، بحافظ علي رشاقتي ^_^ ، فعلا انا كنت خاسس جدا ، بس هنعمل إية غصب عننا بقي .

دخلنا البيت وغيرت ملابسني وما هي إلا دقائق حتى حضر العشاء وبه ما لذ وطاب من الطعام ، لي أنا وحدي ، فالكل قد أنهى الفطار .

ولكن أنا لي بهذا العشاء وقد تقلصت معدتي ولم تعد تقبل إلا لقيمات قليلة ، فكيف بمعدة تعودت علي الزبادي والصوم بدون سحور ان تقبل بالمحمر والمشمز ، بالله عليكم كيف ، كيف ، كيف (موسيقي حزينة و ٣ دمعات مزيفه) ^_^ .

وما أن قمت من علي الصينية (السفرة للي مش عارف الصينية) حتى نادت أمي : واد يا طارق ؟ إنت بتستهيل ؟ فين إلي أكلته ، الاكل زي ما هو ! .

طارق : والله يا حاجة شبعنا الحمد لله ، مش بقولك عامل رجيم وبعدين أنا فطرت في الطريق ، كنت واخذ أكل من الطيارة .

أمي : بألف هنا وشفاف يا حبيبي ، مطرح ما يسر يمري .
ثم جأني صوت أبي مرة اخري ، خير يا طارق ، إية إلهي حصل ؟
أمي : خبر إية يا حسن ، ما تسبب الواد يستريح شوية .
عندما رأي ابي خارج المنزل وهو يرش الماء وسألني " إية إلهي حصل انت جاي
لية " ، كان سؤال كالصاعقة ، تخيلت لو أن إجابتي كانت " أصلي سبت الشغل "

تخيلت لو أني بالفعل عائد من الإمارات نهائيا ، تخيلت لو وافقت علي كلام
هريدي وسامح وتركتنا جميعا الشركة وعدنا إلي مصر ، تخيلت نظرات الفشل في
عيون ابي وأمي .

كان هناك شيئا يدور في خاطر والدي ، كما قلت مسبقا إن منزلي تحت الإنشاء
وهناك اعتماد مباشر علي الفلوس إلهي ببعثها ، يعني فية إلتزامات ، وعمال
بيشتغلوا ، فنزولي المفاجيء هيبوظ الحجات دي كلها .

نعم ، شتان ما بين رده فعل أبي وأمي ولكني أقدر الموقف جيدا ، فدائما ما ترتبط
ردود أفعال الامهات بالعاطفة ، تتمني الام دائما ان يكون ابنها قريبا منها ، تخاف
عليه من "شكة الدبوس " ، تسال دائما ماذا أكلت ، ماذا فعلت ، بتتغطي كويس
، مرتاح في الشغل إلخ .

اما الاب فيهتم دائما بمستقبل ابنه من الناحية العملية ، دائما ما يتمني ان يري
ابنه ينتقل من نجاح إلي آخر ولا يجب أن يري أبدا الفشل يقترب منه ، يعينه علي

الصبر والمحاولة ، لا يجب أن يري ابنه عاطلا او منهزما او مكسورا ، يجب أن يراه يحيي حياة كريمة حتى ولو أفضل منه .

إنها معادلة مليئة بالحب ، بين الاب والام ، معادلة من صنع الخالق عز وجل ، لو كل واحد فكر في اي اب وام هيلقي المعادلة دي ، الاب يهتم بأشياء والام تهتم بأشياء الاخري ليكمل بعضهم البعض ، فلو كان الاب هو من يشد علي أطفاله ستجد الام هي من ترخي والعكس، لو كان الاب هو من يعاقب الابناء علي الأخطاء ، ستجد الام هي من تدافع وتطبطب وتقول " معلىش " والعكس . لو كان الاب يضرب أبناءه عندما يخطئون ، ستجد الام تحتضنهم عندما يكون ، والعكس .

بالنسبة لي ، في حياتي كلها لا أتذكر ان أبي ضربني ولو لمرة واحدة ، ولكن أتذكر الكثير لأمي ، ياما ضربتني لما أغلط او مسمعش كلامها وخصوصا لما تقولي متلعبش "بلى" وتوسخ هدومك ، وكنت بحتال علي الموقف دا وانا صغير ، لو والدتي جاية تضربني تلاقيني دخلت في الصلاة ، حتى لو مش متوضي ، الله أكبر ، وفضل أصلي أصلي ، وهي مستنياني أخلص الصلاة والصلاة مبتخلصش لحد ما أحس إنها هديت والغضب راح خالص ، اروح مخلص الصلاة ، وأفلت من العقاب ^_^ .

المهم ، نرجع تاني عشان روحنا بعيد قوي ، شرحت لأهلي سبب رجوعي ، عشان الزيارة بتاعتي خلصت والمدير هيقدملي علي الإقامة وهرجع بعد إسبوع إن شاء الله .

كان رد ابي : ماشي يا بني ، ربنا يوفقك ويسهلك أمرك .
وكان رد امي : اسبوع واحد ، يعني مش هتعيد معانا ، دا لسة علي العيد ١٠ أيام
، إية المدير ابن ال..... دا .
مش قلتلكوا ، إنما معادلة الحب ^_^ .
إنتظروا المقال القادم قريبا إن شاء الله ، ونظرات وكلام الجيران عن عودتي وفاضل
كوميدي مع رحلة البحث عن عروسة في إسوع - جاي في السريع الجزء الثاني
. ^_^

جاي في السريع- الجزء الثاني -

بعد العشاء ، والدردشة مع أهلي ، قلت لامي هروح أسلم علي أختي ، بيتهم
بيبعد عن بيتنا حوالي ١٠٠ متر ، وكنت جايب هدية لابنها الصغير ، كان عمره ٤
شهور ، رحنا انا وأخويا أحمد ، أصغر مني بتلات سنوت .
أنا وقفت برة علي جنب ، وأحمد خبط علي الباب وبعد ما دخل ، ساب الباب
مفتوح عشان أنا ادخل بعد شوية .

قال لأختي ، طارق باعت الهدية دي لابنك محمد ، قالت بجد ؟ وربني كدا ؟ بعته
إمتي ؟ وبعته مع مين ؟

راح سوبر مان (طارق) داخل من الباب ، وقال بعته معايا انا ، الهدية وقعت
من ايد أختي و إتصدمت وقعدت تبصلي وتقول انت طارق ؟ إنت طارق أخويا
بجد ؟ انت ؟ مش كنت ؟ هو انت انت ؟

كان موقف لذيذ جدا ، وكل ما نتكلم شوية ، ترجع تسألني تاني ؟ بجد إنت طارق
؟ طب إية إلهي حصل ، إية إلهي خلاك تنزل مصر بسرعة كدا ؟
قلت تاني ، هو انا كل ما أشوف حد هحكيه أنا نزلت لية ؟

يا ستي انا نازل اسبوع عشان الفيزا بتاعتي وإحتمال أحضر العيد هنا او ما اسافر
قبل العيد ، إدعيلي بقي إن أعيد معاكوا .

تاني يوم وفي قاعدة عائلية بعد العصرية ، قالت أختي : - ما دام انت موجود في
مصر ، يبقى لازم نشوفلك عروسة ، لازم تخطب عشان لما تسافر وتنزل المرة
الجاية إن شاء الله، تتجوز بقي وتستقر ولا إنت عاوز تفضل كدا .

قلت لالالا متفتّحيش عنيا علي الحجات دي ، انا مكسوف ، متضغطيش عليا ، لا لا ^_^ .

قلت لا والله ؟ هتصيع ياد ؟ الله يرحم ايام الإعدادية والجوابات الغرامية ، فاكّر الناظر لما مسك الجواب الغرامي بتاعك ، وقالك روح جيب ولي أمرك ولا الثانوية العامة والدروس الخصوصية ، ولا الكلية والمدينة الجامعية !! ياعم المكسوف ، إن كنت ناسي افكرك .

هااار اسووود ، بس بس ، إنت لسة فاكّة الحجات دي؟ هتفضحيننا ، دا كان طيش شباب ، كنت لسة إتناشر سنة ^_^ .

قلت : انت هتقولي ، من الاخر نشوفلك عروسة ولا حاطط عينك علي حد ؟ بصيت في الارض وقلت : إللي تشوفيه يا أخي ، انا مقدرش أرفضلك طلب ، بس انا معرفش حد في البلد ، قالتلي امال احنا رحنا فين ، عندك بنت كذا و بنت كذا و بنت كذا و بنت كذا .

قلت : ولا اعرف اي واحدة فيهم ؟ أنا اخر بنات فاكّر شكلهم في البلد ، البنات إللي كانوا معايا في المدرسة وأكيد معظمهم متزوج وعنده عيال دلوقتي .
التجربة الاولي : -

أختي : طيب خلاص نبدأ ببنت الحج (...)^ ، دي في تالّثة كلية

أنا : هي حلوة ؟ حلوة يا أحمد ؟

أحمد اخويا قال : يعني

قلت : يعني ؟ ييقي مش حلوة ، مليش دعوة مش عاوز

أختي : والله بنت حلوة و زي العسل ، أخوك بيضحك عليك .

قلت : أحمد ، حلوة ولا مش حلوة ؟
أحمد : حلوة ، بس يعني ، مش قوي .
قلت : وله قوم من هنا ، يلا حد يتصل ، إتصلي يا ماما
امي : طيب هاتلوا دليل التليفونات وشوفوا رقم الحاج (...)

- الووو ، سلام عليكم
- عليكم السلام ، مين معايا ؟
- أنا (أم طارق) أم البشمهندس طارق ابو حسن ، ابن الحاج حسن ابو عبدالعال (قال يعني الواد معروف قوي)
- أهلا وسهلا ، اي خدمة يا حاجة ؟
- مش حضرتك الحاجة (....)
- اه ياختي ، خير
- الموضوع إننا عاوزين نطلب إيد بنتكم (أ.م.ع) لإبننا طارق ، هو شغال في الإمارات و لسه جاي من السفر إمبراح ومسافر بعد اسبوع ، فكنا عاوزين نعرف رايكوا عشان لو فيه نصيب ، نقرأ الفاتحة او نعمل خطوبة قبل ما يسافر .
- والله يا حاجة مش عارفه اقولك إية ، بس انا هكلم ابوها وإخواتها وهنرد عليكموا بكرة إن شاء الله .
- يعني أتصل عليكى الساعة كام كدا ؟

- يعني ، بكرة بعد العصر إن شاء الله
- اول ما الحاجة قفلت المكاملة ، حصل هجوم مفاجيء
- أنا : أية يا حاجة ، انتي خدتيها مرة واحدة كدا ، جاي امبارح ومسافر
بعد اسبوع ونقرأ فاتحة او خطوبة ، هو سلق بيض ؟ أكيد هيرفضوا طبعاً
- أمي : يرفضوا ؟ لية يعني ؟ هما يطولوا ، دي كانت طيارة من الفرح
- أنا : وشوفتيها وهي بطير ، والله شكلهم هيرفضوا
- أختي : اه ياماما مكنش لازم تقولي دا كله ، إنت كنتي تسألهم وبس
مكنش لازم تقولي مسافر بعد أسبوع ، كدا هيخافوا .
- أحمد : مبروك ياريس مبرووووك
- أنا : انا مش قلتلك قوم من هنا ياد ، إنت نحس أصلاً
- تاني يوم ، وبعد صلاة العصر ، الحاجة إتصلت ،
- الو سلام عليكم ، معاكي أم طارق
- أهلاً يام طارق
- خير ياختي ، كلمتي الحج (...)
- إحنا اسفين والله يا حاجة ، بس ابوها قال لما تخلص تعليم .
- وهو حد قال هنجوز دلوقتي ، إحنا بس كنا هنقرأ فاتحة ، وهو هيسافر
ولما ينزل تكون هي خلصت ويجوزوا
- معلش يا حاجة ، بس ابوها مش عاوزها تشغل بالها بالحجات دي دلوقتي
إلا لما تخلص .

أحمد : يابني أصبر هنتجوز سوا ، قدامي خمس سنين بس هيعدو بسرعة
أنا : أسكت يا

وإنتهت التجربة الثانية بالفشل
التجربة الثالثة :-

طب بص بنت (...) ، بجد دي من الآخر وعائلة متدينة جدا
ماشي ، اتصلوا (من غير ما اسأل السؤال المعتاد " هي حلوة " لاني فقدت
الامل خلاص)

- الو ، سلام عليكم ، الموضوع كذا كذا (نفس الاسطوانة اللي في
التجربتين إيلي فوق)

- والله ابن خالها متكلم عليها واحنا مديينهم كلمة ، وانتوا والله احسن
نسب ، بس احنا مديينهم كلمة ومنقدرش نعمل حاجة .

- طيب شكرا ، سلام عليكم

وإنتهت التجربة الثالثة بالفشل

أنا شكلي هعنس ولا إية ؟ إية.. إية ؟ فية حاجة غلط بتحصل لية ! لية..
لية ، حالي مش حالي ، إية إيلي جرابي ، عمال أترفض وأخويا بيضحك
ويقول هية ، هيبية هيبية .

حسيت إني عامل زي ماجد الكدواني في فيلم " جاي في السريع " عاوز
يجوز واحدة ويرجع في اسبوع ، بس في الآخر الشغل ضاع منه ، يا انهار
ابيض ، بلا عروسة بلا بتاع .

طبعاً قاعد حاطط التليفون جنبي ، أستني حد يتصل بيا ، مفيش ،
المفروض يكون وصل البيت ، المغرب قرب يأذن ، أكيد روح عشان يفطر
يعني .

بعد المغرب ، قلت مش بدھا بقي ، أتصل بيه قبل ما يروح هنا ولا هنا

- الو ، سلام عليكم ، الحج (...) موجود ؟

- ايوة ، لحظة واحدة

- الوو ، السلام عليكم

- وعليكم السلام ، إزيك يا حج (...) معاك طارق ابو حسن

- يا مرحب يا بشمهندس

- يا مرحب بيبك ، كنت عايز اكلم معاك شوية ، ينفع اعدي عليك دلوقتي

قبل صلاة العشاء

- يا مرحب تشرف

- طيب انا جايلك دلوقتي ، سلام عليكم

رحتلہ علي البيت ومش عارف هقول اية ، مكسووووووووووووووووووووو

،

قعدنا ، وجاب الشاي ، إتفضل يا باشمهندس

يا انهار ابيض ، أنا مبشربش الشاي اصلاً ، إلا نادراً ، بس شربته غصب

.

المهم ، انا كنت مسافر الامارات ونزلت اسبوع كدا عشان تغيير الفيذا

بتاعتي وكنت عايز اناسبك .

رؤية وتحليل :

الواحد يا خويا يلاقي البنات قدامه كثير اوي واول ما ينوي يخطب او يتزوج ، يلاقيهم إتبخروا ، إلي لسة مخلصتش ، إلي مين متكلم عليها ، إلي بتحب واحد وهيتخطبوا بعد ١٤ سنة ، إلي هت حضر عفاريت . بالنسبة بقي للشباب إلي عاوز يسافر او ناوي يسافر ، إقفشلك في عروسة قبل ما تسافر يا صاحبي ، أخطب قبل ما تسافر ، لانك لما تسافر هتنزل كل سنة شهر ، لا هتلق تخطب ولا تتعرف علي بنت وتعرف مميزاتها وعيوبها وهتفضل تدور وتلف لحد تموت ، وممكن تخطب واحدة وغنت وحظك ، يا تطلع بنت كويسة كدا وعلي مواصفتك وبقي ربنا كرمك ، يا تطلع روحك وجميع الارواح المحيطة بيك ، وتفضل تلعن في الناس اللي عرفتها عن طريقهم .

طيب لو إنت مسافر بقي ولسه مخطبتش ، تعمل إيه ؟

متتعبش نفسك انضم للجمعية اللي انا إسسستها " معنسين للابد " وشعاها بيقول : -

معانا فلوس ومستورة بس معنسين ... يارب بس نجوز ، ولو عشنا مفليسن

نرجع بقي للشغل ؟ إحنا المفروض مش في إجازة ، فية حاجات لازم أخلصها وأتابع الشغل مع هريدي .

دخلت نت قلت اشوف إية أخبار الدنيا هناك ، اول ما فتحت الإيميل
بتاعي لقيت أكثر من ١٥ إيميل ، بقرأ اول رسالة :
يا انهار ابيض ؟ إية دا ؟ دا إيلي كنت خايف منه
إنتظرونا في المقال القادم " وداعا هـ....."

وداعا هريدي

نزلت مصر يوم الجمعة ووصلت بالليل ، المفروض أريح يومين او ثلاثة كدا من الشغل ، طبعا دي مكنتش أجازة ، يعني المفروض أتابع الشغل وكل حاجة مع هريدي .

مكنتش عندي أنترنت دي اس ال في البيت ، فدخلت من التليفون الأرضي ، وما أدراك ما إنترنت التليفون الأرضي ، سرعة إية ، صاروووخ ، لما كنت بحب أفتح كام صفحة ، كنت بفتح اللينكات واروح اصلي العصر وأقول أذكرك المساء ، واجي القيهم فتحوا ^_^ .

معرفتش طبعا أفتح أي إيميل ، ومقارنة بالإنترنت في الإمارات إلي انا كنت متعود عليه ، رحنت قافل الجهاز وقلت بكرة الصبح ، اروح علي أي نت كافية .
تاني يوم الاحد ، رحنت نت كافية في المدينة ، لأن القرية بتاعتي مفيهاش اي نت كافية ، بين المدينة والقرية حوالي ١٧ كيلو ، خدتهم جري في نص ساعة ، أصلي بحب الرياضة ^_^ .

محدث يصدق ، رحنت في عربية طبعا ، ووصلت نت كافية علي الساعه ١٠ صباحا ، اول ما دخلت لقيت دينا اونلين .

دينا : طاررق ازيك ، حمد الله علي السلامة

طارق : الله يسلمك ، وأصبحنا وأصبح الملك لله ، اللهم إني اعوذ بك من شر هذا اليوم وشر ما بعده (في سري طبعا)

دينا : كيف مصر وكيف أهلك

طارق : بخير ، مصر بتسلم عليكى . اية أخبار الشغل ، المدير مش أونلين ؟

دينا : الشغل تمام ، المدير كان أونلين من شوية وخرج

طارق : طيب أنا هفضل أونلين اشتغل شوية ، لو دخل اونلين هكلمة

دينا : اوك

شوفت الإيميلات بتاعتي و قعدت اشتغل في التاسكات اللي واخدها من المدير
قبل ما أنزل .

علي الجهاز اللي جنبي ، جت بنت شباب وحماتها ، دخلوا نت عشان تكلم
جوزها ، كان مسافر السعودية ، والست الحاجة بدأت تكلم إنها ، إلووو ، إزيك
يا حبيبي ، عامل اية ، أخبار شغلك اية، إحنا كويسين الحمد لله ، و مراتك
كويسة الحمد لله ، عامل اية في الغربية يا حبيبي و

وعلي الجانب الاخر ، شباب الثانوية العامة إللي هربانين من المدرسة بيلعبوا جيمز
علي الشبكة

أحمد متضربش عليا ناار ، كدا عاوز تموتني ، طب والله منا سايبك ، خد دي ،
تااخ ،، تااخ ،، تااخ

وأنا في النص عمال أنفخ ، لا عارف أركز من الست الحاجة وصوتها العالي وهي
بتكلم إنها ، ولا الشباب اللي عمالين يحاربوا ويموتوا في بعض ،

عدي ساعتين والمدير دخلش اونلين ، قلت لدينا : انا هروح اكمل شغل من البيت عشان أنا في كافي نت ومش عارف اركز كويس وبكرة هدخل ثاني ، لو في أي حاجة أبعثولي علي الميل .

ثاني يوم (الاثنين) رححت علي الضهر كدا ، عشان الاقي المدير اونلين ، لقيت جايلي أكثر من ١٥ إيميل ، استر يارب ، انا ماشي إمبارح ومكشش فية حاجة . لقيت كام إيميل من العملاء ، وكام إيميل من هريدي ، وكام إيميل من المدير وشكل هريدي محتاس هناك ، وقبل ما اقرأ أي إيميل ، لقيت المدير داخل اونلين و بيكلمني ،

المدير : ازيك يا طارق عامل اية ،

طارق : الحمد لله

المدير : صاحبك مش عارف يسد مع العملاء ، جهز نفسك هخلص ورقك

وتيجي اخر الاسبوع

طارق : اوك

المدير : انا كنت عايز اسيبك تقضي العيد في مصر ، بس انت شايف الظروف

طارق : مفيش مشكلة ، أنا هكلم هريدي دلوقتي وأخلص معاه المشاكل الموجودة

المدير : اوك

كلمت هريدي كان أونلين

طارق : إزيك ياريس ، عامل اية ؟

هريدي : تمام الحمد لله وانت؟

طارق : تمام الحمد لله ، إية المشاكل دي كلها ؟ إية اللي حصل

هريدي : انا اعرف يا خويا ، انت مشيت من هنا ، والدنيا باظت من هنا

طارق : طيب بالراحة وواحدة وواحدة عشان نخلصهم

المشاكل ظهرت في وقت واحد عند أكثر من شركة ، كل شركة تبعت إيميل ليا

ولدينا ، دينا تبعت الإيميل لهريدي وللمدير ، المدير بيعتلي أنا وهريدي ويقول حلو

المشكلة دي في نفس اليوم وإبتعولي تقرير، وهريدي بيعتلي يقول " إنت فين يا

.... وسبيني لوحدي "، يعني الإيميل الواحد بييجيلي أكثر من ٣ مرات .

خلال يومين او ثلاثة ، انا وهريدي حلينا كل المشاكل والحمد لله ، الحاجات اللي

مكنش هريدي عارفها او هتاخذ منه وقت ، كنت انا بجلها وأبعته الحل وهو

يعمل تحديث للعميل .

بس كان فية ٣ شركات لهم ظروف خاصة ، إحدي هذة الشركات ساهمت في

نهاية هريدي ،

الشركة الاولي ، كانت شركة إماراتية ، شركة أحد شيوخ الإمارات ، مش عاوز

اقول هو مين ، شركة حاكم عجمان ، والأرزاق بيد الله بقي _ ^ .

واسم الشركة ، مؤسسة الإستثمار العقاري ، وتعتبر أكبر شركة عقارات في

عجمان ، وبرنامج العقارات إيلي إحنا بنطور فيه ، إتعمل من الأساس للشركة

دي ، وبعد كدا شركات تانية إشتترته .

طبعاً الشركة دي مينفعش ييقي عندها مشكلة في البرنامج ، ولو حصل عندهم

مشكلة ، مبنحلهاش من المكتب بتاعنا ، المبرمج بيروح علي مقر الشركة بسرعة

الصاروخ يحل المشكلة ويصلي ركعتين شكر لله بعد ما يحل المشكلة ويرجع علي المكتب .

لما بيحصل مشكلة في الشركة دي بنتعامل مع إثنين ، مدير الحسابات ومدير الاي تي ، وهما الاتنين مصريين .

الشركة الثانية : شركة ألمانية ، لسة شاربين البرنامج حديثا ، والشركة دي ليها موقف معايا كوميدي جدا لما كنا بشرح ليهم البرنامج قبل ما يشتروه ، هتكلم عنه في المقال القادم إن شاء الله .

لما بيحصل مشكلة في الشركة دي بنتعامل مع إثنين ، صاحبة الشركة (ألمانية) و مدير الاي تي (صيني) .

الشركة الثالثة : شركة صومالية ، يملكها يبجي ١٠ صوماليين كدا ، شركاء مع بعضهم ، واحد وأخوة وابن عمه وابن خاله، ومعاهم كام سيده صومالية بردو ، لما بيعملوا إجتماع ، العمارة كلها بتسمع صوتهم .

لما بيحصل مشكلة في الشركة دي بنتعامل مع إثنين ، واحد من اصحاب الشركة (صومالي) ومدير الحسابات (سوداني) .

لما ظهرت مشكلة في الشركة الاولي ، شركة الشيخ ، هريدي ترك كل شىء ويسرعة الصاروخ ، راح الشركة يحل المشكلة ، وأخذت منه طول اليوم عشان يحلها ..

في نفس الوقت البرنامج وقف في الشركة الألمانية ، هريدي حاول يجلها اونلين عن طريق الدخول للسيرفر بتاعهم ، متحلتش ، فكان لازم يروح الشركة وطبعاً دا عاوز يوم تاني لأنه كان في شركة الشيخ .

هريدي راح الشركة الألمانية تاني يوم ، وحل المشكلة والأجهزة كلها إشتغلت تاني لكن اليوم كان خلص .

الشركة الثالثة ، الصومالية ، كان عليهم فلوس وكانوا عايزين تعديلات في البرنامج وحاد يشرح لهم شوية حاجات مش فاهمينها ، فكان لازم حد يروح لهم .

هريدي راح الشركة تالت يوم ، وقابل مدير الحسابات (سوداني الجنسية) وكان مضايق جدا عشان بقاله ٣ أيام ومحدث عبره ، وبدأ يسأل هريدي علي حاجات في البرنامج ، وهريدي يجاوبه ، فيرد عليه ويقول بس هي المفروض متبقاش بالشكل دا ، انا عاوز أغيرها ، هريدي قاله ، هي كدا ، إشتغل عليها كدا ، كل الشركات شغاله عليها كدا .

مدير الحسابات إضايق من هريدي ، وسأله علي حاجة تاني وكان هريدي ميعرفهاش ، فهريدي قال إستني لما أجربها ، فمدير الحسابات قاله ، هو أنت متعرفهاش ، امال جاي تشرحلي إزاي ؟ هريدي بحسن نية قاله ، اصلي لسة جديد في الشركة ، وفيه حاجات لسة مشتغلتش فيها ، مدير الحسابات قاله : خلاص إبقي اعرفها بعدين وإبقي تعالي قولي وأنا هكلم دينا بخصوص الفلوس .

ولما هريدي مشي من عنده ، إتصلي علي دينا ، وفضل يزرق ليها ، إنتوا باعتين واحد ميعرفش حاجة ، باعتين واحد لسة جديد ، باعتين واحد يتعلم فينا ، أنا

مش عاوز البرنامج دا ، ومش دافع فلوس ، وإحنا عاوزين فلوسنا وتعالوا خدوا البرنامج بتاعكوا .

دينا وصلت كل الكلام دا للمدير ، مع شوية شطة وفلافل وإن هريدي مش عارف يسد مع العملاء زي ما طارق كان هنا ، وأنا مش عارفه أكمل شغلي وأتابع مع هريدي كل حاجة ، ولازم طارق يبجي في اسرع وقت .
وما دام دينا قالت إن هريدي مش عارف يسد مع العملاء ، يبقى لزقت في دماغ المدير ، إن هريدي مش عارف يسد مع العملاء ، حتى لو كل العملاء شكروا في هريدي .

من ناحيتي ، بدأت اواظب في الشغل وأكون اولين أكثر وقت ممكن ، يا إما من كافي نت ، يا إما من عند واحد صاحبي ، لكن لو الامور مستتبه ومفيش أي مشاكل ، كنت بدخل نت من البيت عندي (من خط التليفون الأرضي) ، لأن الهدف إن المدير يشوفني اولين ، فيتأكد إنني شغال .

مضي اول اسبوع بسرعة جدا ، و الحمد لله الشغل بقي تمام وهريدي شغال وانا معاة ، وموضوع سفري قبل العيد حسيت إنه إتأجل ، لأن المدير متكلمش معايا خالص في الموضوع دا ، ولا قالي هسافر أمتي ولا قالي قدمتلك علي فيزا ولا أي حاجة .

كنت كل يوم بدعي يارب ينسي ، يارب ما يفتكر ، يارب ما يبعثليش قبل العيد ، يارب عاوز أعيد في مصر ، يارب عاوز أخذ عيدية من أمي وأبويا .

أبوة هأخذ عيدية من أمي وأبويا ، ومحدش يبص كدا ويضحك ، أنا مهما كبرت صغير ، انا مهما عليت مش فوق ، مش ممكن يوم هتغير الدنيا غروب وشروق . ^ _ ^

في بداية الاسبوع الثاني ، لقيت المدير بيكلمني و بيقولي إن " هريدي مش كويس وإنه ضحكت عليا لما قلتلي إنه كويس . "

مردتش علي المدير ، انا كنت عارف هو بيقول كدا لية ، كنت حاسس إنه مش هيقدم لهريدي علي الفيزا وإن هريدي هينزل مصر بعد إنتهاء الزيارة ، وإنه بيقول كدا عشان يمهد للموضوع دا .

انا عارف هريدي كويس ، وعارف شغله كويس ، وهو مأخدش فرصة زبي ، وحظه كمان إنه كان لوحده في رمضان ، بس إحساسي إن المدير مكانش عاوز هريدي يكمل في الشغل ، عشان هريدي بيطلب كثير ويبرد كثير ، غير إن دينا مش طايقة من الأول ، زي ما اتكلمنا علي الموضوع دا قبل كدا في مقالات " هريدي والمدير "

إتكلمت مع هريدي وبدأت امهدله إن المدير مضايق و قلقان منك وممكن تنزل مصر بلا عودة ، حاول تستفسر منه وطمنه من ناحيتك ، وكان رد هريدي : انا لو مشيت هبقي فرحان ، انا إتخاقت من الشغل معاه اصلا ، ونفسيتي تعبت .

رد هريدي كان دايمًا كدا ، حتى وأنا في دبي ، لما كنت أقوله غير طريقتك في الكلام مع المدير ، متطلبش حجات من المدير قبل ما الإقامة بتاعتك تطلع ، ممكن

يسفرك ، يقولي ، انا ممكن ارجع من الصبح علي مصر والشركة إلي كنت فيها
تتمني رجوعي ومنتساش إنهم عرضوا عليا زيادة ١٠٠٠ جنية عشان مش اسافر ،
وكنت أرد عليه ، لو كنت راجل إعملها دلوقتي وإنزل ولو إدوك الزيادة دي ،
هديك ١٠٠٠ درهم من مرتي كل شهر ، دول كانوا بيضحكوا عليك عشان
مش تسافر ، ولو رجعت دلوقتي ممكن ينقصوا مرتبك كمان ، عشان هيقولوا
عليك فشلت في السفر .

بعد يومين ، لقيت المدير بعثلي رسالة وبيقولي إستلم كل الشغل إلي مع هريدي
وراجع كل حاجة معاه وإبعثلي تقرير ، أي نقص في الشغل هيكون علي مسئوليتك

كلمت هريدي ، إية إلي حصل ، قالي إن المدير بعثله رسالة إني مش هكمل في
الشركة وهنزل مصر مع نهاية الزيارة .

نهاية الزيارة بتاعة هريدي كانت يوم العيد بالضبط ، فهريدي طلب من المدير
تقديم الزيارة ، عشان ينزل قبل العيد والمدير وافق وهريدي غير الحجز علي ٢٦
رمضان .

لو تفتكروا ، المدير كان قال قبل كدا ، لو هريدي مكملش في الشركة ، هيتحمل
كل المصاريف ، من اول الفيزا الزيارة والتذكرة والسكن ، يعني في الاخر هيطلع
مديون ، ودي نقطة كانت قلقاني جدا بخلاف الزعل إن هريدي هينزل ومش
هيكمل .

هريدي قالي حاول تشوف المدير ناوي علي إية في النقطة دي ، لما اتكلمت مع المدير ، قالي المفروض إنت اللي تتحمل كل المصاريف ، عشان إنت اللي جايه ، قلت نعم ؟ ، خدوهم بالصوت ليغلبوكوا ولا إية ؟ ، رديت علي المدير وقلت ، حضرتك لما نزلت مصر وعملتله إنترفيو ، كان لازم تعمله كل الإختبارات سواء تيكنيكال او كومينيكيشن قبل ما يسبب شغله في مصر ، هو دلوقتي هينزل مصر يا عالم هيعرف يرجع شغله ولا لا .

المهم المدير قال خلاص ، انا هديله كل حقوقه ، وبعد كدا لما تجيب حد تبقي تتأكد منه ، قتلته ، دي آخر مرة ، حضرتك عاوز تجيب ، جيب ، انا معدش ليا أصدقاء مبرمجين ، أنا اصلا مقطوع من سجرة ^_^ .

المدير قال لدينا أقعدي مع هريدي وشوفي حسابه كام وإديهوله ، قعدت مع هريدي وطلبت منه كشف حساب بالمصاريف بتاعته ، هريدي قدملها ورقة فيها المضاريف ، إللي هي في الاساس أجرة التاكسيات من الشركة او البيت للعملاء ، لما دينا بصت في الكشف ولقيت إن الحساب معدي ال ٥٠٠ درهم ، قالت لهريدي : انا عاوزة الفواتير اللي بتاخذها من التاكسي وانت بتحاسب عشان اراجع المبلغ دا .

طبعا انا موصي هريدي قبل ما أنزل ، انه ياخذ فاتورة من التاكسي عشان المدير او دينا ميعملوش معاه الدنيئة ويقولوا لو مفيش فواتير مش دافعين ، المدير قادر ويعملها .

هريدي راح مدخل إيدته في جيب شنطة اللاب توب ، وراح طالع برزومة فواتير ،
حطها علي مكتب دينا ، وراح مدخل إيدته مرة ثانية و طالع برزومة فواتير و حطها
علي مكتب دينا .

المكتب إتفرش ورق ، ودينا من النوع اللي بيقرف من اي حاجة ، ومبتحبش حد
يستعمل اي حاجة ليها ، بصت للمكتب ، وبعدين بصت لهريدي ، وقالت
خلاص خلاص مش ضروري ، شيلهم بليبيز .

كلمت هريدي بعد ما خلص الحساب مع دينا وإتفقت معاها بيعتلي تقرير بكل
الشغل إلي عملته وهستلم منه السورس كود بتاع البرنامج لما ينزل مصر ونقعد
قعدة مع بعض كدا .

يوم السفر ، دينا وصلت هريدي للمطار ، وقبل ما ينزل من العربية قالها كلمتين
من ورا ظهره ، انا كنت سعيد بمعرفتك ، وإن شاء الله أشوفك تاني قريب .
دينا اول ما سمعت هريدي بيقول " ، وإن شاء الله أشوفك تاني قريب " ، إعتقدت
إن هريدي مش عارف إنه نازل نھائي ، فردت عليه وقالت ، كيف يعني ، إنت
نازل نھائي ، أكيد قصدك اشوفك بمصر ، مو هيك ؟

هريدي كان عاوز يضربها ، رد وقال ، إنت تنوري مصر ، فكري تنزلي سياحة مصر
، وفي سره بيقول " وحياة أمك لأوريكي النجوم في عز الضهر لو فكري تنزلي
قاهرة المعز "

اوك هريدي ، دير بالك علي حالك ،
اوك دينا مع السلامة .

تقابلت مع هريدي ثاني يوم ، سلمني كل الشغل علي فلاشة ،
سألته ، أخذت كل فلوسك ، قالي : ولاد ال..... ، خصموا مني التلات أيام إللي
انا قدمت فيهم التذكرة ، ضحكت وقتلته ، حقهم مش إنت اللي طلبت مرتب
علي ال ٤ أيام في الشهر ، وبعدين إحمد ربنا إنك أخذت مرتب أساسا .
بعدين قالي ، بس تصدق يا طارق ، اول مرة أحس إن ديننا أنثي وهي بتقولي في
المطار " دير بالك علي حالك يا هريدي " ، كان نفسي اقولها متخفيش يا
حبيبي .

قتلته : حبك برص ، حبيبتك بإمارة إية ، دي تلاقيها زغردت اول ما الطيارة
بتاعتك إتحركت .

قال ، يلا يلا ربنا يسامحها ،

قتلته : متخافش ، هعلمهالك الأدب بس لما أرجع دبي .

قالي ، يا خوفي ، هي تعلمك الأدب

قتلته ، مش كل الطير إللي يتاكل لحمه يا هريدي ^_^ .

طبعا كان موقف مؤلم جدا ، وحش بكل المقاييس ، أنا كنت حاسس بالحزن في
عيون هريدي ، هو كان بيحاول يظهر إنه مش فارق معاه ، بس انا كنت حاسس
بنبره صوته .

قالي متقولش للشباب او أ حد من صحابنا إني نزلت ومش هرجع دبي ثاني ، لو
حد سألك ، قوله إني نازل اجازة لما الفيذا تخلص ، عشان الزيارة خلصت ، وأنا
هحاول اروح الشركة القديمة ، وربنا يسهل وأرجع الشغل ثاني .

هو الحمد لله دلوقتي ...رجع شركته القديمة تاني ، عمل عليهم لعبة بذكاءه ، قاهم إنه نازل عشان يعمل الفيذا ، وهو مستعد يرجع الشغل تاني لو هما محتاجينه ، اصل الغربية مش كويس ، لكن لو مرجعتش ، خلاص شهر الفيذا هتكون خلصت وهسافر ، وهما ربخوا بيه ورجع الشغل تاني ، لكن موضوع الزيادة اللي كانوا عرضوة عليه اتلغي ، قالوله دا كان عرض وإنه رفضته .
بعد كدا هريدي سافر إعارة تبع شركته علي الكويت ، ونزل مصر وطلع إعارة علي السعودية ومبسوط والحمد لله .
بعد ما رجع شغله بفترة ، قالي ، حاول تحافظ علي شغلك ، الفشل ...إحساس وحش جدا جدا يا طارق ، كونك تحس بالفشل في عيون إلي حوليك ، أصعب ١٠٠ مرة من الغربية إلي شفناها .
قلتله معلش يا صاحبي ، أهي تجربة وعدت ، ومحدث بيتعلم بالساهل .

إنتظروا المقال القادم بعنوان " العميل الألماني " وفيها
وما إن فُتح الباب حتى وجدت امرأة شديدة الجمال ، وفي كامل زينتها ، ترتدي ملابس قصيرة جدا ، تراجعت للوراء و قلت في نفسي " اللهم إني صائم ، إحنا مش في رمضان ولا إية " ، ثم بادرتها بسؤالي

Is this (...) Company ?

فردت قائلة

Yes , Are you Tarek ?

قلت بصوت خافت ، يكاد يكون منعدم

Yes

ضاع صوتي من هول الموقف ، فهي المرة الاولي التي أسمع فيها إسمي بهذه الطريقة ،
فقد تحول إسمي من "طارق" أو "طططارق" ، إلي " تارك " ، " تاركاارك " ،
تاررررك " ، " ترك " ، وكأني اصبحت شخصا آخر ^_^ .
دخلت الشركة بطيء الخطي ، أقدم ساق وأخر ساق ، وإذ بي اتفاجأ ب ٣
سيدات أكثر جمالا من التي فتحت لي الباب ، قلت في نفسي ، ، يا منجي من
المهالك يارب ، إنهم غنيمة لي ، حلال الله أكبر .

إلي اللقاء في الجزء الثاني من " هذا ما رأيت في دبي "

والآن أيها القارئ العزيز ، لو الكتاب عجبك ، أدخل هنا وقول رأيك بكل صراحة
ووضوح ومجاملات والذي منه ومش هنوصيك

www.goodreads.com/book/show/17228681

ودي صفحة الكتاب علي الفيس بوك وجديد كتابات المؤلف

www.facebook.com/DubaiDays

ودا حساب المؤلف علي الفيس بوك

www.facebook.com/tarekfalcon

ولو معجبكش الكتاب ، فسكتم بكنتم ، خليها في سرك واستر علي أخوك 😊،

وإحنا آسفين علي وقت الثمين .